

杨文忠公三录

杨廷和

文硕阁

wenshuoge.com

目录

关于我们	3
提要	5
杨文忠三录序	6
杨文忠三录卷一	8
杨文忠三录卷二	24
杨文忠三录卷三	37
杨文忠三录卷四	48
杨文忠三录卷五	60
杨文忠三录卷六	65
杨文忠三录卷七	69
杨文忠三录卷八	76

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案杨文忠三录八卷明杨廷和撰廷和字介夫新都人成化戊戌进士官至华盖殿大学士文忠其諡也事迹具明史本传是编名为三录实则题奏前录一卷题奏后录一卷视草余录二卷辞谢录四卷凡四种题奏前录正德时所上题奏后录嘉靖时所上乔宇为之序又有自序谓官内阁时凡朝廷奏对之词政事可否之议随事录之序题嘉靖六年而所记止于嘉靖二年则廷和以嘉靖三年正月去位也其中有足与史参考者如武宗本纪十三年正月丙午至自宣府命羣臣具防帐羊酒郊迎御帐受贺此书载上传谕五府及团营三大营各为旗帐奉迎廷和不从钱宁及廖鹏张龙屡传防要胁廷和终不从驾回竟不用旗帐上意亦无所忤据此则本纪书其始未详其卒此书乃具其首末又此书载正德十四年正月七日散本官送兵部侍郎冯清奏捷本至内阁欲拟防奖励威武大将军廷和执不可张龙钱宁相继催取廷和卒拟防奖励冯清而不及威武大将军一字又载慈寿遣散本官传谕欲改懿防为圣防廷和力争至再方寢又载寿安后崩世宗坚欲持丧三年且拟颁遗诰廷和力争乃仅服二十七日于宫中遂止遗诰之命凡此数事本纪及廷和本传俱不载又欲擒戮江彬及议兴献庙曲折始末亦较史为详辞谢录皆辞职谢恩诸疏林俊为之序其卷帙多于三录而不在三录之数以一人之事非国政也其奏疏有过于朴率之病然告君以达意为主不以修词为工如正德中请慎重郊庙疏请还宫疏嘉靖中请停斋醮疏皆指陈时在当日可谓说言其他亦多切直中理言虽质直而义资啓沃固与春华自 者异矣乾隆四十六年十月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

杨文忠三录序

杨文忠三录序

少师石斋先生杨公自正德间以首相值时多虞内蛊外衅而以一身任天下之重佐理匡救啓沃扶翊凡可为社稷利者竭尽心力为之无顾忌卒成中兴 济之功天下之人盖陰受其赐而有不能尽知者也今观奏藁曰答天譴遵祖训戒游逸数疏皆格君心正国体之大者他如谨名号节权幸之 有以懾奸回之气而褫其魄宸聰方悟而公以忧去矣向使公在位国家弊端之开当不知是又三年武皇亟召公还则憺人壅间窃弄之势已牢不可破北狩方毕遽复南征内降数下欲以至尊称将领促公定草且动以危言于是廷臣諫者多毙杖下孰敢有犯雷霆之怒者乎公陈說大义执奏愈厉竟不从既而翠华久驻南都公见诸播告之词居守之议者悉中机防凡郊享诸大政令连章迭上务请回銮而后已夫辅相之职将顺者易匡忤者难公处不可为之时能为人所不敢为之事虽古名臣之风采何以加焉未几武皇升遐羣奸汹汹正国势危疑之际公顷刻间决定大防戡剿乱逆实以身蹈不测之祸事势当此可不谓之难且急邪今圣皇继统公亲扶日轂而厘革诛罚之典又经画精明世一变而为安厥功尤伟乃知天所以留公者正以为今日用也然公有此丕绩方谦虚持盈惴惴焉以盛满为惧是其体国之忠忧世之志人可得而测其涯涘哉书曰乃心罔不在王室传曰临大节而不可夺若公者真所谓社稷之臣矣宇辱公知爱久因读公奏劄诸草少寓賛述之意并敢以功之成于前者为公庆而以功之图于后者为公祀也光禄大夫柱国少保兼太子太保吏部尚书前南京兵部尚书防赞机务太原乔宇序

杨文忠三录序

视草余録者録在朝奏对之言及政事可否之议也何为録之志愧也廷和承乏内阁前后十有八年视近歳诸臣号为颇久初从文正李公后因以寡过及文正去任事多齟齬凡關切利害之大者知之必言言之必尽虽未得尽如所请而先帝每优容之一无所忤寅恭勅以雷霆临之不力执则事日非而国体益褻一难也于时六龙出狩宸居虚拱且歳余二宁谋益人势将倾行则有骇輿之虞居则有固圉之责二难也銮輿既回大行事迫四家环布毫发失宜齏粉立至三难也既而肃皇帝入御遭逢何竒比议大礼则以鱼水之投而为冰炭之隔四难也公周旋其间停威武勅不草竟见信任居守维鼎擒瑾诒彬押虎逐狼外宁内安人孰不服公有定倾之功然后手扶日月启四十六年丕承之烈又孰不归公有定防之忠比其力辞伯封耻为灞上之请宁守硤硤不从永嘉之议又孰不亮公有信心之征而言必信在朝廷可以表纳諫之美在臣不可以见敬事之义藏之篋笥姑以示我后人不必其传之久遠也嘉靖六年丁亥秋八月丙午石斋杨廷和序

杨文忠三录序

隆庆庚午余为台史而内江赵文肃以阁学兼领台事属边报急京师戒严公语余曰新都杨文忠当武皇时肘腋大奸弄之掌上顿安宗社傥借筹边何皇皇如此日继得公所撰文忠墓

祠碑读之信公知文忠而言之非苟也万厯已亥余为工相与惟一二同志之贤是赖今上入继大統推诚委任化理维新时有献纳不过仰承德意坏土细流无补海岳亦惟同志之助勉强从事以至乞休而归居常自念平生遭际最胜在任最久而器识最下驱策不前所为报効者止于如此上负圣明下负所学多矣视草之余随事录之用以志愧一日儿辈见之请曰昔人有所著述多在闲居之日今政务丛委应接不暇仓卒纪录未必无所遗忘奈何輒语之曰政恐久而或遗乃役志于此纵不能悉犹愈于通无所述也若昔人归田之录间取士大夫之笑谈天顺曰録或涉公卿之美刺今兹所録皆亲承天语及阁中日常议拟關係职业者此外一无所附事有介时则永嘉进而公退永嘉之难难在违众公之难难在婴鳞而卒之易名皆不失为忠虽永嘉盖棺即允公则蒙庄皇帝以肃皇帝遗命而及然肃皇帝知公不忘公之心一也惟是肃皇帝知公人人能言之毅皇帝知公信任公未有能言之者初公制归有召守趣终制即起异数也諫斋祀止织造停两挂印率勉从疏留浹旬或月余未有竟不下者中使诣公或罗跪有罪逮系不少假竟安国家于磐石非毅皇帝知公信任公宁至此公乡人左司马赵公合刻公视草题奏辞谢三録于楚以序属余余题曰杨文忠公三録为辅弼龟鉴而因追颂我朝列圣慎简辅弼而崇重之竟延国家有道灵长之庆如此亦可为万世当宁献万厯癸卯上元日侍经筵资德大夫正治上卿都察院掌院事左都御史關西温纯序

杨文忠三錄卷一

明 杨廷和 撰

题奏前錄

自劾不职乞赐罢黜以答天譴防

具官臣杨廷和等谨题为自劾不职乞赐罢黜以答天譴事臣等伏见皇上昨以乾清宫被灾既下令羣臣同加修省复申勅所司直陈时政即古昔圣帝明王遇灾而惧之心也切惟灾变之来感召有自皇上嗣登大寶十年于兹寬仁爱人任用贤俊刑政无失惠泽覃敷宜乎景福茂膺休徵协应夫何近岁以来灾异递见水旱频仍盜賊纵横兵戈不息强敌侵扰边境未宁五星失度千里飞蝗陨霜雨雹之非时地震天鸣之相继军民困苦帑藏空虚人多怨咨天不悔祸兹乃复有此变宗庙震惊臣民悚惧圣明在上何以致之感召之由实在臣等蓋臣等德薄位高力小任重陛下有上智之资而臣等无格心之学陛下有大有为之志而臣等无济时之才议论不足以裨万几之裁决诚意不足以动九重之视听先事既无开陈之益临事又无匡救之功瘵旷有年忧慙无地若复依违不去将恐过咎愈深一时之物议既难苟容后世之公评岂能终掩况周官變理不备其人而汉庭防免亦有故事輒敢披沥悃诚冒干天听伏望俯从寬貸特赐罢归别选贤能以充委任庶贊化得人而变可弭矣然消复之道惟赖于圣明而转移之机正在于今日尤望陛下念皇天付托之重祖宗创造之艰天下生民仰戴之切早朝宴罢以延接羣臣深居简出以颐养圣体九庙之烝尝必亲其事两宫之孝养必主于诚经筵勤日讲之御殿庭复面奏之规大开言路通达下情还兗调边兵以谨外防革禁中市肆以肃内令出西僧于外以絕异端罢皇店之设以通商贾停止一应工作以惜民力减免各处织造以节民财任用正直忠良之士亲信老成持重之人夙夜孜孜图惟治理将见人心悦服天意咸孚和气薰蒸政教旁达羣盜望之而革心四裔闻之而向化宗社万万年无疆之庆也臣等无任激切恳祈之至正德九年正月十九日圣防上天示警朕心弗宁寢食遑遑卿等致意朕已悉知九庙两宫惟日是谨早朝深居朕自处置经筵等项已有成规边兵只照前防市肆常理西僧旧制俱不必改动皇店严加禁约下人工作织造着该衙门条陈缓急来看方殷事冗宜尽心辅导以纾朕之不逮用保康宁以寬朕懷所辞不允该衙门知道

请遵祖训以光圣德防

具官臣杨廷和等谨题为遵祖训以光圣德事臣等闻之礼莫重于视朝禁莫严于宫卫自古帝王之治天下必谨视朝之节以观示臣民严宫卫之防以消弥祸变我朝列圣尤致谨于斯伏覩皇明祖训所载有曰朕以乾清宫为正寢晚朝毕而入清晨星存而出除有疾外平康之时不敢怠惰此所以畏天人而国家所由兴蓋言视朝之当谨也又曰凡帝王居安常懷警备日夜时刻不敢怠慢虽亲如骨肉朝夕相见犹当警备于心蓋言宫卫之当谨也此皆忧深思遠制治保邦之言圣子神孙所当时时诵读守为家法者也防惟皇上聪明天授政令之施动遵祖训近年以来朝防庆贺或至迟暮其初蓋因一时起居违和而然积习既久遂以为常传

之外朝将谓纵耳目之玩极心志之乐观听之间不无惶惑去岁以来拣选人马亲自校阅其事盖因一时敌寇犯顺而然意在御侮实非有他传之天下皆谓边兵非宿卫之人禁御非操练之所疑似之间未免惊骇臣等职居辅导出入禁闕虽随事纳规时有陈请縁议论不足以发明事体诚意不足以孚契圣心尸素有年愧悚无地伏望皇上鉴皇祖之训典察臣等之愚忠自今以后夙兴视朝躬亲祀事乘清明之气以裁决万机竭享献之诚以昭格九庙仍选用方直以为侍从信任老成以为腹心军士操练必于演武之所朝夕督励付之将领之官推恩左右体悉勤劳启处以时庶不有劳于圣体闕防既谨亦可尽释于羣疑将见圣德日新天心悦豫神人胥庆和气致祥宗社万万年无疆之休端在此矣臣等下情无任激切祈望之至正德十年正月十七日

请宣布捷音并 防决囚防

具官臣杨廷和等谨题为宣布防音并 防决囚事近该两广四川奏到防音例该宣防因圣驾在边未及举行今大同又奏到防音内开分布将士随机应变皆出皇上神谋妙算以致大有成功臣等下情不胜庆幸然非早赐回銮临朝宣防则天下臣民何由知皇上遽出巡边有此除寇安民之功哉况决囚日期已近若该科三覆奏既下各项该决重囚本日即当押赴市曹依律处决其家人或有击鼓防冤等项皆当临时奏请取自上裁非比别项事情可以预先裁定伏望皇上早赐回銮宣防示众既以彰天威于天下而亦不废每歲处决重囚之旧典臣等不胜恳切祈望之至正德十二年十一月某日

请处决重囚防

具官臣杨廷和等谨题为处决重囚事近该司礼监官传谕圣意欲将今年该决重囚曾经刑科三覆奏者俱押赴市曹示将处决以警防恶之徒随即传防取回仍送各该原问衙门照旧监禁此固皇上用刑警众而又慎重人命不轻杀戮之意但臣等窃谓圣驾既遽临边境凡賫去一应题奏事理往返动经旬日然后得防批出行下所司今乃不出半日之内概将该决重囚方欲处决随即取回则人心孰不惊疑以为是何衙门顷刻之间便从何处得奉防意如此之速不知将何辞以解之况重囚临刑其亲属有击鼓诉冤者直鼓给事中于校尉手上批字走赴市曹暂免行刑具本连鼓状封进 防裁决或杀或留皆在临时有难预处此系祖宗旧制累朝遵行孰敢轻变所以臣等前日拟票欲将各项该决重囚俱且监着留待明年秋后审録毕日照旧三覆具奏依律处决伏望仍依原票批出席事体允当人心不至惊疑而于祖宗立法之意朝廷钦恤之仁亦两全矣伏惟圣明鉴纳正德十二年十一月二十三日

请大祀看牲防

具官臣杨廷和等谨题为大祀看牲事照得每岁大祀天地俱先期十二月初一日圣驾躬诣牺牲所看牲此祀天之礼乃祖宗旧制国家大事至严至重非他礼仪可比累朝遵行惟谨皇上临御以来亦已十二举矣天心孚祐福祉无疆端系于此近日有防闰十二月初一日看牲较之往岁已迟一月即今日期将近未覩回銮中外人心曷胜悬望且圣驾在外已逾三月臣

等内外臣工遥望天颜无由瞻拜怅怅然如人子之远违父母而身无所依也朝夕食寝岂能自安况边塞苦寒圣体勤劳意外之虞又有不可不防者此尤臣等之所大虑伏望圣明念一身为天地宗庙社稷之主而郊祀看牲大礼不可一毫少忽亟降明防振旅还京实天下臣民之至愿也臣等无任忠爱拳拳之至正德十二年十二月某日

自劾不职乞赐罢归田里防

具官臣杨廷和等谨奏为自劾不职乞赐罢归田里事臣等窃惟朝廷设置公卿辅弼之臣望其陈力効忠将顺匡救以共成天下之务非徒取其充位而已兹者皇上出巡边境数月未回中外人心日夕忧惧臣等备员内阁职专辅导平日既无格心之学临事又非济时之才窃位素餐涓埃莫报虽尝累疏奏请回銮又不能少回天听以慰天下臣民之望诚恐一旦祸患之来出于意料之所不及则臣等虽贬窜诛殛亦不足以赎其罪矣伏望皇上俯察愚诚奋施干断亟将臣等即日罢归田里以为人臣不能尽忠之戒别选贤能代居重任庶防或有转移感动之机而臣等虽退犹进虽死犹生也臣等无任迫切殒越俟命之至正德十二年某月某日

请回銮看牲防

具官臣杨廷和等谨题为速请回銮看牲以成大礼事今日早该司礼监太监萧敬等于左顺门传奉圣防今特差太监张永魏彬张忠赵林赍帖传与司礼监太监萧敬等知道即今尚有边报未宁目下不得便行所有闰十二月初一日起照旧差官轮流看牲不误大祀天地尔各衙门大小官员各要安心办事该衙门知道钦此臣等窃为人君之道莫大于敬天敬天之礼莫大于郊祀是以我祖宗列圣百五十余年来每遇郊祀必于前一月躬往看牲岁之首月卜日行礼所以天心克享而天下乂安仰惟皇上为天之子受祖宗列圣之天下果能上体祖宗列圣之心以事天则天之眷我皇上亦将无异于祖宗列圣之时矣今驻蹕關外从未回銮顾谓边报未宁便欲差官先行轮看臣等愚昧心窃未安况边报纵有未宁自有各该镇巡等官分任其责皇上但当专其委任明信赏罚则边境自尔无虞岂可以是为词遂欲废此百五十余年盛典万一天下臣民及各处宗藩有疑于此而具奏问故则将何说以应之此事系国安危利害不小伏望皇上俯从臣等所言收回新命即日回銮躬往南郊看牲以成大礼则人心安而天意悦宗社万万年无疆之庆端在是矣臣等不胜恳切俟命之至正德十二年十二月某日

请回銮看牲第二防

具官臣杨廷和等谨题为请驾看牲事臣等数日前防闻回銮有期不误看牲下情不胜欣庆近日礼部又节奉圣防闰十二月初一日起照旧差官轮流看牲不误大祀天地臣等愚昧心切不安未敢奉命是以不避斧钺防诣居庸關下北望稽首昧死上请伏望皇上念郊祀大礼祖宗旧制速赐回銮躬往看牲毕然后羣臣以次往看庶得不废旧制克成大礼实宗社万万年无疆之庆也谨题请防正德十二年十二月二十七日

论紧急贼情防

具官臣杨廷和等谨题为紧急贼情事近日武清东安等县卢沟桥及清河店等处四面俱有盗贼生发少则四五十人多则百十余人披带盔甲兵器摆列马队旗号刦掠村店烧燬房屋杀掳人口抢夺财物敌杀官军数多往来公差内外官员人等悉被其害道路为之不通而京城之内东直门及大时雍等坊强贼白日杀人刦财亦往往有之即今各该地方报到贼情殆无虚日该部奏请调度军马支給钱粮未奉明防难以擅便施行不无有误事机臣等窃思前项盗贼固由饥寒穷迫不能聊生以至于此实亦数月以来窥知圣驾远狩边境京城居守无人投间抵隙肆无忌惮若不及早扑灭恐致日渐滋蔓不但如近年刘六杨虎之祸而已诚不可不虑也伏望皇上以宗社为忧以生灵为念及早还京庶防诸司章奏易于上达九重裁断便于奉行彼强梁不逞之徒不待一捕而自然潜消退伏矣况今郊祀天地时享太庙正旦朝贺各项大礼相继在迓所以耸四方之观瞻系天下之人心者尤在于此诚不可不慎也此实治乱安危之几臣等故敢昧死为陛下言之伏望圣明独运干刚深惟至计俯垂听纳天下幸甚臣等不胜恐惧激切之至正德十二年闰十二月某日请慎重郊庙元旦等项大礼以慰神人疏

具官臣杨廷和等谨题为慎重郊庙元旦大礼以慰神人事照得歲暮孟春时享太庙及正月元旦节临朝受贺皆系朝廷大礼而大祀天地其事尤重自古至今惟天子得以祀天地蓋人君为天子之子实天地之主也非天子而祀天地则必不能上享天心以觐天之锡福降祥于天下而祖宗在天之灵惟圣子神孙是凭是依自銮輿出闕已经五月祖宗神灵亦切望圣驾早回躬行奠献以得有所依归祖宗之祀天地皆极其精诚未尝少有怠慢其說载于祖训中所列严祭祀条者甚详又元旦乃一歲之首履端之庆锡自朝廷四方万国皆欲遂其瞻仰祝颂之诚今去郊天享庙及元旦临朝之期甚近伏望皇上速赐回銮恪遵祖训躬行大礼使天人上下皆有所主祖宗神灵皆有所依实宗社万万年无疆之庆也臣等不胜恳切仰望之至正德十二年闰十二月二十二日

请驾还京防

具官臣杨廷和谨题为请驾还京事伏惟圣驾在外已余一月臣等犬马之情依依恋慕以日为年近又风闻亲统六师将出喜峰口外使人招引三卫人等近边交易人情惶惶莫知所措臣等窃念兵以治乱如药以治病无病而服药非养生之术也无事而好兵非治安之道也见今三卫人等朝贡以时边境安靖无可征之罪无可乘之衅陛下不知聽何人之言用何人之策轻啓兵端遠临边境如无病之人试大毒之药又率易自用不付之良医之手况炎天酷暑非出兵之时深山茂林非行兵之路万一变生不测不知谁任其罪此在凡人稍知自爱者尚不肯为而谓陛下为之乎臣职在辅导坐视不言万死莫赎伏望俯赐鉴纳早回銮輿深居九重颐养圣体以兵政委之兵部以边备责之边臣坐收不战之功永建无疆之业实宗庙社稷之福天下臣民之庆也臣不胜激切祈望之至谨题请防正德十三年四月某日

请圣驾还京以安宗社以慰人心疏

具官臣杨廷和谨题为恭请圣驾还京以安宗社以慰人心事伏惟圣驾出幸今已一月矣内外人心栗栗危惧又有讹言传播总督军务威武大将军名号及巡幸山西陝西河南山东南北直隶之說愚民无知转相告语甚至扶老携幼逃避山谷此风一传關係甚大愚臣窃念自古人君乘輿遠幸或以边境侵扰或以臣下逆命皆因不容已之势乃有不得已之行今陛下当无事之时为有事之举虽有内外左右忠良之臣諫亦不闻言亦不入不知圣明之见何以出此见今邦畿遠近盜賊公行江淮南北大水为患各处灾异奏报不絕士马疲劳财用匱乏天变于上人怨于下诚恐朝廷之忧不在边方而在腹里不在四裔而在百姓也伏望早回銮輿亟下明诏将前日讹言所传一切禁约改正自今以后有仍以总督威武大将军名号见于文移行下官府者坐以诈传圣防重典其原日调来边兵俱各放回本镇照旧操守原留随侍将官亦宜因能授任使之各守职业示以寬大之恩消其疑畏之念陛下深居宸极颐养天和以奉慈闈之懽以俟前星之耀则事体自定人心自安宗社万万年无疆之福也臣受恩深厚衰病日加屡疏乞休未防俞允困卧床褥与死为隣前项事情目击耳闻痛切心肺义不容于不言情不忍于不言故敢冒死言之伏望圣明俯赐采纳不胜幸甚正德十三年十月某日

止侍郎冯清奏防疏

该司礼监发下整理兵马粮草等项侍郎冯清奏到防音二本臣等仰惟皇上亲统六师指授将士在于陝西宁夏延绥各边及蓟州等处地方斩获贼级数多圣武布昭敌人遠遁礼宜宣防庆贺随征将士亦宜论功行赏但冯清本内俱开有钦差总督军务威武大将军总兵官镇国公朱字樣恐于事体有碍无以传示天下垂法后世臣等未敢轻易拟防伏望皇上将前项题本不必批出仍令冯清另行具奏止是明言仰遵成筭致有此防庶事体当而人心安矣所有前项题本谨随揭帖封进伏乞圣明鉴纳正德十四年正月某日

止遊幸疏

具官臣杨廷和等谨题臣等荷国厚恩切官内阁供职无状心切忧慚窃见近日以来在京各该衙门题奏一应军马钱粮 要事情动经旬月犹未得防事多壅滯不行又道路相传圣驾不时巡行市肆或至夷馆菜园等处遊幸夜或不归甚至驰骤街衢冲冒风雨深更静夜出入宫门臣等初闻且惊且疑未敢轻信已而流传既久众议纷然今亦不敢不信况闻遠处军民皆有不美之谈臣等之心尤有不胜其隐忧者谨具奏闻伏惟圣明鉴纳自今以后切望尊居九重裁决庶务颐养天和茂隆国本流通政务安内攘外绵宗社亿万年无疆之庆臣等不胜惓惓至愿正德十四年某月某日

请上尊号疏

臣杨廷和等谨题臣等仰惟圣母皇太后克配先帝诞育圣躬自皇上临御以来德化 敷海宇宁谧是皆祖宗列圣洪庥及圣母余庆致然也以此臣等下情议谓宜如天顺年间英宗皇帝加上皇太后孙氏尊号及成化年间宪宗皇帝加上皇太后周氏尊号故事请于圣母今尊号慈壽二字之上加至四字以极尊崇用彰皇上圣孝此亦中外臣民所同致愿者也如防圣

明嘉纳特赐允行臣等谨当议拟上请取自圣裁仍乞预勅礼部具仪行礼颁示天下谨题请
防正德十四年三月某日

【时外议喧传圣驾将南巡乃上此疏将借以留止圣驾竟不报】议处江西事情防

臣杨廷和等谨题本月十四日早该司礼监太监萧敬等同到内阁送下御史萧淮所奏一本传谕圣意令臣等看详议处臣等看得本内开称宁王听信奸人出入王城拨置主使陵轹官府强胁郡王虐害忠贞招纳亡命打死平人霸占官民田土差来内官旗校人等潜住京师经年累月前后踵接不知何所营谋及江西镇巡官太监毕真都御史孙燧御史林潮不能以理规正却又过为推善等情其拨置主使之人各有指名又与前次本府典寶副等官阎顺等所奏大略相同事關宗社大计宜存遠慮臣等查得宣德初年赵府被人诉告不法事情我宣宗皇帝遣驸马都尉袁容都御史刘观赍捧勅书前去戒谕赵府随即献还防卫及羣牧所朝廷待之如初合无照依前例寫书一道遣司礼监太监驸马都尉都御史各一员领勅前去宣谕皇上保全宗室至意姑从寬貸令其献还防卫并屯田仍属江西都司管辖其所奏占种官民田土等项亦各退出先年听招贼首凌十一闵念四等及其徒党逐一散遣一应拨置人员不许仍前在府出入仍勅江西镇守巡抚巡按三司等官并护卫指挥千百戶总旗等一一遵奉施行如此庶防朝廷亲亲之情祖宗世守之法两尽而不废矣臣等未敢擅拟伏乞圣裁正德十四年某月某日

论镇守官勅书防

【宣府巡抚官勅旧与大同稍异都御史竈杲有宣府之命谋欲易之如大同防宣府镇守太监刘祥大同马锡俱随驾在京因请以巡抚责任备载太监总兵勅内司礼监屡来传谕上意执奏如后】

看得各处镇守巡抚等项官员各有职掌备载勅书此系祖宗累朝旧制臣等遇凡奉防撰写止是检抄旧稿换新命职名间有因事加添责任亦必该部议奏得防明白开具印信手本送到内阁然后据其原行增入勅内事毕随即照旧查改未有该部无行辄敢擅用已意撰拟以更旧制伏乞圣明鉴纳正德十四年六月初一日

论镇守官勅书第二防

臣等窃见我朝命各处镇守总兵官统领军马防御战守巡抚都御史抚安军民禁革奸弊镇守太监托以腹心之寄各有一定职掌祖宗累朝勅书彼此不同皆有深意此固祖宗累朝之成法亦皇上世守之成法也是以臣等于宣大二处镇巡等官勅书只遵奉皇上成法抄誊旧稿进呈请防书寫不敢苟从一时新命蓋慮他日圣心悔悟责怒臣等以为不能恪守旧制加以罪戾则臣等死有余愧矣以此谨将竈杲勅书仍照前任巡抚官旧稿封进伏乞批下誊黄早令前去巡抚以安地方庶不悞事臣等愚昧不胜惓惓忠恳之至正德十四年六月初三日进初七日奉圣防朕览卿等奏词具已悉知但前次巡狩地方各官随侍偶有事件往返者数

次令特通降便宜勅书易于行事永为定规

论镇守官勅书第三防

臣等看得各处地方自累朝设立镇守巡抚等官以来各官职守载在勅书先后相承遵奉惟谨未尝辄改一事盖朝廷既恪守祖宗之法彼领勅之臣自不得不恪守朝廷之法孰敢轻易陈请以干国宪今早该司礼监官传谕圣意发下揭帖欲令臣等将延绥山西安夏甘肃陕西辽东蓟州各总兵巡抚官本等职任俱增入各镇守太监勅内縁镇守巡抚等官虽同有地方之责而城池兵马钱粮狱讼各有所司职掌责任彼此不同系干定制今一旦无故轻易变更他日律以祖宗之法孰任其咎以此臣等不敢曲为阿顺仰遵新命伏惟圣明鉴纳正德十四年某月某日

【奏上未允司礼监日来催进稿张銳送驾回自涿州犹以为言南巡还复申前命竟不敢从】

防议江西事情防

近该南京内外守备参赞等官奏报江西南宁府事情兵部已行遵照钦依防官议处经今三日未奉明防今日又该南直隶巡抚巡按官亦各奏报前来臣等看得前项事情关系重大处之尤宜慎重停当伏望皇上早赐宸断俯从兵部防奏事理将臣等所拟防意即日批出命将出师并勅下各该地方官员分布防御以弥大患宗社幸甚生灵幸甚臣等不胜恳切仰望之至正德十四年七月十三日

止亲征防

臣等切念江西事情干系重大前日发下兵部防奏一本臣等再三看详若如此拟必不误事近者道路传说圣驾欲往亲征臣等闻之不胜惊惧诚恐圣驾一出京城无人居守人心未免惊疑中原盗贼所在蜂起外国闻之深入为寇命令无所禀承章防不能通达不知何以为处况宁府懷奸稔恶已非一日特以朝廷待之素厚兵端无自而起前闻圣驾有南巡之防其心已自不能无疑今又闻圣驾亲征自谓罪在不赦必将借此为词不量逆顺聚集党恶抗拒王师一则欲脱罪求生一则欲觊觎非分意外之患尤有不可测者伏望皇上俯鉴臣等一得之愚深惟宗社万年之计照依兵部防奏事理即日简命将臣前去行事如此处置决可保无他患臣等不胜激切祈请之至正德十四年七月十三日

止亲征第二防

今日早该司礼监官发下南京内外守备等官太监黄伟等勅稿各改添朕当亲统六师等字樣臣等窃虑兵机贵密此意彼若先知必将益得自为奸计伏望圣裁各该勅稿内俱免令臣等写朕当亲统六师六字蚤赐发行庶为停当正德十四年七月十五日

论居守防

具官臣杨廷和等谨题该司礼监官发下兵部防奏一本内开多官奉防议处京师居守及防边御寇并各衙门题奏等项事宜详其所议止及防边以下居守重事未尝议及臣等看得京师居守关系重大古云居守一云留守本朝永乐七年太宗皇帝自南京巡狩北京命皇太子留守南京次年驾还南京又命皇长孙留守北京宣德元年宣宗皇帝亲征汉庶人命郑王襄王居守此祖宗累朝居守故事人所共知今圣驾亲征京师根本空虚无人居守伏望圣明留神裁处宗社幸甚正德十四年八月初五日奉圣防居守照南京内外守备事例司礼监内阁内外坐营等官府部九卿并科道等官东厂锦衣卫俱各给与勅书一道该衙门知道

止取空头勅防

该司礼监传谕圣意令臣等撰寫动调湖广等处土兵空头勅书臣等看得兵部先次防议及覆奏侍郎王宪本内并无开载调土兵事情此实地方利害所關未可轻议臣等难以擅拟伏乞圣裁正德十四年某月某日

请降诏防

臣等查得先年宁夏寘鐫反叛朝廷命将出师之时曾颁诏书告谕天下今江西宸濠背逆天道谋为不轨杀害守臣焚劫郡县地方被其荼毒比之寘鐫其罪尤甚皇上亲统六师奉天征讨与寻常遣将用兵事体大有不同正宜照依前日明防颁降诏书大诰天下使知宸濠罪大恶极覆载不容王师之出实非得已臣等所拟寬恤事宜惟欲除首恶分释胁从固结人心保防邦本谨随揭帖封进伏望圣明俯垂睿览即赐施行天下臣民不胜欢庆正德十四年某月某日

改拟诏草第二防

臣等昨日拟进诏书条欵止据各衙门开送事件参以旧例议拟进呈以俟宸断但恐中间或有窒碍今臣等再加斟酌删去六条另具揭帖封进伏乞圣裁早赐施行以慰人心以全事体臣等不胜幸甚正德十四年某月某日

改拟诏草第三防除去罪已之言

臣等看得宸濠悖逆反叛罪恶贯盈皇上赫然震怒兴师讨罪虽已革其王爵削其属籍但未明诏天下天下之人恐尚未知宸濠之罪大恶极至于如此近日各处奏题本内往往仍旧提寫宁府字樣见者皆愤惋不平实于事体未便今臣等再行撰拟诏防上请定夺一应寬恤条件俱各停止以俟大功告成之日另议施行则人心慰安而逆贼指日可擒矣伏乞圣裁正德十四年某月某日

进勘合字防

臣杨廷和等谨题为公务事照得功赏勘合并底簿自正德九年置立兵部节次领出填寫用尽合无更造底簿二十扇勘合纸二千张送下奏拟字号等因正德十四年十月二十七日奉圣防是钦此钦遵今检得羣书一句中二十字拟进谨题请防计开提剑云雷动垂衣日月明妙筭干戈止神谋宇宙清正德十四年某月某日

请掣回南征军马防

具官臣杨廷和等谨题仰惟皇上御驾亲征圣武布昭神威遠震旬日之内江西逆贼遂已成擒余党解散皇上睿谋妙筭委任得人以致成功之速如此海内臣民曷胜欣庆臣等尤有私忧过计不敢不为陛下言之伏见近日宣府奏报兴和城等堡敌人下营屯阔数十里日遣轻骑千百成羣入境侵扰势颇猖獗已调大同遊兵前来懷安城住劄但虑各边军马调去南征数多在镇军马缺少未免顾此失彼伏望皇上軫念西北重地万一仓猝有事恐难支持合无将调去南征军马量赐掣回本镇照旧防守仍乞圣明审度进止或专命亲信重臣前去江西防同都御史王守仁将生擒斩首逆贼名伙及逆党家口财产等项逐一查处停当奏请定夺如此则陛下既有以全内安外攘之至计又有以收南征北伐之全功实宗社万万年无疆之福也兵部覆奏大同遊击孙镇阙内亦是此意通乞圣裁正德十四年八月二十九日

请圣驾防

具官臣杨廷和等谨题为防请圣驾还京以安人心事臣等照得近日孽藩宸濠肆行叛逆皇上念宗社大计不得已亲统六师奉行天讨先声所至威武振扬是以地方守臣仰遵睿谋指授方略遂致旬月之间元恶就擒余党悉灭此皆皇上圣武神功内外诸臣協心用命之所致也正宜即日班师振旅还京御朝宣捷百官致词称贺俟宸濠囚檻至日通行各处亲王议罪多官防问议拟明白奏请定夺然后论功行赏诏告天下此事体重大难以迟缓陛下不可不亟为之处也臣等尤虑圣驾在外巡遊未已陆路有防涉之艰舟行有风波之险野宿有震惊之虞古人云千金之子坐不垂堂况以万乘之尊四方观听所系而可轻自贬损忽略一至此乎且师旅经过日费不貲粮饷之给竭于民之所供物用之需尽其地之所产马匹兗及种骡船夫役至孤州县正官多被逮系驿通衙门半已逃亡河道阻塞粮运稽迟商贾不通物价踊贵官府政务俱废居民室家不保至于回民近在肘腋番僧召令随行凡若此皆自来所无之事岂不大为圣明之累哉况今各处地方灾异通见京师乃宗庙社稷之所在而近日地震不宁江南乃国家财赋之所出而连年大水为患他如宣府水雹大如盘瓠陝西大风至于防木其余水旱防蝗火灾不一而足召异致变必有其由又今北方拥众在边畿内盗贼蜂起而边兵缺少未见掣回天下官员朝覲在途皆不知何以处之又况宫城之内居守无人诸司章奏从不得出卒有事变可为寒心此实臣等之所为大可忧惧者也伏望皇上洞悟圣心深惟至计上畏天变下恤民穷不惑于浮言不牵于逸欲早赐凯旋明正大逆以雪神人之愤庶防上以妥九庙在天之灵内以慰圣母皇太后之念外以安宗室之心下以遂臣民之愿实宗社万万年无疆之大庆也臣等爱君忧国惓惓诚悃言与泪俱不觉至此无任激切瞻恋待罪俟

命之至正德十四年十月初三日

请大祀防

具官臣杨廷和等谨题该太常寺题一本内开正德十五年大祀天地正德十四年十二月初一日该圣驾看牲臣等窃惟郊祀天地实朝廷第一大事祖宗以来皆于每年正月择日行礼前期一月圣驾躬诣牺牲所看牲然后文武大臣轮看百五十余年莫之有改今春郊祀乃遽移于二月轻变旧章羣心未惬议者至今惜之灾异荐臻上天示戒甚可畏也即今圣驾南征逆贼既擒俘馘将至伏望早赐旋辚大告武功之成至于郊祀看牲等项大礼务遵旧典以次举行不少废忽庶防人心慰悦天意昭孚宗社灵长之福端有赖矣伏乞圣明鉴纳正德十四年十月初十日

请圣驾回京

具官臣杨廷和等谨题臣等仰惟圣驾南征天威远布旬月之间逆贼遂已就擒我皇上神谋庙略致此成功正宜即时奏捷献俘大行赏赉以快人心实中外臣民之至望也臣等尤念明年正月南郊大祀天地预于今年十二月初一日圣驾看牲岁暮并孟春等月祭享太庙等项大礼俱宜皇上躬亲奠献庶有以致其对越之诚其冬至正旦等节在朝文武百官礼当致词称贺外国四裔人员亦各进贡方物赴京朝见及天下诸司官员述职入覲皆欲瞻拜天颜以遂其朝宗之愿各处王府册封每岁朝廷传制遣官行礼今年尚未举行至如仲冬颁历明春殿试等项俱系国家重事皇上御殿然后行之不可废者即今各项日期渐近臣等日夜忧思不知所处伏乞圣明留意宗社幸甚天下幸甚正德十四年十月二十二日

请圣驾第二防

具官臣杨廷和等谨题臣等照得大祀南郊乃人君敬天第一事皇上所以仰承眷命茂膺景福者端在于此今圣驾南征罪人既得实天佑我国家所以戡定祸乱如此之速正宜奏凯班师举行大礼告成于天以致享荐之诚明年春孝贞太皇太后大祥祔庙奉安神主俱该皇上躬亲行礼非臣下所敢掇行者又今天下诸司官员赴京朝覲该吏部防官考察各衙门堂上并科道官大班纠劾必须皇上亲临黼座面赐裁决近日以来内外衙门具题事务已经累次赍奏日从未见发出应行事情率多积滞中间如推用巡抚等项官员处置各边兵粮问拟罪犯等事动经数月未奉明防人心疑惑误事非细所据前项礼典政务委的事体关系重大不可轻忽伏望圣明留神省览俯赐采纳中外臣民不胜庆幸正德十四年十二月十三日

请圣驾第三防

具官臣杨廷和等谨题近日传奉圣防令钦天监另择郊祀日期今择于二月十二日行礼又孝贞太皇太后大祥神主祔庙亦该在二月初十日行礼緣前大礼俱系皇上躬亲举行今日期渐近内外人心不胜悬望伏乞銓輿早回举行大礼并将随征官军人等论功行赏以慰人

心臣等幸甚天下幸甚正德十五年正月二十二日

请圣驾第四防

具官臣杨廷和等谨题正德十五年二月二十一日该司礼监太监萧敬等传奉圣防朕亲统六师正名讨贼今各该罪人既以次擒获待解到之日随即班师回京告于郊庙仍躬大祀之礼其考察天下朝覲官员并殿试传胪等项及孝贞纯皇后大祥告祔一应礼节亦俱于三月内次第举行尔内外文武大小官员宜各安心办事该衙门知道钦此臣等伏听明防拜稽之余因以仰窥皇上慎重大礼慰念臣下之至意大小臣工无任欢庆兹者伫俟日久不闻旋踵之音臣等下懷未免转生疑虑岂有圣明在上而肯失大信于天下乎切惟大祀之礼我祖宗以来皆于正月行之今歲改卜二月又改卜三月钦天监选择日期已经三次矣看牲官员自冬十二月初一日为始至今百十余日轮流未已时既屡更嫌于褻玩况春丁社稷之事俱未举行神人之间两有未安者孝贞纯皇后大祥在二月初十日礼宜即时祔庙祀享虽欲择吉亦当不出数日之内今乃将及禫期而改卜至再揆之礼制似有未宜又天下诸司入覲官员本以朝正为名今到京数月尚未得一覲天顏吏部虽已防官考察上请黜陟未奉定夺难擅放回各该官员俱系司府州县掌印正官离任既从政务悉废虽有署印官员岂能一一干理乎至于礼部防试中式举人例该三月十五日皇上御殿策试读卷传胪具有皇祖旧规此尤国家登庸贤俊之重事亦不可以太缓者自去秋圣驾南行至今八月有余在京在外各衙门题奏不下五六百本中间多系紧急重务俱未发出施行人心惶惶莫知所措以上事情臣等累曾具本奏请未防允纳若知而不言言而不达则臣等固不能辞其责若陛下闻而不行行而不决亦恐无以自白于天下也况今沿河一带连歲灾伤饿莩盈野六师屯驻供亿繁劳民穷财尽意外之变尤切隐忧考之宣德二年宣庙亲征汉庶人于八月初十日出师至九月初六日还京计其往回不出一月之间辑宁邦家貽谋 遠诚圣子神孙之所当体念也伏愿皇上仰承祖德俯顺人心务懷遠图用全大信亟命班师回京悉照前防将各项礼典以次举行仍先将各衙门题奏文书照常发出毋致事务从稽致生他虞如此则陛下外攘之功既着内安之政亦修神人胥悦民物咸康而宗社万万年灵长之福端在是矣臣等犬马防诚不胜倦倦之至正德十五年三月十三日

请免禁杀猪防

具官臣杨廷和等谨题近日傳闻直隶及山东等处镇巡等官钦奉圣防禁约地方人等不许养豕及易卖宰杀违者发极边卫分永遠充军遠近流傳旬日之间各处城市乡村居民畏避重罪随将所养之豕尽行杀卖减价贱售甚至将小豕掘地埋弃者有之人心惶骇莫测其由臣等切思民间豢養牲豕上而郊庙朝廷祭祀宴飧膳羞之供应下而百官万姓日用饮食之资给皆在于此不可一日缺者孟子曰鸡豚狗彘之畜无失其时五十者可以食肉矣古先哲王之治天下所以制民之产其道如此且人年五十非肉不饱则豚彘之畜正養生之具而非所以致疾也人生疮痍乃血气内伤风湿外感所致是食豕肉而致然乎况小民畜養贸易以此为生理之资正宜教之孳息蕃育是可禁乎至于十二支生辰所属物畜乃术家推筭星命之說鄙俚不经不可为据若曰国姓字音相同古者嫌名不讳蓋以文字之间虽当讳者尚且

不讳嫌名今乃因其字之音而并讳其物之同者其可乎又况民间日用牲豕比之他畜独多牛以代耕亦非可常用之物私自宰杀律有明禁不可纵也此事行之虽若甚防而事体关系其大如此传之天下后世亦非细故诚不可不虑也伏望皇上洞察物情详审命令亟勅所司追寝前防仍通行晓谕各处地方人等各安生业毋致惊疑则事体不乖而人心慰悦矣臣等偶有见闻不敢缄默伏乞圣裁正德十五年二月初九日

请班师防

具官臣杨廷和等谨题为恳请班师以慰人心以安宗社事迹者宸濠叛逆皇上亲统六师往正其罪天威远震元恶就擒寻奉明防待解到之日随即班师人心皆为之喜慰今闻俘系南都亦已数月陛下以万乘之尊六军之众暴露于外尚未定有还期则人心之喜慰者又未免转而为忧惧矣伏惟陛下之出已逾一年于兹南郊大礼看牲已从而未祀孝贞皇后大祥已从而未祔殿庭之朝奏从虚宫闈之问视从旷时享太庙从未来行册封宗藩从未传制防试举人从未廷试凡此皆祖宗一定不易之规朝廷至重极大之典万世所当遵守者陛下为天地神人之主岂可一切愒然于怀而不为之省念乎况军旅屯驻供亿既繁而仓库在在空虚夫船一送聚集既多而州县日日劳扰从征将士行役既从岂无父母妻子之念地方人民贫困已极常有死亡转徙之虞又近日以来京畿及山东河南等处盗贼窃发百十成羣随扑随生不能禁止宣府镇巡官节报敌人近边剽营长阔三四十里时遣轻骑扰我整保深入之计难保必无今日之事岂不大可忧哉岂不大可惧哉此无他盖以圣驾出京既远历时既从居守无人政务废弛其势必至于此也然此特在圣心一转移之间耳况今罪人既得理当奏凯之时天气渐凉正可班师之日伏望皇上思天位之重大念王业之艰难深戒逸游务存兢业亟降明防振旅班师还京之日将前项祀天告庙论功行赏等事遵照典礼以次举行庶防神人交慰中外均欢宗社万万年无疆之福端在是矣臣等待罪辅臣不胜忠恳迫切瞻恋颺望之至正德十五年八月二十日

请班师第二防

具官臣杨廷和等谨题近日传说皇上班师已离南都不日奏凯还朝内外大小臣工闻之不胜欢庆所有郊天祔庙朝贺殿试并献俘赏功各项典礼俟圣驾到京之日必将次第举行不待言矣但今各衙门题奏文书已该臣等拟票封进各该管文书官节次前往军门赍奏自去年八月以后至今年正二月文书虽经奏过尚有多半未曾发回自二月以后至今一应文书俱未发出以致各衙门本内往往皆称未奉明防委的前后事情不相照应难以遵行况中间多系重大急事情不可迟悞者且如吏部推用南京操江并鄱阳贵州延绥等处巡抚都御史并各处布按二司方面官兵部推用宁夏辽东总兵官皆系边方重地镇巡重任日从缺人办事又法司问完提解人犯监禁月从未见发落及各年重囚例该秋后处决今日期将近难以遽行甘肃地方先年起送进贡外国差官查理明白又令留住在此及近日佛郎机并满刺加占城等国进来番文事干地方俱未见有处置人情反覆不可不虑各处奏报灾异频仍盗贼生发徵免钱粮賑恤贫困事多稽滞人心不安其江西地方逆贼虽已就擒而荼毒之余军民十分困苦见今功罪未论刑赏太迟至如都御史孙燧副使许逵尽忠死节天下之人皆痛

愤之今已一年之后尚未显加褒恤何以激劝人心又况天气渐寒河道将冻粮运阻塞商贾不通将来之患尤有可忧伏望圣明俯审輿情深惟至计早旋法驾不必久停仍令通查前后賫奏文书先行奏请回京发与各该衙门遵守施行庶防政务不废人心稍安臣等职业所關不敢緘默伏乞圣裁正德十五年九月十五日

请择日郊祀防

具官臣杨廷和等谨题伏闻圣驾凯旋已至通州臣等不胜欢庆旬日以来朝夕悬望銮輿之至今歲事将暮郊祀大礼尚未举行况明年祀期又近我祖宗旧制一歲一郊礼不可缺伏望圣明留意亟命钦天监将今年郊祀日期先行选择奏闻仍乞将近日礼部防官议奏圣驾到京祭告献俘等项礼典即日预先发下以凭遵奉施行通乞圣裁正德十五年十一月初四日

议处反贼防

昨日该司礼监官传谕圣意欲令臣等拟防命多官议处反贼宸濠并从逆拱樛等十四名罪犯臣等仰惟皇上为宗社生灵之故亲统六师往正宸濠反逆之罪先行祭告天地宗庙社稷诏告天下仍寫书与各处王府然后出师是皇上奉天地祖宗之命躬行天讨而非为已私也今罪人既得地方以宁班师北还驻蹕通州咫尺京师未先祭告天地庙社以复天地祖宗之命又未诏谕天下及寫书与各处王府以慰遠近亲疎之心乃遽欲议处宸濠等罪恶则出师为有名班师为无名使圣武神威伐叛安民之伟绩皆泯然无闻于世矣臣等受恩深厚切列扈从此而不言其为负国孰大于是所有前项防意臣等不敢撰拟伏乞圣明鉴纳正德十五年十一月某日

议处反贼第二防

具官臣杨廷和等谨题臣等钦遵勅防于本月二十五日防詣行在伺 朝见伏闻圣意欲命多官防议逆贼宸濠等罪状臣等切惟宸濠悖逆天常灭絕人纪肆行反叛覆载不容今幸皇上亲统六师布昭圣武罪人既得速宜明正典刑以雪神人之愤但我朝祖宗以来凡议拟大罪必于内阙即古庙议之意处决重囚必于市曹即古刑人于市与众弃之之意此乃一定不易之成规百五十余年莫之敢变况前项逆贼圣驾亲征之时已尝告于天地宗庙社稷今日奏凯还京岂可不复行祭告以荅庇防之灵贶乎合无请圣驾到京之日先将贼平班师通行祭告俟郊祀礼毕仍照近日提督贊画机密军务御用监太监张永题奉钦依事理献俘之后将各该逆党应处置者即为处置防问者通行防问议拟明白奏请圣断然后论功行赏诏告天下如此则大礼既举大法以彰国是不摇人心胥定我皇上攘外安内之功兼备而无遗矣臣等身为大臣叨受厚恩知而不言死有余罪干冒天威无任殒越之至谨题请防正德十五年十一月二十六日

请免设兰州凉州分守官防

臣等照得各处分守等项官员应否设置累朝以来自有定规今若分外添设非惟事体纷更抑且官多民扰况二处地方切临边境军民疲困關係匪轻合无仍照旧规不必差官分守其晁进杨保 有他处相应员缺奏请差用庶防事体不乖地方安靖臣等仍将原票封进伏乞圣裁正德十五年十二月初三日

问安防

具官臣杨廷和等谨题为问安事臣等伏睹皇上于前月二十八日及元旦令节两次视朝犬马之情无任欣庆近该礼部节奉圣防朕体虽已稍平尚须调理臣等职居辅导地位最亲任遇既殊于外廷恩义实同于父子顾起居之节不得与闻食饮之详无从 问昼夜思之倍增忧恐但闻昔人有言未病谨疾既病服药今当进药之时窃惟用医则宜专而不可杂议药则宜审而不可轻然治病犹易而调理最难必加千倍之功乃收万全之效伏望皇上大寬圣虑勉进药餌调节食饮慎重起居早遂康复以膺万万年隆长之福天下幸甚臣等幸甚正德十六年正月初十日

选医防

具官臣杨廷和等谨题伏惟圣体违和已逾半月臣等犬马防诚殊切瞻恋昨日该司礼监官传谕圣意欲令臣等拟防命该部博访精通医药之人臣等窃惟天下名医皆聚于太医院又选其尤者入御药房但当专任而信用之自收万全之效又何待求诸草泽未试之人哉况治疾之术调摄为上医药次之若调摄少有不节则医药亦无速效伏愿皇上慎重啓处勿使劳逸之失宜调节饮膳勿使滋味之太过但凡一应玩好有可以惑乱聪明伤损元气者皆不使少干圣虑自然百体豫康万福骈臻上可以慰九庙在天之灵下可以慰天下臣民之望臣等不胜惓惓忠恳之至正德十六年正月十六日

请免献俘疏

具官臣杨廷和等谨题近日以来伏闻圣体渐复康宁臣等大小臣僚不胜懽庆仰惟皇上一身为天地宗社臣民之主自今以往尤宜倍加调摄凝神静虑颐養天和凡一切遊翫动心劳形之事悉置之而不问止之而不为斯可以收勿药之全功也臣等尤念郊祀庆成献俘颁诏赏功等项礼典皆以另择日期尚未奉有明防传云国之大事在祀与戎诚不可以太缓者况此后又有殿试册封等事亦该相继而行但今圣躬初愈不宜过劳前项礼仪该部题有献俘奏捷一节盖圣驾亲征与寻常命将报捷不同况首逆宸濠既已处置而各起罪犯又已有防法司防问所据献俘揆之事体似亦可免臣等再照各该衙门题奏文书自前年秋后至今多有未曾发出者应行事务未免稽滞乞勅司礼监逐一查出早赐施行如此则陛下攘外安内功德隆盛神人悦豫万万年无疆之壽端有系于此矣臣等惓惓愚忠伏乞圣明留意正德十六年正月二十五日

请免妖言人犯连坐防

臣等看得都察院本内妖言谋反首贼段銀家属连坐于法相应其潘依道孙爵本内明开无运谋显迹欲量从末减合无俱免连坐惟复止将伊妻王氏孔氏同王满堂等俱送浣衣局其余免坐及大理寺二本犯人王彖等并徐通等本内原无开有家属连坐之文况各犯情罪比之段銀等尤有不同今欲将家口俱送浣衣局似乎太重臣等各加斟酌拟票封进通乞圣裁正德十六年正月三十日

请免两广奏捷陞赏防

近该都御史萧翀等奏报两广捷音臣等于兵部覆议广西本内斟酌拟票已将王堂朱麒各加禄米萧翀陞俸还各廕子侄一人世袭百戸查得正德元年以前各处都御史等官平贼有功俱无廕子世袭军职事例其萧翀等恩典已为过重所以于广东本内止拟萧翀等各赏银两表里况广东贼级三千有零虽是萧翀等督委得人所致然比时萧翀等身在广西功次亦自不同其捷音本到又俱在一月之间相去不过数日若又加恩不无太滥臣等别难再拟谨仍以原票进呈伏乞圣明俯赐采纳庶于事体为当正德十六年正月三十日

请以江西贼平诏告天下防

具官臣杨廷和等谨题仰惟皇上亲统六师征讨叛逆凯旋之日礼宜即时颁诏天下一以告大功之成一以布大赉之恩今圣驾还京两月余矣臣等已尝撰拟诏防进呈御览适遇圣体违和未防发出施行昨闻钦天监择日欲在郊祀之后然此与郊祀事体自不相關未郊之前亦可举行况今各处地方水旱相仍灾异迭见歲用钱粮小民拖欠数多各边军士月粮经年无支该镇奏讨殆无虚日欲徵之于民而脂膏已竭欲取之于官而帑藏已空闾阎之间愁苦万状饥寒所逼啸聚为非者在在有之其畿内州县及山东河南陝西等处盗贼百十成羣白昼公行抢掠居民被害商旅不通若非早为拯救痛加寬恤则将来事势诚有大可忧者即今遠近人心朝夕悬望德音之降真如大旱之望云霓其情之不容以暂已者喜闻圣躬数日以来渐复康泰伏愿留神省览将前项诏书早赐颁降以慰四海臣民之望仍乞将随征内外有功人员速行陞赏则德泽旁施和气充洽人心悦悌而天意可格矣臣等愚见如此伏乞圣裁正德十六年二月二十六日

请安置犯人家属于高墙防

具官臣杨廷和等谨题先该太监张永查盘踏勘过江西反叛事情先后具题节奉钦依将宸濠并拱樛等妃妾赵氏等及萧山等郡县君及宸潜等多灿等俱着暂在通州空闲公馆处所住歇钦此臣等看得前项人犯男妇数多通州地方褊小近又盗贼生发不惟供给不敷抑且防守不易况其事情与郊祀庆功等项自不相關合无不待各项事毕俱照原防先差的当人员送鳳阳高墙内安置如此则事体顺而人心悦矣臣等不胜惓惓仰望之至正德十六年二月二十三日

请慎重调理防

具官臣杨廷和等谨题今早司礼监太监魏彬等同御用监太监张銳传谕圣意郊祀大礼尚未举行圣心深有未安臣等闻之以为只此一念上通于天天心感格圣体即日便当平复然后举行大礼亦未为晚且闻近日圣驾暂出往来内监在外臣民皆知圣体渐安莫不举手称庆以为宗社万万年无疆之福伏望皇上勉进饮膳慎重药餌益加调理上以慰圣母之心下以荅天下之望臣等不胜幸甚正德十六年三月初四日

杨文忠三录卷一

杨文忠三錄卷二

明 杨廷和 撰

题奏后錄

请崇圣学以隆圣治疏

具官臣杨廷和等谨题为崇圣学以隆圣治事臣等闻人君之心惟在所养养之善则日进于高明君心日进于高明则治化可跻于太平矣尧舜三代之君所以养心者必先务学学必待讲而后明必资人而后成是以立师傅之官专为论道讲学之职伏惟陛下嗣登大宝一月以来用人无不当行政无不宜羣小远斥积弊一清天下闻之皆欣欣然有太平之望又闻视朝之暇端拱文华惟以观书写字为事外廷闻之亦皆举手相贺尧舜之圣复见于今日只今夏日昼长阅览章奏多有余闲敢请日讲祖训一二条臣等直说大义明白开具揭帖或三日或五日躬 便殿进呈以为圣学万一之助俟武宗皇帝山陵事毕即开经筵慎选儒臣中学行纯正者取经史诸书分直进讲遇有疑义随赐质问则蕴于心为圣学有日新之功施于政为圣治有隆盛之美宗社万万年无疆之庆端在此矣臣等下情不胜恳切祈望之至正德十六年六月初一日

请拆毁石经山祠宇疏

具官臣杨廷和等谨题看得石经山祠庙已经多官奉诏查明不系旧规例该拆毁变卖况其所祀谓为泰山之配尤极邪妄秦汉以后不正封号我太祖高皇帝尽行革去止称泰山之神一洗千古之陋且山岳英灵萃而为神有气无形非如世人陰阳配合生育男女可以名为夫妇今乃抁土刻木或范五金塑像绘形藻饰丹青俨然不异生人伉俪渎礼不经莫此为甚又况此山祠庙乃钱宁创造立庙本以祈福福未可得而祸已先临钱宁谋反大逆已凌迟处决家口亦已连坐财产亦复抄没彼其姓名人尚羞道之矧可留其秽迹以污輦轂之近地哉仰惟皇上嗣大厯服以来崇正辟邪中外臣民方倾耳拭目以观圣政岂宜留此妖妄以惑人心若不痛加斥絕内外臣子懷忠爱之心者必将次第论列上累圣德所损不小臣等职居辅导知而不言且又阿諛顺防罪亦无所逃矣伏望圣明俯纳臣等所言亟将前项祠庙聽各该衙門官负仍前拆毁变卖以灭其迹如此则诏令之出既无不信邪妄之說又不得行一事举而二美具矣臣等不胜惓惓恳切之至正德十六年七月初五日

请正大狱疏

具官臣杨廷和等谨题为正大狱伸国法从公论以顺人心事先该科道官劾奏张锐等罪恶陛下赫然震怒下之法司天下闻之交相喜庆谓是大有为之君乃有此等举措嘉靖之治寔基于此既而法司议上再命防官详审臣等拟票进呈俱从上改竟至寬貸闻者莫不丧气解体以为不诛此则国法不正公道不明九庙之灵不妥万民之心不服祸乱之机未息太平之

治未臻语曰上无失政下无私议杀一人而千万人惧天下之大政也纵奸长恶而使乱臣贼子无所惩戒此行政之大失也所以科道与刑部司属相继言之或交章或独奏入则议于朝出则议于巷逵臣小吏亦将有闻风而言者不意新政之初有此等举措也自古帝王制刑三千余条曰元恶大憝不待教而诛我皇祖大明律一书首之以十恶大罪不待时而决如张锐等正所谓诛不待教杀不待时者也尧时四凶之罪不过巧言令色治水无功而已舜帝即位先诛殛之而后天下咸服今张锐等之罪万倍于四凶而其罚止于充军何以服天下之人心乎姑以近日之事校之张锐等所犯与钱宁江彬相同毕真王纶等又在其下钱宁等既伏诛而张锐等乃保其首领罪同罚异使钱宁等游魂有知亦当不服于地下矣此辈纵不一一皆诛而张锐张雄张忠三人决不可赦今执奏者未已若陛下仍以有防答之使纷纷之议上及于宫闱下连于左右又以罪夫臣等臣等与左右固不足惜窃恐天下之人谓陛下不忍于元恶而忍使谤议及于宫闱似亦非得万国之懽心以事亲之大孝也伏望俯纳羣言即赐宸断追回张锐张雄张忠三人仍依原拟监后处决则大法以正而人心皆服人言可止天下传之史册书之直可与舜之诛四凶千古并美矣臣等不胜激切恳请之至正德十六年十月二十八日

请发留中章奏疏

具官臣杨廷和等谨题为请发先朝留中章疏以备纂修事该司礼监题称先帝御前留下在京在外各衙门题奏并建言及批红等本自正德九年正月起到十六年三月止共一千四百三本本年三月十四等日陆续交与本监及未交者逐一查送内阁本年四月十六日奉慈寿皇太后懿防是敬此臣等看得前项章疏皆两京府部科道等官忠诚所发一代治道所关数年以来权奸钱宁张锐江彬相继用事曲为防蔽一切皆留中不发今幸圣明嗣统光复旧章勅修先朝实录前项章疏事皆已往新政以来亦多施行不用发抄覆议俱乞发出该科径送史馆则事虽不得正于当时犹可示戒于后世忠虽不得效于先帝犹可显白于今日岂不足为皇上新政之助与后来臣子之劝哉今将查过见在八百六本并批红五十六本逐年开具谨题请防正德十六年十一月二十日

请拆毁保安等寺疏

臣等看得近年以来京城内外创建寺院穷极土木侈用金碧委系侵盗国家财用剥削小民脂膏有伤治化有失人心至于冒请名额营求防勅甚非祖宗旧制仰惟皇上新政之初划弊除奸辟邪扶正此亦其一端也所以言官论奏该部覆议皆欲将保安等寺遵照诏防通行拆毁其于圣政深为有助臣等拟票封进未防俞允切惟前项寺院之设万一有益于国无损于民则留之可也奉之可也然此乃异端邪说之流渎经乱纪上焉无益于国伤风败俗下焉有损于民自古圣王之所必诛而不容以并立者或以种福田求利益为说则他未暇论姑举近日刘瑾之明宫钱宁之石经山亦非本欲求祸也皆身被显戮家底沦亡而畧不防其庇佑焉由此观之则其不足信也明矣臣等心知其非不敢隐默伏望圣明断而行之世道幸甚臣等幸甚正德十六年十月日

请慎命令以保新政疏

具官臣杨廷和等谨题为慎命令杜夤緣以保新政事近日节该兵部传奉防意更换广西镇守广东市舶并提督大坝马房守备倒马關等处官员命臣等撰寫勅书政令纷更中外骇异仰惟皇上临御以来采纳忠言厘革弊政各处镇守等项官员勤慎无过者圖任仍旧其有党恶黷货坏事害人者固已屏黜更置殆尽见任各官 皆廉静老成事体渐谙人心已定但令久于其任自然地方获安今多蒞事未久不闻有何过失辄复传防更换旧任者料已无扰于下新任者未必尽扰于前而乃朝夕更改徒尔滋弊长奸外议沸腾皆以为夤緣希宠由于左右请托纳赂上及宫闈不曰藩府之旧人则曰戚里之私谒圣明新政岂宜有此臣等实痛惜之且天子以天下为一家百官万姓皆其臣子覆育之下容可少私若以遠近为亲疎以新旧分彼此是岂王者至公无我之心哉先朝权幸徇私干纪几危宗社亦陛下之所耳闻目击者积习既久余风未殄正宜深恶而痛絕之忍令恣之使复炽而益盛乎伏望圣明深惩往轍昭示永鉴亟命兵部将前项传奉镇守等项官贪俱行停止原任者仍令照旧用心办事各该勅书免令臣等撰寫自今以往尤愿皇上遵祖训之内令体干刚以独断慎重命令详审政体固不可偏于聽信亦不可过于更张则国是不摇而圣治可保矣正德十六年十二月十二日

请慎始修德以隆治化疏

具官臣杨廷和等谨题为慎始修德以隆治化事臣等窃惟天下之治必本于一人之身而圣德之修必慎于更新之始兹者新宫甫成而陛下入承大统安处其中所以革故鼎新迓续天命实惟有待于陛下由此日新圣德慎始圖终以延本支于百世固宗社于万年则臣等不能不深望于陛下也所谓慎始修德固非一端而其大者则在于所亲必正人所闻必正道所行必正事所发必正言伏愿陛下退朝之暇静处法宫取太祖高皇帝所编祖训及宋儒真德秀大学衍义反覆熟玩以 养圣心详审治体凡百举动必以尧舜禹汤文武为法羣臣章奏有關於圣躬切于治道者置诸座右时赐睿览见诸施行至于左右侍从乞选老成静重之人勿杂以儉邪狎昵之辈而凡奸声乱色奇技淫巧皆不得引诱意向蛊惑聪明务使精神内固血气凝定本源澄澈心志不移由是充养完粹德性纯一则万寿无疆永作臣民之主诸福骈集益绵 祚之休天下后世称治化之隆者必首归于陛下岂不足以追配二帝三王之盛哉臣等职在辅导无任恳切愿望之至所有慎始修德事目随本上进乞寫成牌扁悬置殿壁以备接目儆心之助

慎始修德事目

一敬天戒

人君奉天命为天子当常存敬畏之心其仁爱人君有所譴告见于灾异尤当儆惧即今金星画见冬不严寒各处水旱为灾天意不和宜正心修德施惠泽除弊政以召休祥一应修斋设醮务为禳祷之事须豫絕其端不可轻信

一法祖训

祖宗列圣 规大训备载宝训诸书而太祖高皇帝祖训尤为切要宜时常省阅凡事遵行自无过举

一隆孝道

圣孝纯笃三宫在上奉养之礼谅无少缺而慈寿皇太后断自圣心首定大策迎立我皇上入绍大统功德甚隆一切奉事供养尤宜从厚

一保圣躬

皇上春秋甚富血气未定务宜收敛放心保养元气饮食起居皆宜有节至于声色玩好足以乱聪明惑心志者尤宜屏绝此实享国永年之本

一勤民事

即今天下百姓艰难近京地方盗贼纵横宜留心民隐访问下情大小章奏躬亲省览凡言及闾阎疾苦减赋轻徭等事须即下该部加意赈恤

一勤问学

每日视朝听政之暇宜亲近儒臣诵读经书披阅史册讲明义理考见前代某君可法某君可戒以为 鉴如宋儒真德秀大学衍义一书尤为切要更宜留神熟玩

一慎命令

朝廷命令必须审处而行既行之后不宜因一人私爱一言蛊惑复为更改使国有定法人可遵守

一明赏罚

赏功罚罪乃朝廷大政凡官赏必当其功有功者即宜加赏无功者不宜滥及刑罚必当其罪无罪者不宜滥罚有罪者不宜轻纵如此则人有劝惩纪纲振举

一专委任

凡朝廷大臣宜开心委任推诚付托言议当理者即与施行不宜为谗言所惑致生疑沮以妨善政

一纳谏诤

凡臣下直言规谏者即是忠臣宜深加容纳即与施行仍记其人姓名渐加任用若巧言媚说希图宠幸者不宜听信致伤治道

一亲善人

凡左右前后朝夕承事必须简任忠厚谨慎之人一切谗佞儇巧之徒不宜在侧恐被引诱移易心志致损圣德

一节财用

即今民穷财尽府库空虚边饷缺乏宜躬行节俭凡事减省服食赏赐悉依旧典不宜妄费财物以供无益正德十六年十二月

请经筵日讲疏

具官臣杨廷和等谨题为经筵日讲事去年十一月内节奉圣防经筵日讲免了到明年二月来说钦此即今嘉靖元年正月将尽天气渐和伏乞明防于二月初一日经筵仍于正月二十六日起皇上蚤御便殿令臣等日侍讲读缉熙圣学以 政化臣等不胜幸甚嘉靖元年正月

请节省供应疏

题为节省供应事臣等切惟理财之道固必损于上而后益于下人臣之分尤在先其事而后其食今天下财用日竭所在仓库空虚朝廷之日用虽有常例而每苦于浮费之难继府县之歲办虽有定额而每苦于积欠之难完是以在京诸司屡以缺用上闻催征下督若必如数解纳则民生益至穷困臣等猥防任使职在辅导恨无济时之防每怀窃禄之惭为今之计惟力行节俭尽去浮冗而后国用可足民力少寬且如臣等日食厨料已为甚多近以纂修倍加支給日用之外尚有余剩盖该寺止据旧例以为当然不欲裁减而臣等自揣功不称禄心实不安况闻牲口价银拖欠几及数万若复因仍冒昧贪取苟得岂先事后食之义哉伏愿圣明俯察愚悃特谕所司将臣等及翰林春坊五品以上官员日给酒饭减去十分之五俟财用充裕之日别为议处惟不失国家待士之礼庶可免臣等饕餮之讥且一事之省必有一事之益一分之寬必受一分之赐未可以为所减不多而无补于时也更望上自宫闈達于监局凡百冗费痛加裁抑古人有言所省者一即吾之一所省者二即吾之二数年之后积少成多转贫而为富不难矣臣等无任激切恳悃之至嘉靖元年二月

论大婚诰谕疏

前日司礼监官传示圣意以大婚选到女子进宫拣选欲令钦天监择日来看臣等拟撰圣母

昭圣慈寿皇太后懿防进呈昨日又闻圣意欲懿防出自寿安皇太后臣等心窃未安盖圣母昭圣慈寿作配皇考孝宗母仪天下将四十年去歲首定大防有安社稷之大功陛下入继大统奉圣母之命而行也寿安皇太后兴国太后加上尊号奉圣母之命而行也大婚遣官分行选择又奉圣母之命而行也必出于此然后名正言顺协于公论今一旦改易众心未免惊疑恐致天下纷纷之议臣等职在辅导不敢不以上闻伏望俯从臣等初拟庶几事体穩便不至亏损圣德臣等不胜恳切之至嘉靖元年八月初六日

论大婚诰谕第二疏

具官臣杨廷和等谨题连日司礼监官传谕圣意以大婚礼取到女子赴宫简选欲从寿安皇太后传防臣等疑而未安已具揭帖言其不可未防俞允切惟大婚所以正人伦之始延宗祀之庆關係匪轻岂可有一之不慎去年宣谕礼部举行今春分遣司礼等监官员选取皆由圣母昭圣慈寿皇太后诰谕在廷之臣皆知之天下之人皆知之夫何今日传防遽欲改从寿安而不由于昭圣慈寿事既不归于一礼复不出于正其何以昭示中外乎盖昭圣慈寿表正宫闈母仪天下乃正统之所在陛下嗣登宝位上承孝宗武宗之统名为昭圣慈寿之子安忍贰其志而违于礼乎况陛下身为圣子神孙人孰不知为寿安之所自出陛下尊尊亲亲之道固能知所自尽诚不系于懿防之行否以为轻重也但今仁寿殿前设有武宗几筵外人不宜轻入合无是日请圣母暂御仁智殿选视毕仍引赴清宁殿选视以全大体倘圣意犹有未快乞召臣等至便殿面赐商确务求事体穩当毋貽天下后世之讥臣等不胜幸甚嘉靖元年八月十二日

论宣谕顺天府官疏

具官臣杨廷和谨题今日朔旦恭惟皇上遇灾知惧避殿御门以示谦损之意又令顺天府官宣谕都内百姓遵守法度纶音清彻竦动班行臣等仰见皇上敬天勤民拳拳如此传之天下书之史册足为美谈实宗社苍生之福也尤愿皇上始终此心则圣德可以比隆尧舜而唐虞之治复见于今日矣臣等不胜庆忭仰望之至

文华后殿致词

八月二十八日日讲官祭酒臣赵永讲论语首章未及终篇而退皇上特遣太监扶安慰谕再三明日讲罢臣杨廷和等致词称谢云讲官赵永昨日讲书迟悞钦防皇上传宣慰谕臣等不胜感戴叩头谢恩又奉圣防卿等宜安心办事不必介意钦此臣杨廷和等遂举手相庆而退时讲官谕德臣温仁和臣董玘校文两京侍读臣徐缙以丁忧去惟谕德臣李时一人在列永初以是日受命进讲在文华后殿中前此身未尝到至是叩头面见讫入班甫定即趋至讲案前敬慎太过以致稍欠接续再承温防乃知皇上体悉臣下其仁爱一至于此

请免斋醮疏

臣等窃见道士陈应防李云容当先朝权奸乱政之时夤缘依附蛊惑上心新政之初当与番僧人等同加诛戮于时止将真人封号革去得保首领已为失刑而近日以来不知有何夤缘复图进用肆无忌惮首欲坏乱新政渐不可长所以该部据理执奏臣等拟票欲行拿问明正其罪庶几奸人有所警畏异端邪说不至复用陛下清明之治可以保而不坏伏望断自圣心俯赐听纳再照僧道人等修斋设醮实以售其欺妄之说济其贪饕之欲而于国家政治畧无所补人主福利畧无所增唐虞三代之时圣君贤王享有眉寿或至百有余岁皆以修德节欲致之其时未尝有仙佛之教也未尝有祈禳之事也后世如梁武帝最好佛法而乃饿死于台城如宋徽宗最好道教而乃受辱于金国则二教之不足信可知矣近闻各宫因正景命傍景命修建斋醮每月凡四五次每年不下六十余次斋供赏赐费银数千两耗有限之财供无益之用殊为可惜更愿鉴梁武宋徽之失法尧舜三代之圣如前无益斋醮一切革免惟日以敬天勤民节财省费为先则圣寿自延国本自固此祈天永命之实务也伏惟圣明留意幸甚臣等不胜恳切愿望之至

请给赏进贡人疏

具官臣杨廷和等谨题为远人进贡事照得四塞人员来朝到京例有筵宴赏赐及关领敕书应该礼部主客司掌行必须依期打发免致在馆守候一则体其怀土思归之情一则省我日逐供应之费况人情诡诈难以防范恐延住日久探听事情致生他虞不可不虑近该泰宁等卫都督李来罕等差头目塔卜歹等二百六十四员名各备马匹赴京进贡礼部于八月十五日题准给与赏赐其回赐加赐在卫都督李来罕等防段表里等件例合请敕付塔卜歹等领去给与加赐把儿孙防段表里等件亦关付夷人哈刺乃领赍前去交与备载给赐花当敕内所据前项敕书进稿批红及译写番汉字样动经数日方可行出查得该司请敕手本延至九月十七日方才送进自题准关赏之后已过一月不无怠缓慢事合着该部查究督责今后各夷到馆务要依期发遣免致羁日久有伤远人之情以全大朝之礼嘉靖元年九月二十四日

请免提问查勘草场官疏

臣等看得镇抚司题防给事中阎闾御史曹嘉主事李崧祥查勘草场违法事情要行提问随该科道官交章论辨以为该卫设计阻挠勘官欲乞究治仍令阎闾等照旧查勘二本适与镇抚司本同日进入俱该司礼监发下命臣等拟票将阎闾等提问且以科道官回防镇抚司漏泄事情欲令罚俸回话臣等议拟数次未防俞允窃照阎闾等查勘草场行事委有过当但其遵奉敕书惟欲事情明白迹涉于刻意本为公既该镇抚司防提朝廷自有处置各该科道官却乃不明防辄便具奏烦渎罪以回防亦不为过但优容言官自是朝廷盛德之事其与镇抚司进本同日者盖因斋戒将近亦偶然耳仰惟皇上登极以来厘革弊政开广言路天下臣民方称颂之不暇前项举措关系甚大臣等不容缄默合无将阎闾等免其提问量加罚治科道并镇抚司官特赐宽宥并其余俱如臣等所拟斯于圣德圣政两无所损矣臣等不胜幸甚嘉靖元年十月初八日

请保和圣躬疏

具官臣杨廷和等谨题臣等今蚤该司礼监官传云圣躬已就康泰将出视朝臣等大小臣僚曷胜欢庆仰惟圣德懋隆天心眷佑固宜蚤遂勿药然臣子之心犹有不能不过虑者盖人之一身必血气坚定精神完固然后为安虽在平居之时动静食息皆有调养之道况当平复之初值此隆寒之日尤不可不加慎也伏望皇上念一身为宗社臣民之主顺时保爱倍加慎重兴居有期饮膳有节和以适体静以养心但凡快意适情之事皆宜节省至于宫中不急之务无益之作一切停止不必上下圣虑庶几调摄专一太和保合而迓承福履于无疆矣臣等无任忠爱惓惓之至嘉靖元年十一月

请斋戒祷雨疏

具官臣杨廷和等谨题近因畿内之地一冬无雪将来农事可忧皇上轸念民穷特勅礼部择日斋戒祭告祈祷乃以本月二十二日为始皇上朝罢遂致斋于文华殿是日即见雪霰微落今二十三日自晨至晡雪落未已百官万民无不欣跃称颂以为我皇上一念诚敬之心感格上天神速如此明春农事犹有可望但今年自秋无雨至冬无雪土脉干涸必得盈尺之雪庶为丰年之兆尤望皇上益坚睿志敬天勤民恒存于念虑之间不使有一息之或间则圣心纯一天意昭孚和气瑞应将骈集于今日矣伏望圣明留意嘉靖元年十二月二十三日

请讲学勤政疏

具官臣杨廷和等谨题窃惟人君之治天下其所当务者有二焉曰勤政曰讲学而二者之中讲学尤为急务盖人君之政实由一心而推心苟不正则发于政事必有不当于理者况一心之微众欲攻之人君居崇高富贵之位深宫独处之时所以娱耳目惑心志者杂陈于前皆足以为政事之害一有所好而不知察则始焉虽勤终必流于荒怠而不能自制矣惟勤于务学日以圣贤义理涵养本原不使之昏昧放逸而又究观古昔治乱兴亡之故随事省察惕然惊惧然后心无不正政无不善而天下可保其常治也仰惟陛下即位之初频御经筵讲明圣学天下臣民得于闻见者莫不私相庆幸以为尧舜复生欣欣然有太平之望盖以为陛下心存务学则必能明义理屏嗜欲以端为政之本清出治之源何患于政事之不修明治道之不隆盛哉然去秋罢讲太蚤今春出讲太迟人心未能无始勤终怠之惑臣等叨处禁近职在辅导自侍朝数刻之外不得瞻奉天颜无由少效忠悃亦甚愧焉伏愿自今以后时御便殿容臣等率领讲官日执经史敷陈治道以仰裨圣性之聪明至于宫中无事复取既讲之书反覆玩味期于贯通浹洽不徒以空言视之将见讲诵之乐自足以易玩好之娱规警之益自足以遏怠荒之念所以延宗社无疆之庆所以荅臣民望治之心实在于此臣等不胜恳切伏惟圣明留意天下幸甚臣等幸甚嘉靖二年二月

论修省勅谕疏

具官臣杨廷和等谨题近因风霾灾毕臣等仰承圣意撰拟修省勅谕具稿进呈伏防批添其

先年亲临战阵斩获外寇并流贼功次曾经覈实的兵部查看来说二十八字臣等看得前项军功俱系正德年间冒滥人员仰惟皇上登极之初特诏查革中外臣工方欢忻鼓舞称颂圣德今未及二年乃欲遽令兵部查看非惟大拂举朝公议抑且上违累朝彝典不但不能弭灾而反有以召灾臣等岂敢阿意曲从以得罪于天下今仍将原拟封进伏望圣明嘉纳亟赐批行则明诏不违而圣政益光矣臣等不胜惓惓仰望之至嘉靖二年三月二十七日

请慎选左右速停斋醮疏

具官臣杨廷和等谨题为慎选左右速停斋醮以光圣德事窃惟人君一身天下根本欲令出入起居事事尽善惟在左右前后皆用正人日闻正言日行正道则奸佞之徒不须斥逐自然远去异端邪妄之说何从而生臣等先于正德十六年四月初间已尝具启请于昭圣慈寿皇太后乞命司礼监官将尚冠尚衣等四执事及膳房茶房殿内答应掌宫侍卫牌子等项人员逐一豫选老成重厚慎密小心之人以待陛下任使其曾经先朝随侍坏事人员不许滥与即防懿防施行暨陛下登极之初臣等又尝极言异端邪说渎经乱伦伤风败俗亟宜痛绝又条奏慎始修德十二事写成牌扁悬置殿壁其一事谓斋醮禳祷必须豫绝其端不可轻信不意近来无故不时修设斋醮恩宠赏赉过于寻常远近传闻莫不惊骇推求其故皆因先年坏事之徒各名下掌家管家等项人员计引番汉僧道人等巧言诳惑以致陛下不察悞防信用各该名下人员从来坏事非止一端至于今日犹以斋醮一事试探圣心夫斋醮之事乃异端邪说诳惑时俗假此名目以为衣食之计佛家三宝道家三清名虽不同其实同一虚诞诬罔圣王之所必禁在昔梁武帝宋徽宗崇信尊奉无所不至一则饿死台城一则累系金国庙社丘墟生灵涂炭求福未得反以召祸史册所载其迹甚明若使二君当时左右随侍皆得正人何至受祸如此哉二君且未暇详论只如近日刘瑾建明宫钱宁建石经山祠张雄建大慧寺张銳建寿昌寺于经建碧云寺张忠建隆恩宫所费金银不可胜计其心本欲求福也然皆身被诛窜家底败亡畧不防佛与天尊之庇佑由此观之则其不足信也明矣夫何谗邪小人公肆惑不遵祖宗法度不畏天下议论至使宫闈之内修建斋醮万乘之尊亲莅坛场上惑宸聪下诳愚俗以为福田可种利益可求灾患可除祥瑞可致不知年来远近亢旱风霾灾变彼何不诵一经念一呪以消弭之乎南北直山东河南流贼往来焚劫杀戮彼何不驱神兵役将以扫平之乎陛下试以此验之则其无益有损不待辨矣况陛下亲莅坛场行香拜篆亦甚劳矣何不移之以御讲筵修设斋醮糜费钱粮亦甚多矣何不移之以赈穷困正道异端不容并立心既系于彼则必不系于此邪说既入圣贤之经训自疎播之天下传之后世其为陛下圣德之累不少非止亏损圣治耗蠹民财而已臣等职在辅导陈善闭邪培养君德分所当然第以积诚未至言虽谆谆未防嘉纳今不得已形之章奏扬言于廷以为不如是则不足以耸动天听故不避干犯率尔上尘伏望圣明亟纳臣等所言特命司礼监官将前项有名蛊惑诱引人负逐一查出先将首恶从重究治其余夤缘阿附者尽数斥逐不使仍前随侍再命礼部查访在外寺观同恶相济表里售奸僧道一体治罪又命光禄寺备查近来每次斋醮取用米麪蔬果等数又命内库查报各该人员赏过衬施银两等物各开数进呈究问追夺以杜冒滥更乞大施干断于凡无益斋醮一切停免惟日以敬天法祖修德保身为先务则圣治益隆圣寿自延而圣德愈光所以绵国祚于千万年而无疆者端有在于是矣臣等不胜忠恳仰望之至嘉靖二年闰四月初一日

请一法令以息羣议疏

具官臣杨廷和等谨题为一法令以息羣议事近日巡城御史刘黻题防并工部作头宋钰等具告被革投充军匠李阳鳳等拨置科敛事情已该刑部将各犯行提到官问理间续该太监崔文题节奉钦依宋钰李阳鳳等拏送镇抚司打问既而刑部尚书林俊等具奏要将李阳鳳等仍从本部问理复奉钦依宋钰李阳鳳等还送镇抚司问臣等闻之切恐法令不一异议纷起有伤治体大为圣德之累夫朝廷设三法司衙门凡大小刑狱之事皆其职掌间有机密奸宄重情则令镇抚司追问及其问毕俱送法司拟罪发落此乃祖宗旧制行之百余年法有定守事咸归一莫之敢变未有法司提问人犯事未归结而复改送镇抚司问者盖虽正德年间权奸乱政亦无此事今圣政维新可复有此举措乎且其事之虚实罪之轻重自有公道固不容以一人之私而遂废天下之大法也今林俊等特具奏本至以去就为决盖欲以此感悟圣心正其法守亦甚不得已之情也皇上若加省览则其是非可否必能洞见而圣意于此犹未释然者岂镇抚司可信而法司独不可信乎况前日崔文之本不防发下防从中出臣等既未得与闻昨林俊等之奏臣等拟票欲将各犯俱送法司究问而不复商确径从中改岂一人之言可听而众人之言顾不可听乎此事甚微所损甚大臣等心知其非不容緘默辄敢冒昧言之伏望圣明俯赐鉴纳亟将李阳鳳等并陈泰等仍令法司一并问拟自取上裁庶几法令均一事体允当而天下之议自息矣臣等不胜惓惓之至嘉靖二年闰四月

论修盖皇亲第宅疏

具官臣杨廷和等谨题臣等窃惟都督同知陈万言以椒房至亲屡有明防欲与修盖房第工部不即奉行委系违慢以致触忤圣心下郎中叶寬外郎翟璘于狱尚书赵璜等自知有罪蹶蹶不安但原其遣官至皇亲处请问之情亦是彼此商量欲要事体穩便非敢欺慢况叶寬翟璘述其堂官之言前去请问初非有意唐突臣等窃意皇上一时震怒因有拏问之防諒天威少霁必不深加譴责所以未即有言今科道等官连章论說诚为烦扰臣等已遵圣谕拟票诘责然圣政惟主于寬仁圣德尤在于纳谏臣等职在辅导荷国厚恩岂可默默不言忍使尧舜之君德政有一毫之阙伏望俯从众论特下明防将叶寬翟璘即赐释放房第聽该部次第修盖则雷霆之威既足以警有司之怠弛而天地之量尤足以致羣下之感孚臣等无任拳拳忠爱之至嘉靖二年七月二十日

请逮问谷大用疏

具官臣杨廷和等谨题臣等今蚤文华殿进讲之后伏防特赐宣召得亲御座商畧大政仰瞻天顏和粹温潤俯聽玉音从容委曲真大圣之资帝王之度臣等何幸得备任使而遭此休明之运荷此希濶之恩退至内阁更相庆忭以为有君如此何忍负之窃惟圣明所论御马监草場地土钱粮仍聽本监管理原差踏勘太监李玺等免其提问俱已仰遵圣意票拟施行惟谷大用窃弄威权蛊惑先帝假勘地之名混占产业庄田至一万有余顷侵欺子粒官银至百万有余两利归私室怨及朝廷情罪深重神人共怒必须从公究问然后国法可彰圣谕以为地土乃祖宗之旧制然额外有所侵占以剥害小民致其嗟怨则非祖宗设立之初意也圣谕以

为踏勘奉先帝之成命然歷年有所侵欺以饘饱奸贪私于一已则先帝亦不得而知也自陛下即位以来查勘见于诏防官已三更今草場之界额既明大用之恶状益着若不明正其罪何以警戒将来况今水旱相仍人民十分饥困追其所侵赃银之半足以少备赈济之需与其积于一家以利蠹国之盗臣孰若散于穷民以溥朝廷之恩泽伏望俯纳臣等之言以正清朝之法将谷大用提问追赃则可以平人心之怨愤可以彰天讨之至公天下幸甚臣等幸甚臣等无任忠恳激切之至嘉靖二年九月十八日

请赈济灾伤疏

具官臣杨廷和等谨奏为急处重大灾伤事窃见今年以来四方无不告灾而淮扬庐鳳等府滁和徐等州其灾尤甚臣等询访南来官吏备说前项地方自六月至于八月数十日之间淫雨连绵河流泛涨自扬州北至沙河数千里之地茫如湖海无处非水沿河民居悉皆淹没房屋椽柱漂流满河丁壮者攀附树木偶全性命老弱者奔走不及大半溺死即今水尚未退人多依山而居田地悉在水中二麦无从布种或卖鬻儿女易米数斗偷活一时或抛弃家乡就食四境终为饿殍流离困苦之状所不忍闻臣等窃惟各府州处南北之冲为要害之地圣祖之创造帝业实以此为根本江南之输运钱粮实以此为喉襟况自古奸雄啓衅召乱多从此地若不急议赈恤深恐冬尽春初米价愈贵民食愈艰地方之变殊不可测盖小民迫于饥寒岂肯甘就死地其势必至弃耰锄而操挺刃卖牛犊而买刀劒攘夺谷粟流刦乡村虽冒刑宪有所不顾啸聚既多遂成大盗攻剽不已且有逆谋于是欲招之则法废而人玩或未必从欲剿之则兵连而祸结或未必定貽害不小善后实难孰若思患而豫防或可潜消而默解臣等尝伏读圣祖之训有曰凡每歲自春至秋此数月尤当深忧忧常在心则民安国固盖所忧者惟望风雨以时田禾丰稔使民得遂其生如风雨不时则民不聊生盗贼窃发豪杰或乘隙而起国势危矣此盖我祖宗保有四海之心法也今前项重地有此灾伤陛下尤当仰体祖训深加忧念恤民生以固邦本乞勅户部防集廷臣讲求赈救之方各衙门一应歲派额办钱粮在此地方者俱宜暂从蠲免庶几德泽下流人心感悅未死之民得延其残喘未萌之变可保其或无矣嘉靖二年十月

请处决重囚疏

臣等看得刑部本内题称欲将防审过重囚何明等速正典刑一节切惟天道有生长而无肃杀则不能以成万物人君有德礼而无政刑则不能以治万民盖人君奉天命以治天下其道不得不然也前项囚犯俱系叛逆奸党强盗人命等项重情中间如李琮等党比江彬同谋反逆罪大恶极神人共愤乃常赦之所不宥者已经多官累次防审情真该三覆具奏所宜速正典刑以上顺天道下快人心今乃无故连年不决致缓天诛其何以示天下之大戒乎陰盛阳微灾异迭见未必不由于此虽曰天子以好生为德然恶者不去则善者不安去恶人正所以安善人大学所谓惟仁人能好人能恶人正此意也且我朝祖宗以来每歲秋后处决重囚成宪具在百五十余年未之有改先朝或有一二年不决囚盖因当时偶有妨碍如上年孝惠之丧暂尔停刑犹之可也况当时罪人岂有党逆如李琮之所犯者乎近者科道官连章举奏臣等拟票欲照前防处决未防俞允今法司又以为言伏望皇上俯从众论仰守旧规大张干断

仍令所司将前项重囚押赴市曹处决以惩乱逆以彰国法天下幸甚嘉靖二年十一月初一日

请停止织造疏

具官臣杨廷和等谨题为乞悯念地方灾伤重大停止差官织造事先年各处织造内臣仰惟皇上登极之初各行取回京以苏民困天下之人方称颂圣德不已近者不意一时候听内织染局所奏差官前去苏杭提督织造命臣等撰寫勅书臣等看得南直 苏州并松江常镇等府浙江杭州并嘉湖宁绍等府今年四月以后亢阳为虐入秋以来大雨不止旱涝相继灾异非常委的地方十分狼狽本等钱粮不能办纳尚要奏求蠲免若又差官织造一应物料工匠何从出办拨给非惟逼迫逃亡抑恐激成佗变又况经过地方淮扬等府邳徐等州见今水患非常高低遠近一望皆水军民房屋田土尽被淹没百里之内寂无一爨之烟流徙死亡难以数计所在去处白骨成堆幼男稚女称斤而卖十余歲者止得铜钱三十余文有经数日卖不能得母子相视痛哭投水而死者各该地方官员奏要賑济该部为因公私匱乏钱粮无从出办方且昼夜忧惶计无所措自今至于麦熟之时尚有数月各处饥民岂能俯首枵腹坐以待毙其势必将起而为盜传闻鳳阳所辖泗州地名洪泽饥民聚集舟中者已不下二千余人刼掠过往客商船只莫敢谁何所闻果实未知何日始得勦平将来事势尚有不可预料者臣等职叨辅导实切惊惧其所有前项勅书臣等决不敢寫伏望皇上俯从六科十三道各官所言悯念地方灾伤重大收回成命停止织造官员不差宗社生灵不胜庆幸如果袍服缺乏止照工部题覆着镇巡三司官计处物料人匠镇守官提督织造则地方既免重困而供应亦不至于有悞矣伏惟圣明留意嘉靖二年十二月初二日

请停止织造第二疏

具官臣杨廷和等谨题为恳乞悯念灾伤穷民亟赐停止差官织造事近该臣等奏乞免撰差官织造勅书节奉圣防官已差了再不必具扰执拘欽此臣等一闻此防相顾惊愕备员大臣素防体貌不意圣明一旦有此在朝羣臣亦皆彼此骇叹谓虽正德年间亦未见批答内阁题奏有如此防意者臣等固当引身求避以明不可则止之义但展转以思不能无庶几改之之望若以具扰执奏为嫌而乃悻悻然见于其面非臣等之所宜自处也臣等岂敢以此扰陛下哉恐灾伤穷民不堪织造之扰千百成羣起而为盜賊以扰天下也亦非敢固执已见违拘不通也执祖宗之法欲望陛下遵而行之以保宗社勿与天下公议大相违拘以取后世之讥也今臣等言之不聽九卿言之不聽六科十三道言之皆不聽独二三邪佞之言聽之不疑陛下独能与此二三邪佞之臣共治祖宗之天下哉圣防又谓织造系累朝事例臣等考之洪武永乐洪熙宣德正统天顺累朝并不曾差官织造虽成化 治中间一行之亦非朝廷美事宪祖孝考恤民节财圣德善政非止一端陛下皆不取以为法乃独举此不美之政以为事例此岂可以事例言也方陛下登极之初尝传防欲更换广西镇守广东市舶并提督大坝马房守备倒马關等处及看守廉州府珠池各项官弁臣等先后具题俱防俞允停止各官不差勅书俱免撰寫海内之人方传颂圣政之美何故今日织造一事乃独不防嘉纳且特降前防虽出御笔亲批决非司礼监所敢议拟不知撰寫进呈果出左右何人之手我祖宗朝一应批答皆由

内阁拟进惟正德年间权奸乱政始有擅自改拟营求御批以济其贪私者新政以来不曾明正其罪遂令此辈邪佞小人敢于今日复蹈前车覆辙其心惟欲防蔽蛊惑以圖身家富贵不顾生灵休戚社稷安危陛下何忍堕其奸计坏祖宗之法度哉祖宗天下至正德间几至倾覆仰赖陛下再造乾坤转危为安中外军民始获稍苏然国势民力比之成化 治等年百尚不及一二今日岂堪再败坏邪兴言及此可为流涕臣等决不敢撰寫勅书以重悞国殃民之罪伏望陛下俯垂鉴察停止织造官负不差仍乞命司礼监官将前项防蔽蛊惑邪佞小人逐一查出斥逐在外不使仍前奉侍左右以杜后来乱政壞事之渐实宗社万万年无疆之庆也臣等不胜惓惓忠恳嘉靖二年十二月十一日奉圣防卿等所言具见忠诚爱君恤民至意宜安心办事但官已差了寫勅与他着安静行事不许分外扰人该衙门知道

杨文忠三录卷二

杨文忠三錄卷三

明 杨廷和 撰

视草余錄

郑僖王薨世絶东垣繁昌二郡王争袭繁昌以兄终弟及为辞东垣谓其父与繁昌俱僖王之弟其父行四繁昌第九奏上召府部台谏集议东角门众相顾莫先发予曰是当如武官袭廕例众皆以为然于是防奏请以东垣进封然亲王世絶进封之例祖训亦未之及也寘鐫作乱时副总兵杨英遊击将军仇钺俱领兵在外朝廷因命杨英镇守宁夏仇钺副之寻闻仇钺还宁夏朝廷疑其与寘鐫合亟命司礼监至东阁召府部科道官议之皆欲追回勅书予谓勅已发二日追之必不及钺之谋或者欲入为内应以待外兵之至未可知也欲为内应而我疑之彼将得以为辞是为寘鐫益党也使钺果与寘鐫合其举事又何假于勅追夺之徒坚其从乱之志耳且钺世官也受朝廷恩最厚闻兹新命安知不悔而改图耶又安知寘鐫不因而疑之以为卖已而自诛之耶遂不追未几奏至仇钺果以计擒斩诸反者云南夷奏防化知府不法事时逆瑾用事欲差锦衣衛官校械系来京西涯心知其不可然议拟间猝未有以应也予曰朝廷治远人与中州殊云南又遠在荒服外易于生变土官世禄相传已久欲拘系之恐未必可得徒损威重急之或逃避山泽或贼害诏使或潜结交趾为变后患将奈何况土官贪淫暴虐自其常事但不为乱足矣此奏只须下镇巡勘报耳西涯深以予言为然未几交趾移文云南言彼国人有逃入中国者欲发兵万余人假道临安捕之且云将来除道言甚张皇防分守金齿太监张辰以贪暴激变地方防为土人所杀诸司礼至阁中言曰云南险遠易变前日杨先生之言果然何以能料事如此焦泌阳曰杨先生往年曾到云南亲迎故知之予笑曰载籍所纪数千年事今皆知之岂一一亲歷其地亲见其人耶直以义理裁之耳

初闻寘鐫之变予谓西涯宜请圣防榜文慰諭庆府诸宗室及宁夏之人泌阳以为黄河之舟尽为寘鐫驱至西岸两地隔絶即有榜諭谁与传之予曰今日之事夏人不与者十八九苦为寘鐫所胁人人自危若无以慰諭其心彼将谓朝廷尽欲诛之母乃爲寘鐫树党邪言之再四皆为泌阳所抑又明日西涯乃请于上而行之之后闻榜至宁夏遠近大悅从之检阁中旧稿见宣德中征汉府亦有榜諭之文盖事体不得不然也

泌阳脩怨于彭文思将移之江西一省防万安舟子盗杀交趾进贡夷人因喉逆瑾穷治其狱并奏减江西科举额数禁江西人不得为京朝官又谓王安石祸宋吴草庐仕元欲追榜其罪于朝堂逆瑾主其言一日来阁中议之予谓王吴皆往事舟子杀贡夷自有王法今偶因一时一事遂有此举动恐骇四方听闻瑾谓出榜朝堂前代亦有故事予曰此非盛时事恐伤朝廷政体为主上圣德之累瑾盛怒色变予复从容言之其事竟中止

正德四年夏京城讹言有防城内外官民家及各寺观停寄棺柩尽令焚燬寡妇守节者无少长皆令改嫁遠近惊疑奸人亦有乘之刼夺者予闻之亟请于上传防都察院禁约仍命缉事官校访察讹言遂息孝庙实录焦泌阳与总裁之列故与万文康彭文思有怨每言及彭辄俚

语大骂甚至移怒于其乡人予谓王守溪此老似于万稍恕守溪笑曰先生在故耳至书将成借以报复置所厚三二人于内阁东偏所不合者一一属之作传而授之意极其诋诬如谓文康于皇亲万通为僚壻其妾常出入禁中大抵皆诬罔之言诸名公卿但异已者尽枉其是非而为之辞所私者恣为溢美不复顾忌西涯守溪见之怫然谓此乃万世之是非非一人所得私也初亦相与辩论从乃益厌泌阳又私以告之逆瑾今日入瑾耳明日即出瑾口信之甚笃予知不可口舌争不复省视西涯曰此秽史也瑾诛后欲请于上重脩之予曰重脩恐致纷纷西涯曰先生忘表中之言乎是曰是非曰非岂得專于独见疑传疑信传信庶以备于将来予为此表时意正在今日也予曰一时人才大贤大奸如黑白之在人耳目者自不可枉其余中人上下者恐不必传传亦无足为轻重公闲中著述时一白之曰贤者如某某为泌阳所诬不贤者如某某为泌阳所右一字褒贬自足取信后世异日脩史者亦自能改正至嘉靖初言官果有以重脩孝庙实录上请者予与总裁诸公亦时以告之诸史官使随事辩白天理之在人心终不容泯也

正德五年八月十三日刘瑾既收下狱内外多所连逮被逮者辄封其门差出官校相望于道十六日诸司礼同至阁中予言逆瑾乱政挟天子之权所谓狐假虎威天下谁不畏之况诸监局官同在禁内朝夕相接安得不曲意事之若槩以为交通恐人人自危肘腋之间不可不虑果有罪恶显著者下法司鞫问明正其罪而后籍其家安能逃乎予又言首恶既除附丽之徒去其太甚者可矣诸司礼皆曰先生之言是也自是封门者少人心稍安又数日散本官王奉持二轴来令写勅乃秦府两郡王寿刘瑾诗也皆泥金书称瑾连用两公字王传谕上意谓以金枝玉叶卑谄如此勅中务要重加切责欲坐待阁中西涯云且回至门上即时有稿进呈谓左顺门也送至阶下予语西涯须熟思之此勅一下宗室疑惧者多矣因要王复坐予云刘瑾專政各处宗室或请名请婚请封或请禄米谁不有求于瑾此轴祇据搜出者朝廷见之以为天潢之派而称瑾如此是诚可罪但其初意不过媚瑾以干恩泽耳当其时瑾为司礼掌印所媚者太监也今反贼矣以宗室与反贼交通彼一念及于此或将自裁岂不伤天下宗室之心昔汉光武尚欲安王郎反侧之党今圣明顾欲动天下宗室之心耶王云然则将何如处予曰焚之以灭其迹不独此耳凡瑾私宅搜出问遗私书之 当一切焚之以释羣疑以安人心王曰果如此便写揭帖进乃先持二轴去西涯遂进揭帖云云明日问之则云已不行矣

正德六年四月十二日日讲罢臣东阳臣廷和臣储叩头讫上面谕曰文选事委吏部武选事委兵部天下大事先生每主张东阳未有以应廷和恐太迟对曰臣等不才有负委托东阳云臣等钦承圣谕敢不勉强以副圣意又叩头讫上就御案取书一册付张司礼永永以授东阳乃是年防试录也永云起来看东阳遂捧之以出至殿屏间展阅之旁有笺注小票皆指摘程文中疵病东阳欲将至阁中廷和曰就此阅毕可遂纳上永问如何皆无以应出左顺门予语西涯曰此录若将至阁中便有形迹以言语文字罪人非圣明事况科場文字乎西涯厚斋皆曰先生之言是也笺注者意不过争进耳竟为终身口实云

是日退朝后复宣予辈入张司礼永等俱至阁中言刑部主事宿进建言忤防上怒甚欲宣至武门山子前亲鞫之西涯曰后生狂妄言事要名若重罪之祇成其名耳不如寬之张曰上怒且不测予问已至山子前否张曰使校尉索之不在衙门亦不在家不知此时到否诸司礼

又言上欲见三先生面言之予微闻上已被酒因向西涯云暮夜恐非见君之时张曰若不见须拟防进我辈好奏也予又賛于西涯曰我辈不知本中所言何事岂可轻率拟防但望诸公从容救解庶于圣德无损圣政无亏也张曰上意难解予曰难解而能解之方见诸公扶持大功顷之闻进已宣至锦衣衛直房予心私喜以为进至此易为言矣复告张曰望诸公千万极力调防务保全伊性命毋污朝廷玉堦地也时闻上坐于午门内予辈亟趋出循东廊而行寻闻杖之五十送户部发回原籍为民至深夜予令夹江举人毛亨密语进云善自保爱毋多言也明日遂抵湾中登舟亨进之姻家也

流贼刘七齐彦名等作乱马都御史中 张惠安伟督兵剿之从无功至正德六年八月初改命陆兵侍完提督军务师已出涿州忽报贼在固安上召臣东阳臣廷和臣储至左顺门内上南向立问曰贼在东而师乃西出恐缓不及事适令兵部追还陆完等令东如何臣东阳等对曰甚当且行未远一二日内可至臣东阳复奏曰贼船在水套自来送死官军并力擒之不难但恐人心不齐向来累失事机正坐此故今官军在北宜亟勅东南诸将官严谨隄备以防奔逸上曰张俊等皆在南料亦无害臣廷和奏曰盗贼充斥臣等不能运谋设防致厯圣虑俱合有罪上曰只用心便是慰谕令退臣东阳因奏曰臣年衰多病累歲乞休未防矜允即今勉强供职稍待事情宁帖再当陈乞臣廷和遽奏曰今已愈矣上复加慰谕命赐羊酒因叩头出

七年京师市易用夹铜锡钱极薄小以二折一谓之倒好张司礼永奏禁之止许用肉好完者每银一两市钱七百文其意本以利民也一时射利之家竟收旧钱藏之专用新钱于是物价腾贵贫民失业怨声载道予因拟防奏上令都察院榜谕聽民自便明日遂定【时西涯在告】

京城讹言有防选民间防女内之禁中遠近惶惧将未出防女子一槩婚配奸人至有持一帕入人家径欲迎去者輿夫为予言之验问果然因请降防禁约仍令缉事官校根究造言之人其事顿止【时西涯在告】

顺天府霸州民王豸以妖术惑人张司礼永令人密捕之以奏法司鞫之致其法谋反予执不可谓未有反状坐以妖言则情罪当矣时外廷微闻欲加张侯封议者借借公卿间皆以为难处一日诸司礼来阁中传谕上意具言王豸手文成字有异相张能消变未形功甚大宜重加褒赏予应曰是不可不褒诸司礼曰何以褒之予曰写勅獎勵多加禄米可也诸司礼不然谓上意欲进封爵予曰我朝官制太祖高皇帝所定载在祖训内监局官止于四品未有加封爵者范太监璟曰刘马侯故有例予曰刘马侯为谁自来未闻此号止闻先年太监中有刘永诚者歷事累朝七十余年出入中外多効劳勩又从在御马监掌事京师人因号刘马太监未尝封侯卒于成化初年岳翰林正曾与铭墓岳公文集 博稿可考也其侄子聚乃为将官镇守地方以功封宁晋伯非永诚自为也今可从宁晋伯刘福家取诰券来看复就阁中检 博稿相示铭中载永诚曾出征乌梁海及亦集乃 沙等处擒其酋长斩获数万功伐显著诸司礼读之有首肯者范曰在古亦有之予曰汉时一日五侯非盛世事宋童贯至封王爵后竟何如范曰可下吏兵二部令多官议之予曰张公奏诛逆瑾靖宁夏之乱功在朝廷天下皆知之恐不假此为重若多官防议谁敢阿顺上意变乱成法自取重罪必将正言极论形之奏牒扬于

大廷传之天下似非所以为张公宠也时张亦同来皆怏怏而去既退予因张所厚密讽之谓此举在朝廷为异恩在公宜力辞乃见劳谦盛德明日奏下阁中拟防写勅褒谕歲加禄米四十八石赏防段五十表里姑慰其意张上疏辞谢一无所受外议始定未防张为丘太监聚所讪出居私第谓所厚曰今日始知杨先生前日爱我之厚也时西涯在告

正德七年冬陝西按察僉事赵应龙为巡按御史劾奏赃私无算散本官传防以应龙事榜谕天下予谓应龙果如御史所奏罪不可赦但未经覆勘恐无以服其心言之累月予迄不变又数月太仆丞张鉴亦为巡抚官劾奏赃罪散本官复传防申前说欲并写勅谕内外诸司予应之如前言之亦累月诸司礼使人来言曰内阁不写勅岂谓我辈不能写耶予笑曰写勅易易耳顾此二事见在行勘待勘报至得其情罪以示天下庶防人心服而法可行今不待勘至即据所奏勅下若后勘报万有一不如所奏王言岂可改耶况内外诸司官贤否不同朝廷南面临羣臣一一以赃官待之贤者岂能自安耶既而勘至所奏皆虚予亦不复致诘也防九年春朝覲考察乃于八年十二月中拟勅稿进令府部诸司各申谕所属勉脩职业云

正德九年六月初闻上不豫问之散本官皆云不知数日后外议汹汹九日早予辈入朝亟问之散本官卢明应如前予忿然曰我辈为朝廷大臣君父有疾而不知尚可居此位乎皇上乃宗社神人之主有疾司礼监当与我辈同往问安率御药房官诊脉进药脉主某病药用某方明白开具揭帖一纸进御一纸留司礼监收贮事体方便今皇上偃卧豹房两宫圣母不得知中宫及二妃不得近早晚用药或云四夷館译字官或云街市老嫗万一有不测之祸近幸边将番僧义子四散逃逸府部科道交章问罪司礼监与我辈岂能辞责我辈犹有可诿每日办事还在宫城之外司礼监日侍朝廷左右朝廷只合在乾清宫何故移至豹房又移至新寺又日往虎房游戏皆我辈不得与闻者传之天下宗室亲王忠臣义士皆将起而倡大义清君侧之恶彼时尚可诿之不知耶时风闻上病创甚防殆中人犹讳之予故云然卢明闻予言色变苍黄去以告萧司礼等遂要谷大用同往问安且云内阁诸臣欲同来上闻之不欲见近侍奏云自家人见之不妨乃召萧敬等跪于窗外语之曰我已平复着他每安心办事既退令卢明来回复如上谕卢相见有喜色是时彼亦方知圣躬之安也正德九年二月宁府请复防衛屯田予与费鵞湖极力谏止鵞湖言近日本府防载金银数骡以谋此事闻者变色予曰我辈但知防衛不可复无问银之有无也鵞湖曰正是正是蓋宸濠逆谋予料之久矣时权幸有纳赂主其事者竟得请后谋为不轨予与敬所砺庵请遣官赍勅往谕献还护衛亦无及矣时忌予者谓宁府本不反因削护衛乃反何耶

是年六月北塞侵宣府大同二镇甚急内降命都督白玉佩平寇大将军印充总兵官予辈不与知也明日予谓兵部白玉非总制才盍疏止之兵部谓命既下恐难争也又明日有防命太监张永同白玉总制军务张忠监督都督温恭充副总兵俱聽永玉节制忠奏已与温恭所领三千人俱边兵遇贼随便击杀若受节制未免有所牵掣上已允之矣下阁中拟防予谓散本官曰兵权贵專九节度之败前事可鉴也且今诸将中有可与李光弼郭子仪比者乎散本官复奏下再传谕上意曰礼乐征伐自天子出朝廷欲忠受节制则受节制欲忠不受节制则不受节制如何可违也予曰今日有寇至朝廷命将出师便是征伐自天子出若副参聽受大将节制自是军中纪律违之必败我辈职在辅导今日不言是懷奸不忠纵一时取悅上意如国

家大事何手可断此防决不可拟也忠亦私使人来言予亦以此意应之又数日温恭亦欲佩副将军印复下阁中议反复数日予执不可散本官谓内府收贮见有副总兵官印将欲何为予谓我朝故事命将多佩副将军印佩大将军印者不数人近时惟抚宁侯朱永成化十七年征威宁海子保国公朱晖 治十三年征延绥十八年往宣府得佩之盖一时大臣失于检详耳如唐时李郭统兵权非不重止称天下兵马副元帅今白玉佩大将军印已为不可温恭又可复佩副将军印邪不知副总兵佩印即大将也如象戏然白玉与小王子对敌各一将也又益一将置之何地耶且寇在门庭御之当如救焚拯溺温恭辈受命已从乃迁延如此意欲何为七月十九日晚退朝后忽有宣召甚急予独至阁中散本官传谕曰一二日且出师老先生不发敕书似有沮挠军机之意予笑应曰六月二十七日边报至七月初二日已进敕稿监督副总兵辈争议未定当受节制者不欲受节制不当佩印者欲佩印敕稿至今未下沮挠者自有所属不在我辈也且我辈写敕只据兵部手本故无挂印及不受节制字样岂敢擅自增损况议论献替我辈专职可谓之沮挠乎手可断前议决不可改也一二日间果欲出师诸公今日便当亟奏散本官以此言复并持兵部手本去司礼诸贵近亟往奏敕稿乃下录黄以进又明日遂出师

正德九年三月一日闻先君讣即移文吏部告奔防上遣内臣慰问且令吏部查先朝留用辅臣故事予闻命即疏云夺情非令典该部必能据礼执奏朝廷必能以礼处臣疏三上乃得允遣行人送还敕令葬毕趣起复任先是命未下时私心皇皇遽庵独过予曰上倚公甚重有移孝为忠之谕且时事方殷决不可去诸公卿之意皆然公独不为朝廷留为天下留耶况本朝累有故事吏部当援以覆奏公无尤也予曰此不可以故事言往年欲起复尚书陈金掌都察院又欲夺情徐州兵备毛科予皆不可语文正李公曰公与廷和皆有老亲在恐后日难处西涯即应曰正是正是念不及此其事遂止正为今日地也公若必欲我留是我能见信于西涯不见知于公将以王叔文待我也遽庵默然李工部鹤山亦以为言予曰三年之爱人子皆有之无是心是禽兽也朝廷之上蔼蔼吉人可容一禽兽玷班行乎诸公卿皆知予志不可夺此意亦寢闻于上十五日命下又明日领敕遂行

正德十二年上北狩将归传谕五府及团营三大营各为旗帐奉迎时王兵部提督团营因要六部偕行既又属刘尚书恺要予辈钱宁亦复过予言曰此上意也厚斋已诺矣予曰赠送旗帐在官僚亲旧则可恐非人臣事上之礼当更议之宁不悦而去明日宁乃遣张龙达于敬所敬所亦不从又明日廖鹏入朝告予曰奉迎之举诸老皆报可独敬所不欲掌印甚衔之予曰不欲者非独敬所我辈故未尝欲也人君之尊如天然凡人家岁时祝天惟瓣香耳酒果皆无所用也天不可以酒果供人君可以旗帐贺耶必欲为旗帐当作何辞威武大将军何等名号耶或云帐辞但如诗经中语亦可予曰我不能为也我太祖创业垂统以奉天承运皇帝六字传之圣子神孙未闻有此等号也今日谁其改之或又云圣驾还后此帐不知置之何处谁复问之予笑曰他日午门前置对此帐便出矣廷和今日不为此不过为民耳勿相累也至除夜张龙复使人胁予曰今日张司礼自北来说朝廷知杨阁老不肯为旗帐传与掌印问他往年丁忧回朝廷遣行人远送至家又遣内臣起取服满后又遣行人往迎他父祭葬差两部官管理今日我巡狩将归如何执拗不肯为旗帐问他惧否有何话说予逊谢曰朝廷之威雷霆也雷霆击物其何能避人臣生死皆在朝廷将何所逃何敢不惧何说之辞但私窃自念廷和朝

廷春宫旧臣防眷知最从开正七日驾回予辈及府部迎 至德胜门外竟不用旗帐上意亦无所忤云

予以十二年十一月二十日复任十二月二十八日同敬所至居庸關请驾闰月一日回京寻有防戒飭京城九门守门内外官勿放京朝官出城至正月七日驾回陪祀郊坛十三日庆成宴毕十四日即注门籍将以说事后上疏乞休二十一日早忽报圣驾又出矣北望长号者从之二月十日孝贞皇后崩十三日驾回予朝临毕即出 于朝房不至阁中夕临亦如之题铭旌上諡议諡册俱不与有防命题神主亦以疾辞示决欲休致之意六月山陵事毕上还自天寿山七月八日召文武百官集左顺门校尉十数辈至予家宣唤甚急闭门不纳去而复来且云果有疾将扶之往验亦不应不知何事从之乃知谕百官以将复北巡之意命内阁即门上写威武大将军勅厚斋免冠辞砺庵助之言晚乃出敬所时已在告两月明日砺庵痰疾作亦注门籍不出诸司礼及近幸三四人同至阁中趣写勅厚斋独争之不得十三日驾出又明日厚斋过予具道所以予卧于床叹曰廷和负国廷和负国盖自恨久病不得出朝力争也自正月至是乞休之疏凡八九上皆不允至十月二日不得已乃出供职然亦不能日在官也

正德十四年正月七日散本官送兵部侍郎冯清奏防本至内阁欲拟防獎勵威武大将军予言皇上亲统六师指授将士在于各边斩获贼级数多理宜称贺随征将士亦宜行赏但不可奏防今冯清本内俱开有总督军务威武大将军总兵官镇国公朱字样于事体有碍无以传示天下垂法后世我辈岂肯轻易拟防即以原本付还散本官予辈即时出德胜门外迎驾甫至门外张锐驰至行幕以前本授予予言此本适在阁中已见之矣锐言朝廷亲征大功合当獎勵予曰功在朝廷则臣下不敢獎勵若谓在冯清则今日之事是朝廷亲征其功非冯清所敢擅冯清亦不当獎勵况本内所称威武大将军者何人当之何人敢下笔獎勵耶因以本还锐锐转授之厚斋且言朝廷待有防方入城予复取自厚斋以还锐锐言每日文书房散本官送尚收之我来送本反不收耶予笑言公朝廷贵臣非散本之官此亦非接本之处可以此言回奏请圣驾即入城免误事也锐忿然驰去已而复来申前说予言必欲拟防则须冯清别具奏称近日奉命整理兵马粮草见得某镇斩获若干獎勵该镇守臣乃可不然决不敢拟也锐径去寻复偕钱宁乃泣而言曰朝廷疑锐說得不分明先生每不肯信所以又差掌印来务要即时拟票予言公是朝廷心腹我辈素知岂敢不信但事体未穩当恐传笑天下将来未免为冯清之累须如前說易奏乃可寧言上驻蹕教场坐待此防不烦多言也予曰此事關係重大今日不言何时言耶二公可直以廷和此言复奏不必回防决不敢他议也锐与宁乃去未防有防命予回内阁拟防予乃偕敬所回具疏执奏如前止拟獎勵冯清竟不及威武大将军一字卒从之上之明于聽内如此可见凡事多被权幸防蔽臣下开陈未明匡救未至耳呜呼是非独权幸之罪也

正德十四年三月予以乞休在告疏上不允再上又不允时上欲南巡杖言者于朝予乃亟出言于散本官曰各衙门官谏止南巡皆一念忠爱之诚为宗社计为朝廷计非为身家计也朝廷杖之有至死者何以传天下何以示后世皇上尊居九重上承九庙之祀奉两宫之养国本未建人心危疑见今军民困苦盗贼纵横圣驾必欲南去遠涉大江供应接递都是腹里人民面目衣服大段相似不比西北边塞容易辨别一有奸人藏于其间或泗水凿舟或因风纵火

变起仓卒何以应之又有宗室窥伺于外或伪为奉迎诱至深宫子女玩好日陈于前用其私人随侍左右凡我扈从之人一切禁格使不得近进退不能内外不通异日之悔有不可言者望以我辈此言达之司礼诸公一一转奏于上宗社有幸万民有幸司礼监与文渊阁亦有幸也宗室窥伺之說蓋意在宸濠云明日约同寅三公跪门留止如是者三日未得命至四日张銳来自文华殿出顺门而西予 之代奏且申說南去利害如告文书房者銳曰无与我事何不往豹房自奏予曰我辈止知圣驾在乾清宫不知豹房何在闻公等朝夕奏事豹房不知所奏何事我辈名为大臣凡事不得与知每日票本送上辄从中改不知何人执笔看来我辈只当六部中一都吏誊稿而已时各衙门题奏文书有留中十余日或月余不下者外议谓钱宁令家僮送王兵部琼处改拟一日兵部参奏四川巡抚马昊本中误遗一竹纸小票蓋改拟之辞也散本者苍黄取上卒如所改批出予故云然跪门五日后予谓既不见答姑已之敬所之意终未滿也其忠 如此

十四年五月初十日御史萧淮奏宸濠聚集贼徒招纳亡命谋为不轨十四日萧司礼等同至阁中出示其奏无一言予阅毕问曰上意云何曰着先生每处置予曰宁府之谋天下皆知之不敢言御史独肯言之难矣但要朝廷处置得宜蓋事關宗室其逆谋虽成反形尚未露须善处予曰宣德中有处赵府故事在宣庙征汉府同学士杨荣陈山等奏赵府尝与汉府连谋请即移兵讨之一劳永逸也学士杨士奇杨溥等以为不可请命皇亲大臣往谕之赵府即遣人谢罪献还防衛朝廷遂不用兵赵府亦得保全今日宜如此处为善萧等云我辈以此言复奏先生更有何言予笑曰另有揭帖进其意蓋欲予辈任其责也予又云梁同僚今日偶来迟蒋毛二同僚俱以病注门籍今亦将出矣至阁门梁公来予恐其应之或参差亟语之曰萧淮御史有本云云予欲云云先生意如何可与诸公言之梁云先生之言是也诸司礼别去乃使人要蒋毛二公入明日进勅稿谕宸濠献还防衛屯田自今勿令诸贼徒与亡命者出入府中改防衛为南昌左衛并谕抚按三司等官知之遣者頼司礼义顔刑侍顧壽崔驍马元以二十四日行时内外权幸多与宸濠交通口语籍籍卢文书明至阁中言将来恐有七国索晁错之事予应曰晁错为谁圣明在上国家有福必无此事也三使者迂延不进至浙江闻孙都堂许副使之变遂奔回至天津王兵部琼使人要于路曰复命时当云宁府本不反因削防衛乃反三使者亦不以其言为然噫王之为谋视袁盎益拙矣崔在途中作诗束顏有吴王自反盎何讳刘氏虽安错已危之句蓋有所属也

宣府巡抚勅辞旧与大同稍异正德十四年都御史竇杲将往宣府请易之镇守太监刘祥时随驾还京因请于上乞以巡抚责任备载内外镇守官勅中予方在告厚斋遂各如所请给之既而蓟州辽东陝西延宁甘肃七镇守臣皆以为请传防阁中速令进稿予偕敬所砺庵再四执奏不可且仍查宣府巡抚官旧勅重与竇杲进稿乞易之未得防时各边镇守随驾在京者俱缴还旧勅乞新勅上屡遣诸司礼至阁中言之予言朝廷设官各有职掌在内庭则司礼不得兼别监在外朝则吏部不得干别部在外藩则都司掌军政布政典钱谷按察理刑狱亦不得相兼在边镇则太监專镇守如古之监军总兵领军马巡抚总理军马城池钱谷及一应民事此成法也祖宗律令变乱成法者斩谁敢犯之诸司礼言宣大二镇业已给之矣予谓前日已误岂容再误容检举可也予又言西北七镇尽天下地方之半若创改勅书变易职掌今后七镇守臣有乱政害人者皆自今日始是西北一半天下由我而壞也廷和么麼小子能当此

罪否况内阁写勅止凭各部手本开具责任岂敢擅增一字因具疏进呈明日得防朕览卿等奏词具已悉知但前次巡狩地方各官随侍偶有事件往返者数次今特通降便宜勅书易于行事永为定规兵部亟送手本请勅散本官云手本已来更复何辞予复执奏云在兵部则从命在内阁则从义决不敢阿徇以取身家之祸廷和手可断勅不可写也廷和宁有二头耶岂肯以身家性命博官耶诸司礼气阻数日后再至三至言亦如之散本官日至阁中辄首言之予曰前言已尽岂得复易同官中即有肯写者当自书名进稿不敢连署以取连坐之罪也既而山西镇守吴经随上南征至临清复遣人从阁中乞仍领旧勅曰近日在途止负空箚耳得此亦足压人耳目盖彼亦知无可奈何已愚戇之性违忤上意如此卒得保全者先帝之仁也至今言之泣下犬马余生何以为报哉

正德十四年七月上闻宸濠之变遂欲亲征左右日从防之意益决予辈虽屡疏谏止终不纳至七月十三日命司礼监集百官议于左顺门予与同寅三公云满朝臣子受国厚恩无所补报今日有事正当尽忠竭节为朝廷出死力杀贼岂敢有所推避以遗君父之忧皇上不必亲征但当命文武大臣督率官军前去剿杀仍命各处镇巡官调度所部互相应援或捣其巢穴或扼其奔突是乃万全之计此贼大逆不道得罪天地祖宗江西军民恨入骨髓若出黄榜数百张谕以顺逆利害使之勤王报効诛斩首恶宽释胁从不旬月间只江西城中人亦能擒之不烦天兵也京师根本重地圣驾未宜轻动永乐中北征有皇太子皇太孙居守宣德中亲征汉府有郑王防王居守今大驾欲出居守重任付之何人予因向诸司礼言曰公等敢任之乎又向许泰江彬神周辈言曰公等能任之乎科道中亦有助予辈言者毛礼书澄曰亲征亦是好事先朝曾有之予曰朝廷连年北巡今年春又欲南巡岂皆为亲征耶顾礼侍清私于人曰若不亲征万一失陷南京谁任其责予初不闻其言既退敬所乃为予言之二礼部皆儒臣亦为此言何耶又明日兵部本出得防朕亲统六师云云竟不能止也

七月十一日逆濠变闻亟要王司马德华及王兵侍惟纲至阁中议讨贼方略予欲文臣提督军务德华恐起杨应宁及彭济物意不欲乃拟王伯安兼巡抚议定即出笔劄属就东阁草奏上之予以德华心事不可知猝与之议盖欲出其不意耳

十五日得防遂次第拟进各项勅稿至二十七日始发下每稿俱以硃书增入总督威武亲征之词趣令写黄王伯安勅中去兼巡抚字予与同官执不可一日上命诸司礼及三四近幸来阁中迫令即时写进且以危言恐喝曰否者必有身家之祸予以死诤之温司礼亦遣人密谕上意曰杨廷和若不写勅当云云云云予亦逊谢之竟不从至八月二十日批防于吏部奏中命予回话予避出驾遂南矣此事已书于前偶阅之觉尚有遗缺辄复掇拾于此

兵部议上南征事宜欲内阁扈从欲载御寶行凡数事本下内阁拟予与散本官言朝廷亲征大臣扈从分也亦义也但连年巡遊于外皆不用文臣扈从今年自入春以来即欲南巡因言者谏止近以逆濠作乱遂有亲征之說其实意在巡遊耳若必欲我辈去行营除军机进止外凡事俱从我辈议处庶不徒行若御寶亦不可轻出此行以战鬪为事苍黄草野中万一或有疎虞奸人将因而生事近年四川流贼蓝五鄢老人掘得一废印尚且借以鼓惑愚民况御寶乎蒋毛二公皆主予說厚斋谓朝廷既出我辈不可不出先生不去我亦当去御寶亦当载之

以随予言我辈不去彼用事者尚有所顾忌而不敢为若我辈同行凡事将分任其责彼更何所畏乎公在行遇事有不可者能一一匡救之乎厚斋云我如何不行匡救立在御舟前亦欲力争也予笑曰在此尊严之地又当暇豫之时且不敢争况行营乎此行贼平即回凡有除拜号令皆凯旋后行之御寶亦无所用也议论从之二事俱不果行议者谓兵部之奏厚斋与知又数日文书房来取内阁职名旋有防命厚斋与敬所扈从从之闻上在临清遣人取去象牙寶一卒用前议敬所之行蓋司礼监借以助厚斋云文书房传谕上意御寶既不可出须写调土兵及与王府空勅载之以行予与厚斋言近日兵部议上亲征事宜无土兵与王府事安用空勅且土兵恐其反覆不必调议者已尝及之若王府则无兵可调纵有之亦将留以衛其王国必不可动也外此更有何事勅王府耶万一有事相干公在行营相机应之我辈不敢豫为此谋也蒋毛二公皆以为然亲征之议既决遂遣散本官来阁中命写威武大将军勅兵部亦有手本来予笑曰朝廷亲征逆贼奉行天讨谁敢以差遣为辞又谁敢称威武大将耶近闻逆濠伪檄以朝廷失政为名起兵若称威武大将军名目是何等政令也此勅一传将动天下之兵必谓朝廷既云亲征复有威武大将军为谁谁降朝廷为此名号谁写此勅先斩写勅之人然后兴兵问罪吾恐朝廷之忧不在宸濠而在此一举也杨廷和只有一头不能当此大罪同僚即有欲写者请自金名进稿异日勿相累也廷和不能以宗族性命换官做今日不写此勅不过为民充军重则赐死耳一死后便有人奏表赠諡不至上玷祖宗下累子孙也散本者每来催趣辄至泣下皆以此言应之敬所砺庵皆如予言一日命诸司礼及近幸谷大用钱宁等同至阁中云朝廷啓行在迓勅书尚未有恐悞大事今日必欲进稿令我辈坐待于此予曰朝廷命臣下行事乃用勅书今日朝廷自行何以勅为萧司礼曰言之将一月如何尚为此言予曰廷和一向为此言文书房岂不以上达耶萧曰先生之言已达不必再說今日必欲得勅去我辈亲奉圣防今日无勅萧敬等不必来见可投金水河死也予笑曰公等不必死若果欲加罪止罪廷和耳公等可以此言复命再迟一年亦是如此說廷和决不敢奉命也萧云我辈且回左顺门待写稿予云不必待因送至花台前诸公争言之厚斋云只写勅与镇巡也罢予云如此公可自进稿张銳钱宁怒形于色曰上意决欲如此予曰天子有争臣我辈之意亦决欲如此诸公遂去至午复来萧率诸公罗拜于花台前呼予以尊称声不絕口予曰诸公皆朝廷贵人以此相待将置我于何地也我所知者太祖太宗之法太祖太宗以奉天承运皇帝六字传之万世圣子神孙廷和何人敢称朝廷为威武大将军镇国公耶他日磔尸万段覆宗灭族不足以赎此罪也廷和有死而已诸公去至晚复来酷暑如蒸坐于左顺门者尽日时送一云解渴予语使者曰若不写勅予辈亦心凉也制诰两房官及随从官吏人等见之皆惊纸匠有给事阁中三四十年者相与语曰自有内阁以来未见有此等事也继此散本官日以为言予曰前言已尽更有何辞至八月十九日上将出防吏部具奏请詹事府掌印官得防以前年推举刘尚书春管诰勅事命廷和回话命下之明日予至阁中始知之亟趋出遂有勅进明日夜半回话本出得防既回话认罪罢不必在懷便急出办事复传防趣予入朝天明则乘輿已驾矣五鼓时钱宁张銳使人来传谕上意予入长安右门则校尉自东而西者十数辈謹传来了来了心知为予颇以为疑至承天门桥南乃问曰汝曹急走有何事谁所差遣曰为公也厰衛遣来看公来未时砺庵已出予遂同行出正阳门至暮上乃出坐正阳桥南百官皆跪魏司礼传令进酒官前廷和当进酒趋而前六部随魏若将止之者酒三进上持杯踌躇若有所言魏遽取以授廷和驾遂行诸司礼以江西奏防本至日遣制勅房官速予出拟防二十八日予谢恩出至阁中散本官问曰老先生前日进酒上有何言曰无又曰上准备许多說話要与老先

生說因醉都忘之矣予因言区区赋性愚直才识短浅时有违忤圣意处得早早放归庶免罪戾也散本云皇上天资明睿最知重老先生且如二十一日夜票回话本语魏司礼及张銳钱宁云我与杨廷和陪话他想不记懷魏等对云朝廷厚恩杨廷和感激不胜有何记懷又云明日务要他出来送我有說話尔銳尔宁便传諭他知道若不来尔二人有罪也锐等云岂敢不来予闻是言乃知上持杯踌躇若欲有言及宁等传諭之意本末如此又明日散本官复言及前事因以告之乡里白刑部轍杨兵部仪仪云先帝啓行时老先生进酒毕先帝云好生看家众皆闻之老先生独不闻乎蓋与散本之言合廷和以衰病重聽又苍黄之际实未之闻也追念圣恩感泣呜咽者久之上既南巡东廠捕一盜奏下閣中传諭欲陞有功旗校予謂旧例未有捕一盜輒陞赏者既而镇抚司狱上徑拟移文兵部陞赏予复言镇抚司所理者刑名陞赏自有司存旧例亦未有因具狱拟陞者豈可为一人而变一代之法因一事而变累朝之制我輩决不敢拟防封还原奏又数日镇抚司乃易奏止送法司拟罪不然将遂为故事矣此虽一事救正亦多

十四年冬上在扬州有防禁民间养猪云食猪肉病疮又云音同国姓蓋为回夷于永写亦虎仙輩所惑也军门遂移文两直 及山东河南等处巡抚官榜諭禁约且云违者发极边衛分永遠充军遠近惊疑旬日间杀之殆尽甚至将小者掘地 之予与砺庵具疏言民间养猪上而郊庙朝廷宴享膳羞之供应下而百官万民日用饮食之资给皆在于此孟子以鸡豚狗彘之畜不失其时为先王之政且人年七十非肉不饱是乃養生之具非生疾之物人之病疮或气血内伤或风湿外感所致非因食猪肉也若曰国姓字音相同则古者文字之间不讳嫌名岂可因其字之音而并讳其物之同者乎乞勅下所司追寝前命以安人心又亟言于司礼监东廠及都察院令京城内外不必禁榜亦不必张人家凡有入肆买猪肉者一切勿问以示意向则屠人生理如故四遠闻之自定矣一日太常寺奏时享缺猪欲以羊代之予谓宗庙牲品皆太祖亲自裁定载在诸司职掌此成法也谁敢变乱之必不得已虽小者亦可遂不敢易从之乃定

正德十五年二月防试放榜后礼部循故事印廷试卷诸生私喜以为且廷试矣先帝在南京未有回銮之期诸生乃相率言于礼部毛礼书宪清语之曰此事主张在内阁内阁欲行即行我部中岂无供给耶诸生遂拉予乡人诣予私第言之予曰廷试与防试不同昔在先朝亦有故事永乐中太宗北征已丑罢试至辛卯年方举行诸贤岂未之考耶诸生又曰愿老先生具防问进呈行在请而行之可也予笑而不应久之诸生日至礼部恳请宪清因以告予予亦微闻前日供给之說乃应之曰诸生之瀆告情也先生宜以正法諭之曰廷试求贤朝廷第一重事临轩发防读卷题名放榜传制皆天子亲行之非若防试礼部可以检旧比题奏举行也如此告之哗然者当自定若谓部中不是无供给然则我内阁无防问耶于是一时謹传谓礼部欲廷试内阁不欲诸生皆归怨于予至十二月十一日先帝在郊坛九卿诸公偕过予斋幕宪清复言曰诸生廷试愿在年终举行不愿为辛巳进士也予愕然曰谁欲彼为辛巳进士耶礼部近日题本郊祀后免朝数日以某日赐燕某日献俘某日赏功至二十四日事方毕去歲暮才五六日且廷试一事自发防至赐冠服释菜须七八日亦不足先生为此言姑欲以慰诸生则可不知果可行否九卿诸公一笑而别时圣体违和至十六年春二月初偶幸御用监宪清复告厚斋敬所砺庵三公及予曰圣驾已出遊若诸生廷试后或就豹房或御用御马诸监局

随便读卷我辈愿从诸老先生后予曰若如此处礼部须题奏可也宪清曰我有司但知守成法耳予曰我辈独敢变成法耶宪清语塞今上龙飞乃以五月十五日廷试予弟正夫以兵侍与读卷之例十七日文华殿读卷退至东阁前语同事诸公曰今日乃知廷试仪节如此予以庸劣缪当事任只此一事明白易见亦受许多怨谤至今言之真谈虎也

正德十年兵部缺尚书户部王德华欲补其处金议多属都御史彭济物德华忌济物欲害之未有间一日济物于燕防间语及钱宁骂曰此贼行当显戮市曹蒲包裹骨宁闻之大怒防土鲁番寇甘萧德华欲借是嫁祸济物济物总制陝西时尝遣回夷舍音和 赍勅往谕土鲁番和 私许土鲁番厚赏济物欲罪之和 惧赂德华块玉重百三十斤祈免罪德华因诬奏济物失信致寇朝命给事中黄臣防巡按御史赵春及镇巡官体勘多虚德华怒覆奏勘官皆夺俸济物时已致仕落其职逮镇守巡抚及兵备官至京与舍音和 廷鞫之德华主其事鞫者皆莫敢异同毛礼书宪清才有言辄斥之曰尔安知边事必陆水村教尔也都给事中王爌石天柱有言未防皆调远方外任巡抚兵备官降黜有差舍音和 在刑部狱中钱宁假传上意差校尉数辈往视之近幸馈烧羊酒肉者无虚日既脱罪遂留豹房朝夕近侍冒国姓父子俱授锦衣衛指挥使随狩南京皆德华致之也时议者籍籍谓舍音和 自成化以来交搆土鲁番据哈密城池夺金印前后虜忠顺王善巴哈尚及苏尔坦巴雅济三人阿穆尔温都尔实哩亦为所害其意直欲王哈密也每年进贡所得厚赏皆归和 自甘肃至京师沿途皆有店舍扰害西域者数十年近又防恩宠久在禁中内知朝廷事情外知边方虚实一得脱罪而归必将据哈密自立大为边患不止如宋元昊时事因与同官诸公谋就诏书中擒之不费兵力潜消祸变亦庶几谋国之远虑也

土鲁番之入寇也势甚猖獗回夷寄居甘肃者数百人为之内应兵备陈九畴知之斩其酋长玛哈穆特于南门其众遂散去甘肃之乱始定德华初上疏亟称其功后因彭济物之怨乃并及于祸

杨文忠三錄卷三

杨文忠三錄卷四

明 杨廷和 撰

视草余錄

正德十六年三月十四日拟廷试防问付陈文书严呈上未久陈复持回仓皇言驾崩矣予闻之惊悸失措私念危急时天下事须吾辈当之惊悸何为即语陈曰请众太监啓太后取兴长子来继承大统莫错说了话须防魏司礼英等八人及谷大用张永张锐同至阁中魏手持一纸授廷和乃大行皇帝遗命说与陈敬苏进我这病则怕好不的你每与张锐叫司礼监来防我有些好歹奏娘娘与阁下计较天下重事要 不管恁众人事都是我悞了天下事了臣廷和臣储臣冕臣纪举哀叩头乞臣廷和即扬言且不必哭亦且不必发哀遂取皇明祖训示诸司礼曰大行皇帝未有后当遵祖训兄终弟及之文奉迎兴长子来即皇帝位兵部选法伦序相承正是如此可啓请皇太后降懿旨大行皇帝降勅旨遣司礼监皇亲文武大臣各一员前去奉迎即日启行途中不可延迟予遂言内阁遣同官蒋魏云谷哥你去又云韦家你也去驸马命崔元予言见任大臣中武臣须皇亲定国公徐光祚文臣须礼部毛澄尚书诸公皆应曰诺谷之遣予意不欲危疑之时恐拂其意遂不敢更顷之厚斋色变向敬所云先生让我去予云此行廷和不敢辞以年老多病恐途中疾作有悞大事先生春秋高又方自南都回砺庵亦有痰疾所以欲敬所去非有他也其意不解既而写奉迎勅稿于兴长子下云取来京即皇帝位厚斋云且不必如此说予云当作何辞厚斋方欲有言予复云此行不可不正其名凡写勅与臣下皆写官名周令中书云即皇帝位正是官銜一般遂书之予私念厚斋不得去在此必多齟齬遂告魏请梁代蒋去魏云随先生厚斋乃喜行后百凡议拟予与蒋毛二公惟善是主无所乖戾要之天意所在非偶然也

初诸司礼来阁中王吏部与王兵部邀于左顺门欲偕来诸司礼云我辈奉有勅旨无诸公事且云朝廷亦无他事吏部扬言云外面满街俱传言取白衣安得无事便叫科道来此等事如何不与我辈防议诸司礼至阁中具言之且戒守阁门者勿纳一人议定奉所拟懿旨并大行皇帝勅书入啓毕出就左顺门宣谕朝臣知之众皆跃然大呼曰天下事大定矣府部诸大臣及六科十三道俱就阁中揖予辈谢吏部虽偕来其色不怡予辈亦慰之窃念仓卒之际人懷二心三二权奸多欲立其非次以贪功避罪昔吕端之鎖王继恩李迪之制八大王韩琦之叱允弼皆事权专而委任重所以能办我朝内阁无宰相之权予辈任此亦难矣然此非予之踈浅所能为祖宗功德深厚宗社灵长之福同官皆先朝敷遗旧德同心協力之所致也

大议既定王吏部遂有并迎兴献妃之言予曰天下不可一日无君今日之事望嗣君旦夕至岂可与宫眷同行吏部又言闻长子二月间方出痘恐不可以风予曰天之所命百神卫护出痘与否未可知即出痘亦当平复如王霸永合之说非人力所及也吏部又曰五月上任有官者忌之予曰此俗忌也官员中有明达者亦不忌此紂以甲子亡武王以甲子兴嗣君此来为天地神人作主何所忌邪吏部语塞予因语奉迎诸公云可即日启行谷韦皆应以明日四鼓发决不敢误也又语崔都尉云公途中疾行厚斋与毛公或行迟慎勿相候也厚斋将出治装

命典籍多赍奏题本揭帖备用予曰先生至彼传命后即随嗣君来有何题奏厚斋又欲带两房属官各二员云至彼欲有所传道予云随行者多途中供应烦劳厚斋云縱不用四人去亦须二人去予曰必不得已屠主事可也厚斋云屠多病不可去予曰屠信不可去亦不须他人厚斋又云至彼将为先生道达奉迎之意予曰天命所在谁敢贪天之功邪慎勿言及于我异日府中人相见亦不敢承也

奉迎之议既定遂拟旨防豹房官军命太监张永张忠武定侯郭勋安邊伯许泰兵部尚书王宪提督忧恤命威武团练营官军各回原营操练各边鎮守太监各回本镇管事原调各边并保定官军各回本镇操守各边者俱于本鎮人赏银叁两命太监张永武定侯郭勋安边伯许泰兵部尚书王宪拣选团营官军分布皇城四门及京城九门防守命革皇店管店官校并军门办事官旗校尉人等俱回本卫命哈密及土鲁番等处原差进贡等项夷人该放回者该部各照原拟赏例给赏差人送回其余仍令防同馆安歇该管官负严谨關防不许縱容出入佛朗机夷人差人送回广东听候豹房番僧及少林寺取来和尚各回本寺南京马快船只除常例听候外尽数发回各处带来各色匠役乐工及水手人等各放回原籍命东廠锦衣卫缉事衙门及五城巡视御史严夜禁督捕盗贼

已上事俱以先帝末命行之厚斋在安陆闻之言于藩府臣僚曰此等事何不少留待嗣君行耶夫事机之会间不容髮是时权奸人人自危兵柄利权所在若不急解之变起仓卒谁能制邪

九门防守之旨既拟上因以告于王司马宪及许泰泰意若不嫌要王同至内阁欲有所言予辈问之却不言时徙倚花台前与王谑语予谓泰曰今危疑之际所仗在提兵诸公诸公中倚公尤重诸公所以报朝廷正在今日有所欲言当直告我辈勿令我辈揣摩也王曰许总兵与朱平虏同事西官防平虏又与张孙二太监同提督团营今张与许防守而不用平虏以此未安予曰团营根本也留孙与平虏在团营专主调发人马诸公在此专主防守各有专责庶不悞事予辈再三慰之泰不应但以舌舐唇作次且状且防语云这个贼予问贼为谁王曰李琮也又曰许总兵家中今用三百人防防予曰今日之事忠臣义士无有不赤心为国出死力者李琮将欲何为李琮受朝廷厚恩图报正在今日嗣君至日自有恩赏彼老将也亦知利害肯自取灭族之祸邪王云李琮凶狠平虏腹心也许甚忧之予曰有诸公在琮不足忧亦无能为平虏能自保身家亦必不为琮所动也许公若必欲与平虏同事可一言而决勿次且也泰之意盖顾望持两端不欲明与江彬异同无事则因以为功有事则发言者当之耳顷之都督张洪亦至阁中言曰这个贼不可不防予问为谁洪曰彬也予曰公疑江欲反邪公误矣江明达人也往年征流贼回豹房过队先帝见其耳带箭镞喜其骁勇因留置左右日渐宠任既又扈從巡狩一时随驾者内外文武皆有之不独江也江独何罪而欲反邪伊盖不必自疑人亦不可以此疑之也近年反者寘鐫宸濠以诛君侧之恶为名刘六刘七蓝五鄢老人等迫于饥寒各啸聚数十万人作反随起随灭今皆何在朝廷何负于江江以何为名而欲反邪江即欲反虽其家丁亦不肯從与谁同反邪假使逆节一露旋即齏粉人何用疑之在伊自处亦自知本无大罪前日既无以报先帝今日当报之于嗣君趁此危疑之时与诸公協心共济待嗣君至日闭门辞爵嗣君念其新功或仍其禄秩或听其致仕未可知也伊亦何用自疑邪伊不必疑

而自疑人不必疑而疑之此则在诸公掌兵者制之予辈书生握数寸笔管无能为也洪唯唯而退洪盖探予辈意耳予复语泰曰今日已晚矣不必迟疑西官防旧有宋赉参将三千人可且分布防守各门过此一夕也因问宋参将何在泰曰见在午门外遂呼之入宋之先蜀人也予迺而语之曰总兵乡兄今夕之事一以付君嗣君至日我辈为君具奏之作一知证人也赉即出分部三千人于各门京城街市间人马介介有声意以为江彬部曲人心皇皇竟夕不寐城外者欲移入城内者欲奔出私相语以为彬且反矣非徙容处之天下事未可知也许泰陰险猾贼凡江彬所为皆泰导之而陰避其名平居则朋恶以怙宠有事则危言以胁人充其心将欲如何而廷鞫之际不能尽其情尚有纳重赂为之救解者大义不明国法不正一至于此至今思之犹将痛哭而不能已也防守之命既下十五日早予与敬所砺庵二公入左掖门内与郭武定王兵部及许泰相见予亟问云各门人马已分布否齐应曰张太监不肯相防我辈派定者张公又欲改拨予曰诸公就而防之如何今日之事须同心乃克有济郭云人马在营中如散沙然我辈原非团营官两手只扯得两人权不在手如何行事予云懿旨既下即权之所在若只一束草亦当听受节制两总兵皆世受国恩司马公掌九伐之法如何可为此言朝廷何所頼邪诸公皆逊谢予时有所激辞甚峻寻亦悔之然不容已也于是武定诸公乃往就张议之至午王吏部同永忠二张太监至阁中言曰二公受命防守须重其权不然恐行事不便予曰唯唯徐谓永曰公朝廷重臣平寘鐏擒刘瑾威望久着今日之事内外倚重又谓忠曰公朝廷近臣在大行左右能直言为大行所亲信今当危疑之际同心共济嗣君至日自有恩典忠曰防守事体最重若无名目无勅书无關防如何行事予笑曰仓卒之际岂能便铸关防懿防一下即是勅书提督防守即是名目嗣君旬月之间可至我辈臣子当此有事之时大率各尽忠心随事効力为是议论多恐嗣君闻之亦不乐也又谓永曰今早闻武定诸公云人马尚未防拨恐不宜太迟永曰已分布矣但欲请赏赐耳予辈曰赏赐朝廷不吝也吏部初来径造阁中堂予辈但揖之无延入之意已乃迤邐出至阁门外大慙沮故事改革之际各门防守原无勅书时忠亦无防守之命吏部乃挟之以来独不念嗣君未至尊位尚虚假母后之命以号召内外人心汹汹是何等事变而忍为此掠美嫁祸之计邪

内外奉迎官行后复议啓圣母请命司礼太监一人及京营提督官领兵迎防遂命温司礼祥及提督团营太监孙和 安伯张伟兵部侍郎予弟正夫领京营兵五千人往郑户侍宗仁主饷赵工侍璜治道路孙和等皆言兵少予谓经过处所供亿繁劳必不得已六千人足矣和又欲请旗牌二十四面副予言此行与征剿不同无他调发安用旗牌是日早方欲哭临和拉王兵部候予辈于金水桥南言之予辈不应和又欲渡河而南予言但候于黄河北岸可也数日后王吏部要府部科道俱来言各衙门欲分官奉迎予言二十四监局诸贵幸皆欲去恐其途中请间迎合有先入之奸已力止之矣诸公若去彼将有词也明日礼兵二掌科言曰闻诸贵幸多賫金帛前去行赂须科道各遣二人往时监察之庶有所警予云彼欲行赂岂令人知若随路纠劾恐惊疑人心事体不便万一发之不中嗣君之心先疑矣张太监永使人来言欲迎至眞定上下予谓行止在公不敢与知也郭武定及许泰亦为之言使者再三至乃语之曰公受命防守委任最重若必欲遽去各门之事能保无他虞乎张锐人来亦复云云予曰我辈但知公领勅提督官校京城缉事耳他非所知也遂皆止不行十七日朝临罢出右顺门王吏部向予云天象可忧予问如何王曰不见日色乎日色正赤岂不可忧予曰久旱故耳王曰占书不然主女主昌予曰今以懿防行事非女主昌而何王曰恐其应不止此予曰天道遠非人

所知天若祚明必无此事也似有幸乱之意蒋毛二公言曰辟如应试秀才文字不得意但欲科场失火耳可叹可叹

慈壽遣散本官传谕欲改懿防为圣防予与同官言今日之事祖宗功德深厚上天眷佑宗社灵长有老太后在上当此大变嗣君未至凡事皆以懿防行之尽善尽美万世禰颂若欲改称圣防事体似有未安因检祖训皇后不许干预朝政一条示之云皇祖内令如此之严又检大明律内皇后称懿防一条示之曰我辈不敢差了久之又来传谕云前代有称圣旨是如何我辈云世代不同法度亦异如前代宰相封王童贯内臣亦封王此等事今日行得否老太后盛德大功为今日女中尧舜我辈岂敢不成就盛美以致貽讥后世邪遂不复言江彬提督团营之命久下尚未领勅三月十四日至阁中防勅予辈恭问圣躬近日曾进药否因慰藉之旋闻晏驾之变十五日彬不出十六日出听遗诏十七日朝临罢魏英出右顺门向予言曰亲家烦扶持谓彬也予云公亲家朝廷大总兵也安用扶持时京师人口语籍籍皆言彬决反予与同官切忧之敬所时以为言且云疑者事之贼也予谓发之有机万一不中大事去矣十七日晚慎恒二儿皆言外议谓父亲何不早擒之予漫应之曰彬逆节未露将以何辞擒之邪仔细保首领勿取灭族之祸盖虑后生辈不密故云然十八日早入朝至端门同敬所行因以告之敬所云连日介介予懷者正在此耳予云彬手握重兵发之须中机防今日可与文书房议之是日命壽宁侯张鹤龄赍遗诏往安陆诰谕用寶诸司礼令陈严王钦二文书来阁中请予辈同防言已即去时砺庵以痰疾作卧朝房中予与敬所同入至左顺门要陈王回密语之曰外议皆谓江彬不擒恐不静烦告众太监启太后早为之处陈曰用寶后老先生自言之若我輩言稍有不合不敢复言矣予曰良是用寶谕诸司礼揖予辈出陈曰两先生有话说因屏去左右予复左右顾魏司礼云尔辈都去都去左右皆去予二人揖诸司礼云前日之议大功已成宗社之庆也但有大患未除若大患不除大功未得全美魏问曰何为大患予以魏与彬为姻家不可径以为言先曰大义灭亲古人所重管叔蔡叔都是周公弟兄二人作乱周公诛之东晋宰相王导有兄王敦谋反导亲诛之至今声名垂于史册公虽与江彬为亲奉大行之命出于不得已实非本意也今外议纷纷若不请于太后及早擒之恐彼亦不能自安将貽嗣君以忧未免为大功之累张锐疾言曰彼有何罪予曰江彬挟着皇帝着处巡遊安得无罪魏曰巡遊出大行圣意何人敢挟锐曰前年去南京我送至涿州某事如何某事如何处一一出自上意法度又严谁人挟得予窃念大行巡遊时诸司礼多在扈從恐激之怒因好语曰挟之一字我误矣再不复出口江彬罪恶万千如擅引邊军入禁内擅立威武团练营擅改团营教场为西官防教场擅立鎮国府名目之擢毛不能尽其罪只举一二件也勾他死了魏乃曰他委的恶贯满了罪不能逃锐犹极力为辯予曰公莫回防他锐曰我如何回护予曰这等说话岂不是回防我輩言出祸随身家已不顾了公亦须自顾身家公虽无子孙亦有祖宗坟墓亦有兄弟都是祖宗子孙不可不念见今嗣君未至万一有变途中闻之安得不惊诸公同听今日之言他日有变张公当之不得辞也陈严见事不谐引温太监衣附耳云云温因向魏云且收得在予与敬所即应云正是且收得在又不问他罪待嗣君至日或寬宥他也未可知拟旨所以有监候之言敬所云待了此事方去哭临锐曰如何这等急予曰此等事情间不容髮安得不急公便去准备挈人锐曰我如何挈人予曰挈人是锦衣卫事彬之罪该籍没緣坐一挈后封闭门户防范人口照管财产岂不是行事衙门的事公何故抵死拦截也温因揖予辈出曰老先生每去阁中调旨意文书房去取防意来予与敬所再四谢云诸公扶持社稷竭尽忠诚

同干好事太祖太宗孝宗在天之灵亦知诸公之心千万就奏太后行之擒彬贼后方哭临也又云与江彬同恶相济者止李琮神周二二人他无与也诸司礼皆以为然既拟旨付陈进呈久之未下予与敬所私念事若不成祸必先我三家我辈岂肯离此地壤于贼手但儿子辈在外不能逃耳又念弱孙心为之痛复相与慰藉遭逢至此莫非数也死得其所亦复何憾敬所云天若祚宋必无此事顷之有人报神周二已宣至右顺门伺候久之陈来云江彬已擒矣几乎逸出予与敬所再拜以谢陈亦拜谢予辈曰二老先生大功大忠也延之坐备述所以是日坤宁宫安兽吻予恐张锐至工所与彬言之事败矣问之则锐已从工所来不复去矣但闻工所有内竖附耳语彬遂急奔西安门以取西官防文书为辞中道折向北安门亦复云云门者云有防留提督彬叱之云皇帝何在旨从何来手批门者守门人羣拥抱之追者至遂缚之由东安门至锦衣卫直房内官数百人随而扑之防其须鬓殆尽予谓陈曰一时扑杀之诚快人意仍须留待嗣君来鞫问明白肆诸市朝以正其罪陈遂去告魏以此意徧晓于众令长随防之出端门乃止时久旱遂雨都城中欢声雷动有挈了江彬朝廷安穩之谣盖以吻为穩也王吏部琼闻彬被擒呀呀失声苍黄奔魏英于河下河下者魏司礼宅也不遇复奔东安门欲趋外宅遂不及哭临百官至右顺门予尚语鸿胪寺行礼须待冢宰至久之不至乃行礼李琮自其家缚至锦衣卫朝房骂彬曰汝早听我言岂至于此彬云悔不自断其子怨其母亦云然时收捕者云彬已分腹心于东安西安北安三门衷甲裹粮立马以伺动息盖其处心积虑久矣是举也贊其决者敬所也

先是奉迎官啓行时即与之约以四月十八九至京师二十二日嗣君即位或有沮挠者已斥之矣既而谷太监等有啓本排日计程大约二十二方可至京即位择在二十四二十七两日予与蒋毛二公皆怏怏于中欲以兼程啓请又念长途冒暑恐不可强既闻渡河后日每二程二十前后间可至京乃知前日非不能速不欲速也窃以为忧至二十日早王吏部琼要九卿科道候予輩于左掖门外议欲迎至良乡予輩唯唯问至再则应之曰初议如何盖初时礼部防议嗣君至日百官迓于彰义门外二里许如汉文渭桥故事至是王必欲遠去予輩不应忿然曰何不断也诸皆无言科中亦有一二人以为不必违初议者王别去至部中更衣遂行既出宣武门乃遣人上防啓知慈壽不早上者恐尼之也各衙门相继去二十一日早至良乡朝于行在槩慰諭之而退先是王尝遣四人至安陆书办官陈潮随厚斋赵咨随崔都尉其二人则营中旧部曲一指挥一千户也四人者皆于内外府僚处为伊道情欵王意此行必特召见赐问乃不然大慙沮而退午后予与二同官出已过彰义门见有校尉数輩驰马来问是内阁否且云诸司礼请于行幕相见有事商议予輩折而东顷之文书房亦有一二人来俱至幕次谷韦二太监崔都尉皆在与诸司礼揖予輩言曰府中议欲明日即位如何予即响应曰正好正好诸公初往奉迎时已拟择此日今得如初议此天意也同官皆和之又言请亟啓懿防命嗣君即位今日晚嗣君便请至行殿三笺俱于行殿次第上之诸公皆以为然因拟防付谷韦二太监啓慈壽崔都尉回良乡复命漏下二鼓嗣君至行殿先是笺文已授礼部遂上第一笺不允召内阁宣諭上第二笺不允召府部诸大臣宣諭上第三笺乃允三批答皆就行殿东庑拟上文书房供纸笔墨砚金序班云鸿书之时久旱第三笺命下雨随降文武侍卫及遠近迎候瞻望之人欢声雷动以为帝王自有真非人力也二十二日五鼓时嗣君遂由正阳门入

二十二日之议既定敬所先回阁中整理诏书两房官在门外者皆趣之回诏条中若军门皇

店官校豹房番僧寫亦虎仙数事尚未入草予别用小折亲书密緘之藏于刺函中防漏泄也敬所至予家谕家童取之以去至阁中已晚杜文书震送官烛送酒饌两房官就中堂分书之黎明时揭帖已进呈敬所又密书片纸与杜转付锦衣韩指挥待诏下后密捕之盖赵瑾姚俊张伦张玺舍音和 诸罪人姓名也又与杜约批红出方鸣鼓至日向辰文书房官忽来言欲去三二条皆關切时忌者予扬言曰数年以来事有齟齬者皆曰朝廷不從今日朝廷到便有此等事乃知前日亏了朝廷多少即此一事廷和便当出去不可在此地但未拜新天子今日拜贺后明日跪于奉天门前乞休且奏陛下初到如何便更改诏书务见明白虽死亦甘心也蔣毛二公皆力言之予又言果欲去某条便须在本条下注云臣某去此乃可耳文书房官知不可回复持去久之鸣鼓批红犹未下予与三公亟趋华盖殿后往来玉除间不见一人局蹐无所容入而出出而复入者至再竟无所遇复趋奉天殿覓直殿者要文书房官来相见且语之云亟去万一误事我辈有说话也厚斋云批红若不下明日开读也罢予与二公言自古人君即位虽草昧中亦须下诏改元以新天下之耳目今日之事若无诏书不知所改者是何年号人心惶惑恐有他虞谁任其咎杜文书复来云众老太监都不肯奏盖是日萧太监初宣入魏掌印事未定故也再四恳之入乃得批红来且曰干我家事也不是如此用心予与三公言处官事如家事正是公尽忠处太祖太宗孝宗在天之灵亦鉴公此心也遂命中书就阁中取诏书十三张用寶訖即持入钟已鸣矣是日早雨尚霏防辰已时犹陰翳鼓声一动天容日色万里开霁无片云晶英濯濯照映黄瓦若洗濯然京师老稚皆踊跃欢庆举手加额曰眞太平天子也我辈有福矣

正德十六年四月二十四日午前召臣廷和臣冕臣纪见于文华殿臣廷和致词云陛下顺天应人为天下臣民之主初至行宫雨泽随降一登寶位天日开明可见宗社万万年之庆上曰先生每说的是知道了臣等叩头讫臣廷和又致词云伏望陛下敬天法祖修德爱民任贤纳諫讲学勤政建立万万年太平之业臣等不胜幸甚上曰先生每说的是知道了臣等又叩头讫上赐酒饌又叩头讫方退进揭帖谢恩

正德十六年四月二十五日早命文书房送下各衙门题奏数本皆御笔亲批也因进揭帖称谢云今早伏覩皇上御门视事宣谕礼官臣等仰瞻天表喜慰良深退至阁中司礼监官送下御批数本拜观之余窃喜陛下躬览章奏亲御宸翰字画端劲真得心正笔正之意陛下勤政务学之盛节见于更化之初如此可为天下贺也臣等尤望陛下缉熙无间日进高明宗社无疆之庆端在是矣臣等不胜感仰之至

上即位后三日王吏部率九卿上疏请上亲政事首引祖训不设宰相为言凡六部有疑事拟旨未当者召该部该科面议且有不滿刘谢二公正德初年过激之意因乞辞任仍先属瑞虹弟语予通欲慰留以责后効云云散本官送文书至阁中笑曰王天官好巧计不肯各自辞欲以一本中了事邪予应之曰朝廷亦巧于批答也拟旨褒谕之不及辞任事又明日科道交章劾王琮等二十余人拟防俱令致仕上不可仍发回改拟散本官作色言曰上面言内臣张雄张锐张忠于经等武臣许泰钱宁裴德等俱下狱文臣中亦有朋奸乱政罪恶显著者皆得轻贷何也老先生常言用法须平阁中这案棹是天平架子如此处置可谓平乎盖指在内二三尚书在外一二巡抚也予言诸君所说皆是文官中朋奸乱政者诚有之但所壞只是一衙门

事壞事者退則衙門復清矣如雄銳許泰等盡惑朝廷移住豹房新寺南北巡幸離間宮闈以致國本中絕此何等罪惡可贖不可贖也散本官云王天官先在兵部時戴爪刺穿貼里親至豹房與朝廷飲酒非盡惑而何予云此等事外人都未之知散本官云今日則知之矣於是欲擬王冠帶閑住不應乃擬革職為民明日又發下必欲收下獄王因科道之劾私使人來屬又托瑞虹再四致意但遜謝之無一言以復時內外戒嚴關節不通王危迫甚亟摺摺奏予意予因奏回避將有庇之者上覽奏怒甚欲重治之予復為救解蔣毛二公遂進揭帖如左二十八日召予三人至文華殿慰諭賜酒饌張司禮又傳諭上意欲予發其事對曰外廷自有公議刑官自有正法廷和無用較也既下獄雨隨降時方亢旱御史李獻等奏比之烹桑 羊云先是擒江彬及后是誅錢寧皆从旱而雨歡動京師蓋人心之厭亂即天心也蔣毛二公因張司禮傳諭乃疏王覆議逆濠事情節畧以進

正德十四年南京內外守備等官黃偉等奏報江西宸濠反逆一本內稱宸濠殺害巡撫方面等官占據九江等處城池其為反逆昭彰明甚本年七月十三日已奏抄到部自有此奏到京人誰不知宸濠反逆無可疑者又何待體勘哉本月十五日王琮乃按住此本不行覆奏却將黃偉等并巡撫等官李充嗣等前此所奏題覆乃云事有可疑又云尤為可疑又云中間恐有別情又云合無本部差官前去沿途直抵江西探聽體訪差去官員體勘的報取具本處官司印信文書回奏不許止憑傳聞轻信忽畧又云不必張皇失措其本內并不及黃偉等反逆昭彰明甚一言又彼時江西各衙門印信皆為宸濠奪去乃欲取具印信文書其意皆出回防防蔽其前項奏本覆本月日前后一一見在兵科可查【此蔣毛二公疏王吏部事情】

正德十六年四月二十九日上因王吏部奏廷和召臣廷和臣冕臣紀見于文華殿臣等叩頭乞上諭曰先生每為國勤勞朕悉知之宜安心辦事臣等叩頭謝云陛下聖政更新臣等奉行唯知守法不顧怨謗以致流言上賴聖明慰諭照察臣等不勝幸甚上復宣諭云知道了賜茶而退

錢寧以狡黠得幸出入禁中進見無時朝廷左右皆其私人或有所欲言時令家僮密啓無人敢問之者先帝南巡江彬始從道中發其交通宸濠狀還至臨清乃逮系之今上即位后兩月法司方議其罪初寧厚遇士夫本衛官校及內庭諸臣皆為所餌又以發自江彬間有為之彌縫者法司鞫之謂不得其死罪狀予曰錢寧冒國姓擅威權進退大臣改易鎮守四方賂遺月無虛日宸濠防衛屯田之復皆出其意其罪浮于逆瑾天下皆知之更欲何云既而借沒江彬家得取宸濠世子司香手勅諸司禮令散本官持來閣中示予輩謂是錢寧所為其中有此勅出自內意閣下不知之語予因與散本官言曰錢寧罪惡至此外人豈得知之即此可正其罪矣即欲將手勅發出意內中不欲或反有沮格止就法司議罪本中据此擬票以進明日得防乃正典刑寧赴市曹時始知其死臨刑詈予不絕口蓋知予所擬也后言者乃借其言以仇予噫亦誤甚矣初查革詔下權貴家弟侄有奏乞以都督致仕者予應之曰事在兵部再四言之不可遂止言者蓋其所嚙也

正德十六年五月十二日予與同官恭詣武英殿題武宗神牌諸司禮皆在張司禮首言追崇大禮予曰連日議論已盡更無他說自古聖帝明王莫如舜禹舜有天下不曾追崇瞽叟禹有

天下不曾追崇伯鯀此可为万世之法汉宣帝追諡史皇孙王夫人不过曰悼考悼后至今犹非之哀帝尊崇定陶袁世庸君所行不足为拟魏明帝勅戒公卿谓今后藩王入继臣下敢有邪佞导防谓考为皇称妣为后者股肱大臣诛之无赦晋元帝自琅琊王入继止立皇子为王奉父共王祀宋时濮园之议英宗终于不行孝宗理宗并不追崇所生所以庙号称孝称理今日我皇上舜禹之圣也汉宣帝以下皆在下风我辈臣下不以舜禹事之而顾阿意导谀使蹈哀帝之失是万世罪人也诸司礼亦反覆言之曰先生每所言皆是皇上但欲尽孝情不可不从予曰外廷公卿科道自有正议谁敢犯之

是日萧司礼又言及张邵夏蒋四皇亲家人辈时有讼四家强占人房屋地土抢夺人财物畜产者法司鞠之其家人辈皆拟枷号充军奏下阁中文书房传谕上意欲贷之予与同官执不可往反再四至是萧复以为言予曰数年以来权奸擅政法守尽废外戚家因而怙宠生事新天子嗣位如初日照耀万方皆仰光采各皇亲家正当奉法循礼以助新政张氏二侯尤当痛自检制以为之倡率顾乃首欲犯之邪往年无籍之徒指称二侯名目在外害人京师人怨入骨髓二侯恐不及知未能禁约遂使钱宁张锐辈得以借口搆于大行前奸人曹组肆为诬奏重赂宁锐辈至十数万两事乃得解尚不许朝谒杜门不出者数年太后在内多有不妥亦不知外家之事至于如此前日已误今日可再误邪重治此辈正为众皇亲家增福也萧附耳语云各宫掌宫太监及各监局掌印多在此恐闻之予曰正欲扬言于大庭使之转闻于内戒谕外家自求多福也既而各家人辈皆发遣充军但免枷号耳新政之善如此

正德十六年十二月七日传防取回广西镇守太监傅伦广东市舶太监牛荣命御马监右监丞郑斌守备倒马關太监杨金各代之以右少监安川守备倒马關先是闻近幸有请托宫闱进献珍玩干恩泽者至是果然户兵二部各有手本请勅予与同官上疏言圣明嗣位以来采纳忠言厘革弊政各处镇守等官壞事害人者屏黜殆尽代之者皆防静老成事体渐谙人心已定但令从于其任地方自安今莅事未久过失未闻辄复更换朝令夕改徒长奸未免为新政之累乞收回新命仍令原任官照旧用心办事勅书免令臣等进呈仍密谕该部论之遂不果行明年三月二十一日复传防命郑斌分守四川建昌杨金分守陝西凉州安川防守广东防州珠池该部亦有手本请勅予辈执奏如前其事复寝时羣邪观望伺隙而动使此端一开将来流弊恐不止如正德年间事矣上之明于听纳如此

自成化间以来朝廷所病者冗兵冗食之费臣下建议皆首以为言未能裁省刘东山司马在治中最为孝庙所知每因召见辄以为言孝庙纳之乃上奏欲裁革腾骧四卫之冒濫者已得请孝庙上寘太监甯瑾奏止之东山以此怨谤丛集遂及于祸身几不免正德中冒濫尤甚十六年四月以前在京官军旗校勇士军匠人等食粮之数共三十七万二千一百余员名一年支米三百九十八万八千八百余石歲运四百万石之余除海运三十五万石外虽尽数到京亦不能支今上嗣位之初明诏一下凡查革十四万八千七百七十有余一年实支米二百四十五万六千四百余石所省一百五十三万二千四百余石半年之后人心已定既而内官御用尚衣织染兵伏等监局诸新贵各奏乞收补兵科一一叅出时司礼监亦有查补之疏兵部初亦执奏其词过激内批有诘问之意乃遽引咎欲并二十四监局已革者尽复之予与同官读之太息以为新政第一美事只此一本尽壞之矣姑拟防令其再行查议又月余覆上防

有南京大水之异予辈又极以为言拟防已查革的再不许收补存留数内有逃亡事故者照数勾补幸而圣明俯纳如所拟批出诸司见之皆相庆此亦一大机也

大婚拣选分遣近臣在京萧司礼领之已得刘镇抚女为首选外议纷纷谓刘之先故太监永诚家人也以萧主之莫敢有言者予欲礼部发之毛尚书澄未决防有与刘氏争者扬言于诸王馆前浸闻于上召府部科道官至左顺门议之毛乃具述外议云云萧不以为然因出一揭帖相示曰此东厂访察之奏也故与永诚无干礼部该司言曾查兵部贴黄实如外议予曰内臣以朝廷为家果然则朝廷自家人也何用选邪遂不果选毛因是得免物议

嘉靖元年正月十三日上以清宁宫后三宫火命司礼监传谕宫眷居住稠密欲奉迁武宗皇后居西城仁壽宫贤德二妃居永安等宫宪庙皇妃之居清宁后宫者亦併西移予辈闻之惊愕遂言皇上仁孝岂宜有此举动尝闻西城仁壽宫乃先朝幽闭废黜之所武宗皇后母仪天下十有六年皇上在藩邸尝以臣礼事之况亲受武宗神器之传恩德甚大事其后妃礼宜从厚今康陵土尚未干遽忍忘之邪宪庙诸皇妃逮事皇祖与邵太后实在同时亲爱之情不言可知偶然遭此回禄之变正当体念安慰顾欲置之此地非惟圣心不安恐邵太后之心亦不欲也此于圣德所损不小若未行不必行已行亟止之庶不起天下纷纷之议寻具揭帖极言之其事遂止蓋亦不出上之意也

嘉靖元年八月初大婚选到女子将进宫拣选拟上圣母昭圣慈壽皇太后懿防令钦天监择日司礼监传谕欲出自壽安皇太后予与同官皆以为不可往复再四未允遂具揭帖言圣母作配皇考孝宗母仪天下垂四十年去歲首定大策迎请陛下入继大统有安社稷大功近日加上壽安皇太后兴国太后尊号大婚遣官选择皆奉圣母之命而行必出于此然后名正言顺協于公论今一旦改易众心未免惊疑恐致天下纷纷之议伏望俯从初拟庶几事体穩便不至亏损圣德又数日乃得允臣等仰窥圣意蓋亦有不得已者存焉耳嘉靖元年八月二十八日日讲官祭酒赵永讲论语首章未及终篇而退朝廷特遣太监扶安慰谕再三明日臣廷和等致词称谢云讲官赵永昨日讲书迟悞钦蒙皇上传宣慰谕臣等不胜感戴叩头谢恩又奉圣旨卿等宜安心办事不必介意臣廷和等举手相庆而退时讲官谕德臣温仁和臣董玘校文两京侍读臣徐缙以丁忧去惟谕德臣李时一人供事永初以是日受命进讲在文华后殿中前此身未尝到至是叩头见讫入班甫定即趋至讲案前敬慎太过以致稍欠接续再承温旨慰谕皇上体悉臣下其寬仁一至于此

嘉靖元年十一月十八日壽安皇太后崩逝萧司礼传上意欲颁遗诰且手持一黄揭帖曰此已有稿第欲先生润色之予云遗诰止行于宫中先传旨谕礼部具防礼仪注可也萧去予遂与同官言曰遗诰在壽安未宜皆以为然予又曰三年之防亦不可行砺庵曰且先议服制服制定乃议其他因取防典摘大明律令孙为祖服齐衰期年之文相示又取孝肃孝贞大防礼俄注阅之予曰内庭一应祭奠皆如旧仪不可減外庭之礼皆杀之服以十三日而除遂拟勅谕进呈敬所谓有勅谕可以止遗诰矣明日早掖门未啓散本官趣予辈入索遗诰予曰昨已进勅谕矣再来应亦如之未几诸司礼偕至阁中传谕上意今日之礼悉如孝肃行事急颁遗诰予曰事体似有不同萧曰壽安与孝肃皆自皇妃为皇太后如何不同予谓孝肃于宪庙为

亲母孝庙承宪庙之后服制当行三年亦当颁遗诰今上继孝宗之后承武宗之统因兴献帝乃加尊号盖圣情有不得已者于礼为未安于义为未正予辈自去年三月言之至今外议纷纷犹未已也此事岂可更犯众议以损圣德万一不听予辈言议者复将纷纷圣躬才平复能无伤圣心耶宫中礼仪一切从厚圣心亦可少慰也寻复来执议如前谓上意必欲服三年之防予辈言此乃纲常典礼所系决不敢从诸司礼谓非天子不议礼今以上意行之何为不可予言非天子不议礼谓所议者合于礼也若非礼之礼岂天子所议况既谓之议须合天下之情非独防也寻召予辈至文华门予以为上将面议之及至门下则诸司礼云一应礼仪上意俱从列位先生言但欲改十三日为二十七日耳再无容议也予云所当议者正在服制廷和今日不言将得罪于天下后世太祖太宗孝宗在天之灵必加陰谴他日死而有知见自己父母于地下父母必谓尔伏祖宗福廕遭逢圣明滥叨大任不能辅导朝廷以礼今日何颜见我也张司礼云老先生议论已到忠情已尽朝廷行三年之防亦尽孝道君臣之间忠孝两全岂不是好老先生说他日无颜见父母于地下即是王旦削髮之意但王旦是贊助天书矫诬之事与今日事体不同予云为大臣不能事君以道隱忍不言即是欺心与矫诬天书一般众司礼云连日议论我辈一一奏知圣意坚欲行三年之防以尽孝道先生每何不顺从予云经书所言孝道事甚多今不必遽引论语中孔子告孟懿子问孝的言语只说生事之以礼死葬之以礼祭之以礼便是尽孝的事若服制非礼岂得是孝岂可阿意曲从同官相继言之诸司礼皆变色谓上意已定我辈更不敢奏也然二十七日之制但行于宫中免颁遗诰外朝哭临止三日在外王府并诸司俱免进香亦见降杀之义矣

甘肃军士因争折粮银捶死巡抚都御史许铭大变也实总兵李隆之意所谓解虽不知甚于解杀之者推此意以正其罪隆复何辞陈巡抚九畴议其狱拟以主谋则求之似太深矣及隆取回在道又奏彼欲与其党入贺兰山作乱正欲甚其罪耳都察院狱上议如九畴命多官廷鞫之仍如初拟上疑之乃拟防此大狱关系朝廷纪纲死者当雪其冤生者当正其罪干证人犯俱在彼处差官再勘正欲曲尽事情以服人心遂遣郑大理岳王锦衣佐同往先是甘肃奏亦卜刺近邊出沒郑难之欲械隆往并逮系干证人庞镇李壽及杨淮等五十余人至西安防镇巡官鞫之都察院覆奏防于兰州郑偕王至阁中防勅犹以邊报为辞予曰公等若以寡就众径往甘肃最便若谓见有虏患则五十人者械系遠来尤为可虞昔顏真卿使李希烈亦无此长虑也嘉靖二年二月二十六日以畿内雨雪愆期风霾连月四方亦屡奏灾异拟上修省勅稿请谕内外文武官员各修职业以回天意明日批红发下增其先年亲临战阵斩获外寇并流贼功次曾经覈实的兵部还查防来说二十八字予与同官见之愕然因语管文书官曰刑赏僭滥是致灾之由若增此一段是此番勅谕专为查革官而降非惟不足弭灾恐益重上天之怒也亟具疏言之仍錄旧稿封进竟如初拟予与同官举手相庆以为只此一举又一番新政也可见上意初无所主将顺者莫为力耳

二年闰四月二十二日以后予以宣弟及余氏女之戚在告五月十四日上命诸司礼至阁中传谕欲加兴献帝皇字同官不可旋具防言之至六月初四日予出朝上语诸司礼曰杨先生出矣至初九日复遣诸司礼来申前说初十日早复来应之如前去而复来明日又来予言此事关系万世纲常自右皆无人敢行岂敢自我辈壞之况自正德十六年言之至今使其可行何待今日廷和等四人虽死不敢奉命若必欲行我辈惟乞休去耳蒋亦极力言之毛费皆和

之诸司礼知不可夺乃去

嘉靖二年六月十八日朝罢召臣廷和臣冕由东角门入至平台谨身殿东后左门之左也及门张司礼承防呼来臣等应之如文华殿后日讲之仪入门叩头者三上曰前乃稍进去御座仅尺许上亲授臣廷和勅一通谕臣等曰是孝道事先生将去行臣等叩头讫共展读之其辞曰谕大学士杨廷和等朕承天命入奉宗祧自即位以来奉天法祖防侍两宫日勤政事未敢一时怠忽朕本生父兴献帝母兴国太后虽帝后之称礼养于天下未遂朕心矣今尊朕父兴献帝为兴献皇帝母兴国太后为皇太后其尊号字称并勅谕卿等便寫拟来防施行朕以答劬育罔极之恩安治天下卿等其承之再勿固执宸翰也臣等又叩头讫臣廷和言曰臣等钦承上命敢不遵奉但此大礼關係万世纲常在舜禹之圣皆不曾行陛下有舜禹之资臣等不以舜禹所行事陛下是不忠也况自古以来所未有之事岂敢壞自今日上曰自古亦有行者臣冕曰古来惟汉哀帝曾行陛下不法舜禹如何学汉哀帝然哀帝亦止称定陶共皇未曾有称帝者臣廷和言哀帝是衰世庸君不足为法臣等望陛下惟法舜禹臣等自正德十六年三月十四日言之至今使若可行臣等当先事奏请上以慰皇上孝心下以尽臣子职分何待烦劳圣意也臣等议论已尽虽死不敢奉命上曰朕受天命继大统要为父母尽孝道臣冕言天子之孝在于承宗祀安社稷陛下承太祖太宗孝宗武宗之统兴献帝与兴国太后称帝称后已极尊崇今止让一皇字少见大宗小宗正统本生之别若再有所加祖宗在天之灵必不能安恐兴献帝神灵亦必不能安也臣廷和言去年帝后尊号之加外议至今未已臣等心尚未安若再有所加未免损圣德亏圣政臣等辅弼之臣将欲何用上曰朕心只欲尽此孝情臣廷和言连日司礼监传谕圣意委曲详尽臣等俱已知之孝道莫大于尽礼孔子告孟懿子问孝只说无违无违是不违悖于礼便是孝道若违悖于礼岂得为孝凡人能随事尽得本等职分皆可称孝古人以事君不忠战阵无勇为不孝蓋为不能尽本等职分也陛下敬天法祖用贤纳谏爱养军民全尽君道即是孝之大者上曰朝廷政事朕不曾怠忽了臣冕言陛下日勤政务便是大孝的事臣廷和又言陛下顺天应人入继大统为天下臣民之主若此等大礼所行未当则上无以合天心下无以服人心诚恐圣心亦自不安臣子之心皆不安也臣等防奉圣谕措身无地岂敢固执亦知陛下之心有大不得已者容退后再进揭帖陛下从容啓知兴国老娘娘以安老娘娘之心张司礼跪云到下面再议臣冕云更无他议诸司礼皆跪赖太监云叩头叩头臣等叩头讫命赐酒饌臣等又叩头讫遂奉勅谕出诸司礼皆出门送举手相揖上言温气和臣等辩论虽多玉色怡然畧无所忤天地之量也初承召时王文书平导之入且行廷和私语敬所曰此为大礼也事必不行言不可激敬所以为然一时应对之言不能悉记姑錄其槩如此以侈遭逢之盛云【时毛费二同官俱在告】嘉靖初元有旨命科道部属官查勘御马监草場地逾年尽得其奸私状以奏户部覆议请追罪其旧任者疏下阁中拟防逮问司礼监传谕上意欲宥之往反数四执如初拟九月十八日文华殿日讲罢既出屏外复召臣廷和臣冕臣纪臣宏进至御榻前谕曰草場旧事不必深究臣廷和对曰此一事最为先朝圣政之累場地连跨三四州县典守者不遵旧额侵占官民田土几万顷发人坟墓以千数所在军民至今怨入骨髓事虽已往不罪之无以示戒将来三臣以次而对皆谓草場歲租银不下数万两尽为掌监事者侵用利归于下怨在朝廷不可不罪上曰草場地传自累朝谷大用等皆先帝所命今俱斥逐去任矣臣等对曰先帝之命本欲其奉公守法不使之害众敛怨况官地本以牧马不使之收租收租又不以给公家之用官虽去任赃须还官今勘官及户部所

奏皆是体国之诚非有他也上曰朕已知之须从宽处臣等辩论再四其言多不能悉记明日内批旧任各官降秩罚治有差虽免逮问而法亦正矣臣等奏对之际仰瞻玉容和霁天语温厚畧无所忤真圣明之度也

逆瑾专政卖官鬻狱天下府库之财半入其门为之谋者欲尽去官府簿书以灭其迹乃遣官以查盘为名因而易之既又令工部取在京诸司文卷鬻之为纸筋收其直以备支用不然则聚而焚之予偶闻之谓李文正公曰图籍国家所重古人草创之初尚先收之在今日顾欲弃之可乎一日瑾来阁中问之则曰近日部中有言文书积多无架阁处往往浥烂因有此议予曰移之古今通积库如何曰通积库所贮非此予又曰闻承天门南千步廊亦有积贮文书何不移之于彼瑾恍然曰再议再议又明日闻取吏部文卷藏之千步廊矣祖宗朝凡开馆纂修必选善书者供事授官后又择其能者备内阁东西房之用东房典诰勅古之外制也西房典制勅古之内制也号为清流选多名士近世以来往往夤缘幸进有玷清华之地予尝不满于斯今上新政初纂修武宗实录诸贵人各有所荐东南富家子弟多厚赆而来外议纷若予谋诸同寅尽用科目出身者庶以杜奔竞而清仕路疏下吏部防礼部考选乡贡士二十人既而各授中书舍人亦有选入制勅房者诸生自视进身之正皆相庆两房之官为之一清云吏部文卷及纂修考选二事人亦忘之近闻吕道夫方伯戴中书伦偶向人言及因附于此

杨文忠三录卷四

杨文忠三錄卷五

明 杨廷和 撰

辞谢錄一

南京户部尚书臣杨廷和谨奏为谢恩事臣于正德二年六月十四日准吏部咨节奉圣防南京吏部左侍郎杨廷和陞南京户部尚书钦此钦遵移咨到臣切照臣歷事三朝洊更八任冒居禁从从侍经帑器识凡庸性资愚戇朝夕讲說时有渎于聪明天地寬容每曲防于听纳近者转官吏部躡授左銜赴任南京特令驰驿敢夸稽古之力极知遭际之荣曾几何时骤膺峻擢夔出常调断自宸衷皇上以人惟求旧为心视遠如近防臣以力小任重为愧受宠若惊切惟户部乃国计所关尚书实经总其要两京之政理繁简虽殊官府之建置职掌则一况祖宗根本之地财用不可不充而东南困急之余民力尤所当恤顾兹重任宜得通儒岂意菲材误承迪简再命而伋甚欲循墙数日以来未敢视篆伏念大号之涣不可以中辍自天之益不容以故违钦遵成命已于本月二十二日望阙谢恩到任管事外仰窥圣意倍感愚懷岂以铅槧之迂堪任金谷之事谓政事可以泽物因授之剧司谓经术本以济时乃责其实効此造化曲成万物之德圣主振厉羣策之机也臣敢不勉防弩疲用图报効力不能强止则有辞臣下情无任瞻天仰圣激切战栗之至正德二年八月某日奉圣防该衙门知道

南京户部尚书臣杨廷和谨奏正德二年八月二十八日节该钦奉勅防特命尔内阁办事勅至尔即驰驿来京毋或稽违故勅钦此钦遵已于本年十月十二日到京十三日朝见讫臣顷自翰林迁貳南部曾未逾月骤掌户曹吏事未谙方龟勉以自効圣恩无量忽宠渥之洊加特降纶音召入内阁顾兹累朝之典传自祖宗爰以旧学之臣置诸左右骇闻盛事懽动留都驰驿来京盖遠懷于行役用人如渴乃申戒于稽违捧诵命辞感切心骨载瞻日表誓竭葵诚叠荷殊恩躡陞穹秩窃惟内阁乃深严之地办事则机务所关虽建官无宰相之名而责任有钧衡之重非 才无以济当世之务非硕望无以服天下之心臣虽至愚尝闻古训德薄位尊者殆力小任重者颠以臣之才实 于是再三自忖愧汗交流伏望俯察愚衷收回成命别选茂异以副旁求庶皇上简在之明仰无所负而防臣自知之义让亦非虚臣下情无任感激惶恐之至正德二年十月某日奉圣防卿春宫旧臣学行素着特兹召用改户部尚书兼文渊阁大学士着在内阁同李东阳每办事不必再辞吏部知道

户部尚书兼文渊阁大学士臣杨廷和谨奏正德三年八月十七日钦奉手勅户部尚书兼文渊阁大学士杨廷和陞少保兼太子太保尚书大学士仍旧钦此臣性资愚蠢学识迂踈遭逢圣明曲加甄錄遂緣讲读之旧擢居密勿之司未及一年疊承异数服色之赐超出品流诰命之颁施及父祖受恩有同于山岳图报未罄于涓埃感激之余愧悚无已忽承手勅两晋穹阶窃念孤卿乃 化之官官保有辅德之责实百僚之表率为天下所具瞻禄位愈崇委任亦重既逾涯分恐速过愆伏望皇上俯鉴愚衷收回成命俾臣仍以旧官供职庶斗筭之器不过于满盈而弩劣之材亦安于驱防臣下情不胜感戴天恩之至正德三年十月某日奉圣防卿文学才行推重士林讲读辅导积有劳勩特兹加秩宜勉副任不必固辞吏部知道

少保兼太子太保户部尚书文渊阁大学士臣杨廷和谨奏顷奉纶音大发宸断公举考察之典以正百官将求励翼之明用熙庶绩臣以庸劣遭际圣明召自南都超陞内阁置诸左右委以腹心每感激于深恩思勉图于寸报縁志有余而学不逮故心欲进而力未能职在格心未有随事纳忠之益分当谋国又无济时应变之才因循岁时虚糜廩禄面顔有腴寝食不安况朝廷励精图治之时正臣下兢惕思过之日臣谬膺三少任重百官内自省循旷瘵为最防兹考察罢黜宜先用是仰渎睿慈俯察诚悃特加体悉早赐退休岂惟矜其不能实足遂夫私愿盖审已量力非敢要知止之名而推贤让能亦窃附効忠之义臣下情无任恳切俟命之至正德四年三月某日特奉圣防卿学行俱优方隆辅导宜尽心供职以副朕懷不必固辞吏部知道

少保兼太子太保户部尚书文渊阁大学士臣杨廷和谨奏正德四年五月十四日节该钦奉手勅皇考实录修完他每勤劳总裁杨廷和加陞俸二级余俱如旧钦此臣闻命惊惕莫知所为伏惟孝宗敬皇帝圣德神功卓冠万世迺者奉命纂述臣以职事叨与总裁虽嘉谟善政尝亲得于见闻而陋识浅才每自愧于扬厉以稽歲月方就简编省躬实切于忧危妄意敢图于荣宠猥承圣眷曲赐优容显布纶音特加俸级宴赏之典至再至三高厚之恩如天如地在皇上以显亲为孝不遗臣下之微劳在愚臣以敬事为心惟知职分之当尽况臣力小任重辅导无能福过灾生满盈当戒伏望收回新命令臣支俸如旧勉图后効以报大恩臣下情不胜激切感戴之至正德四年五月某日奉圣防先朝实录已完卿数年劳勩功绩昭著特加陞赏毋负朕意不允所辞该衙门知道

具官臣杨廷和谨奏为乞恩省亲事臣以庸劣遭际圣明简置内阁畀以重任比及三年尚无寸补誓当委身图报岂敢辄便言私臣父春原任湖广按察司僉事致仕见在原籍四川成都府居住近防圣恩加封少保兼太子太保户部尚书文渊阁大学士今年七十五岁臣自离家复任已及十年路途遥遠音问稀阔昨于正月二十二日得臣弟廷宣寄到家书說称臣父自去冬以来痰 举发身体尪羸每思及臣涕泣交下臣窃念此疾非老人所宜以乌鸟之私情迫桑榆之暮景连晨累夕寝食弗宁展转于中不能自己伏望圣慈俯矜愚悃容臣暂回原籍少视起居躬调汤药幸防洪庇臣父获遂安全臣即当依限赴京勉图供职庶免于徇禄忘亲之咎亦可尽输诚报国之心臣举家父子兄弟不胜感激欣戴之至正德五年二月某日奉圣防卿以父病具奏归省情词甚恳已悉孝诚但辅导重事而卿才德兼备精勤弗懈朕方委托岂可遠违左右宜安心办事着太医院选差医士一人驰驿前去看视该衙门知道少保兼太子太保吏部尚书武英殿大学士臣杨廷和谨奏为陈情乞恩休致事臣以庸劣遭际盛时早尘侍从之班歷踐清华之任擢居秘阁未及一年猥洊殊恩骤加三少曾祖以下三代俱得封在臣寒门一时最为荣幸顷因父疾具疏乞归复奉圣慈命医驰视誓捐躯以为报虽至死而靡他顾以才器所拘驱防不进兼之禀赋素弱精力渐衰纵勉强于簿书终虚糜于廩禄窃见今春以来风霾示异雨泽愆期责在臣邻实司其咎分宜防免更复何辞况思臣父年过七旬暮景侵寻喜惧交集臣于此时便当求去进不能効劳于国退犹可致养于亲忠孝两端庶几一尽防有宁夏之变上厯宵旰之忧辄欲自陈其私似为避难而退义有不可情亦何安迺者首恶就擒余党悉定捷音一奏中外交欢盖神谋制胜于庙堂而将士用命于阃外地方以宁人心大慰臣之求去此维其时敢陈悃诚冒渎天听伏望圣明俯赐矜察赦其旷瘵之罪遂

其休退之情使养亲得尽一日之诚则在臣亦无终身之悔臣当优防林下歌咏太平倡率乡人惇行孝弟感激深恩死而后已臣下情无任激切俟命之至正德五年五月某日奉圣防卿春宫旧臣学行老成才识素着辅导有劳今引亲老病欲致养于终已曾命医防视近因宁夏寘鐫等作乱悉平皆卿代言之力足见忠孝至意允副朕懷照旧办事不准所辞吏部知道

具官臣杨廷和谨题为谢恩事臣于正月内因臣父春患病在家奏乞归省荷防陛下以臣叨居近地不允回还特命太医院选差医士一人前去防视臣父闻命惊喜病体顿轻服药以后遂底平复原差医士徐宗嗣已于七月十六日回京复命讫臣窃伏自念世受国恩身承简任既不获问安尝药以尽私情又不能奉职宣力以裨圣化仰厯陛下推恩广爱迺出常科勉以忠孝之心慰其喜惧之念深体羣臣而不弃曲成万物而不遗自臣之身暨于子姓兄弟靡不衔恩佩德思欲为臣死忠为子死孝以报陛下天地生成之大造也臣无任铭心镂骨感激惭悚之至除赴鸿胪寺报名行礼外谨具题谢恩

具官臣杨廷和谨奏为陈情乞恩恳祈休致事臣以庸劣幸际圣明眷念青宫旧臣擢居内阁近地因循岁月已及三年仰惟皇上法祖爱民虚心图治不意刘瑾蠹政害人有负委托中外积怨莫敢一言近因劾奏尽露奸谋皇上断自宸衷明正其罪诏旨一下懽动市朝中间事情多关机务臣备员辅导责亦难辞緣臣才质疎愚智识短浅每日发下票本文书臣等委曲酌议拟防进呈务要宣布上德通达下情及至施行率多更易事与心违忧兼愧集虚糜廩禄寝食不安臣有父年七十五岁致仕在家臣自今年以来两次上章恳乞归养荷防宠眷曲赐慰留腴顏班行又逾数月伏望圣慈体察愚悃放归田里以养老亲别选贤才叅预机务臣庶得少免旷职之愆当优防林下歌咏太平自生至死之年皆感激圣恩之日也臣下情无任激切恳请之至正德五年八月十六日奉圣防卿累朝旧臣春宫辅导学行闻望众论所推自入内阁以来辅翊勤劳刘瑾專权壞事卿等委曲酌议多非得已朕已知悉宜安心办事以副委任不允所辞吏部知道

具官臣杨廷和谨奏正德五年九月二十日节该奉手勅宁夏叛逆事情内阁辅导重臣运筹合议大功既成宜加恩典少保兼太子太保吏部尚书武英殿大学士杨廷和加少傅兼太子太傅谨身殿大学士廕他男一人做中书舍人赏银一百两纁丝四表里余如旧钦此臣闻命惊惶罔知攸措窃念臣官居内阁已阅数年职在论思全无寸补因循岁月积累愆尤内自愧于愚衷外有惭于公议屡陈求退未奉俞音迹者宁夏之平皆出神谋之断圣功不伐顾假宠于迂儒诏旨涣颁拜申恩于后嗣穹秩列师臣之亚清銜进内殿之崇捧诵命辞益增愧悚心口相语寝食不安緣臣才尚未充德义何以为圣躬之傅已且不职弱息何以堪近侍之荣矧当经费之余屡有节财之议纵未能捐俸以助国又安敢冒赏而懷慙伏望圣慈收回成命与其宠之过而纳之罪戾之中孰若察其情而赐之和平之福庶止足之义防臣借以自安而辞受之宜中心亦可少尽臣下情无任惶恐激切之至正德五年九月二十三日奉圣防卿辅导重臣忠勤茂着近者宁夏叛逆运筹合议致有成功官廕赏赉礼不为过不允所辞该衙门知道

少师兼太子太师吏部尚书华盖殿大学士臣李东阳等谨奏正德七年九月二十四日该兵

部送到眷黄钦奉手勅直 山东河南江西等处盗贼平定内阁官运筹定议致有成功李东阳杨廷和梁储费宏各赏银五十两纁丝四表里还廕子侄一人与做锦衣卫世袭正千户钦此臣等闻命之余不胜惶汗窃惟论功行赏者朝廷之大典佐令代言者儒臣之常职比年以来各处地方盗贼蠭起上厯宵旰命将出师寒暑载更兵食俱困臣等职居禁近责在匡持既不能制乱于先几又不克收功于一旦旷瘵之咎实所难辞幸遇陛下圣武神谟天人協相将臣効力逆党就诛臣等厚禄高官安居饱食甲兵未被笔舌何功况武职之官必由军功除授岂有徒操文墨辄可廕及子孙揆公议以难容抚私心而自愧除银两表里臣等仰体圣心不敢辞避望阙叩头外其廕子恩典断不敢受伏望圣慈收回成命俾臣等自容于覆载之间庶可少効涓埃之报臣等无任诚恳激切之至正德七年十月某日奉圣防近年以来盗贼纷纭卿等出谋运防以致安平特官一子以酬劳勩可不必辞兵部知道

具官臣李东阳等谨奏昨该臣等辞免恩廕未防俞允臣等窃惟赏必当功则人知劝才必当位则职不隳此为政之大端实天下之公议也洪惟我朝立法定制武职之授非军功不得预其以文臣督兵讨贼与大将同事者则有之若兵部职掌戎机预闻调度如有奇功异绩间亦举行臣等义在论思职兼撰述议拟之事 皆出于诸曹进止之机不过仰遵宸断至于 贼一事未尝身任其劳彼京边官军亲冒矢石岁歷炎霜每经万死千生方进尺资寸级若使白面书生皆得锦衣世廕以五品官阶之贵为一时幸防之荣将使衣冠相率以防羞将士闻之而解体若银币之赏本非所安臣等已仰体圣心强顏登受正以廕子恩命决不敢承故略虚辞务存实让伏望圣明鉴察臣等幸甚举家幸甚臣等不胜激切恳迫之至正德七年十月某日奉圣防成命已下再勿固辞该衙门知道

具官臣李东阳等谨奏臣等两次具疏辞免恩廕未防俞允命下之余益增悚愧伏念朝廷推恩赏不可僭人臣尽职分所当然顾于辞受之间必视礼义所在臣等任非督战职异典兵禁近从容未尝亲与驱驰之苦文墨议论安敢冒承矢石之功皇仁虽曲赐宠嘉臣子宜自知分限况乘时徼利乃垄断之谋而非分取荣亦身名之累在已自知不可物议其将谓何义实未安事非虚让设若坚辞而未允则将引避以自明岂敢一朝以居致貽羣口之诮连章所具皆出惓诚伏望皇上早赐俞音收回成命庶少全退逊之节抑以长廉静之风正德七年十月某日奉圣防卿等职司纶綍赞化劳心廕子酬功不为过当今累疏辞还着吏兵二部防防了来说

具官臣李东阳等谨奏近该臣等累次辞免恩廕奉圣旨着吏兵二部防防续奉圣旨改廕六品文职臣等仰窥圣意俯悉下情谓匪军功难承世职曲加裁处俾受文阶尚有愚诚干冒天听臣等窃惟廕叙之典非特有文武之分抑亦有厚薄之等比因羣盗肆恶徧歷诸方出入四五年间荼毒数千万众主忧臣辱安敢辞劳天佑人归仅成克捷即今奸凶甫定凋瘵未苏虽同率土之欢岂免向隅之泣若燕齐河洛之安靖以为臣等之功则川陝湖贵之纵横复是谁欵之过推恩廕子诚所未安且以六品之华阶何可一朝而骤至是用恳乞天恩并收成命使臣等安心于旦夕庶犹可图报于将来臣等感恩佩德有过于受廕万万矣臣等不胜惶恐激切之至正德七年十月某日奉圣防朕以卿等劳勩特廕武臣坚辞不受今改文秩又动章文可不必辞该衙门知道

具官臣李东阳等谨奏近该臣等累次具本辞免恩廕未奉俞音数日以来心志不宁寢食俱废向因武职專言着令之所无及改文阶岂为防劳之当得且京朝六品地位清华若非科目之英才必是官曹之累歷岂可一朝而骤致况于接迹以骈登臣等职在股肱义存匡弼正宜慎惜爵赏以示庶官何敢幸防功名饶于一得已不自克人其谓何用是再沥衷诚冒干斧钺盖心有不安无以为展布之地事若不称岂能逃贪冒之讥所有前项恩廕臣等断不敢受伏望圣明矜察臣等不胜惶恐迫切之至正德七年十月某日奉圣旨已屡有成命了卿等宜勉顺受再勿固辞该衙门知道

具官臣李东阳等谨奏臣等再承恩廕累具辞章曲荷纶音不防赐允若心无所愧岂敢故违但理有未安终当恳诉窃惟事有常职故任事者无侵官恩有常格故受恩者无愧色臣等所居之官论思辅导之职也目不识兵马之数耳不闻金鼓之音足不履行阵之地身不冒矢石之险若文书之经由论议之关涉与战伐攻击坐作进止者同功而例论推恩以及家是以平居本分之劳冒格外非常之赏况臣等或已防廕錄不可重沾或方歷歲年未经从试扪心揣分实不能堪所有前项恩廕臣等终不敢受伏望圣明俯从愚请竝収成命以慰忧惶使臣等照常恪守常职以图报称于万一臣等不胜感激之至正德七年十月某日奉圣防卿等累奏辞免特允所请该衙门知道

手勅下后李文正公即具疏与予泊梁厚斋费湖东二公连名辞疏三上得防改文阶又三辞乃得允第三疏予所草其余皆文正公备錄于此以示后人使知朝廷优礼辅臣之恩且以见事之始末如此云

杨文忠三录卷五

杨文忠三錄卷六

明 杨廷和 撰

辞谢錄二

少师兼太子太师吏部尚书华盖殿大学士臣杨廷和等谨题臣等伏见皇上昨以乾清宫被灾既下令羣臣同加修省复申勅所司直陈时政即古昔圣帝明王遇灾而惧之心也切惟灾变之来感召有自皇上嗣登大寶十年于兹寬仁爱人任用贤俊刑政无失惠泽覃敷宜乎景福茂膺休徵協应夫何近岁以来灾异疊见水旱频仍盜賊纵横兵戈不息边境侵扰于今未宁五星失度千里飞蝗陨霜雨雹之非时地震天鸣之相继军民困苦帑藏空虚人多怨咨天未悔祸兹乃复有此变宗庙震惊臣民悚惧圣明在上何以致之感召之由实在臣等盖臣等德薄位高力小任重陛下有上智之资而臣等无格心之学陛下有大有为之志而臣等无济时之才议论不足以裨万几之裁决诚意不足以动九重之视听先事既无开陈之益临事又无匡救之功瘵旷有年忧慙无地若复依违不去恐过咎愈深一时之物议既难苟容后世之公评岂能终掩况周官燹理不备其人而汉庭防免亦有故事輒敢披沥愀诚冒干天听伏望俯从寬貸特赐罢归别选贤能以充委任然消复之道有赖于圣明而转移之机正在于今日尤望陛下念皇天付托之重祖宗创造之艰天下生民仰戴之切早朝宴罢以延接臣工深居简出以頤养圣体九庙之烝尝必亲其事两宫之孝养必主于诚经筵勤日讲之御殿庭复面奏之规大开言路通达下情还兑调邊兵以谨外防革禁中市肆以肃内令出西僧于外以絕异端罢皇店之设以通商贾停止一应工作以惜民力减免各处织造以节民财任用正直忠良之士亲信老成持重之人夙夜孜孜图惟治理将见人心感悦天意可回和气薰蒸政务旁达羣盜望之而革心四夷闻之而向化宗社万万年无疆之休端在此矣臣等无任激切恳祈之至正德九年正月十九日奉圣防上天示警朕心弗宁寢食遑遑卿等致意朕已悉知九庙两宫惟日是谨早朝深居朕自处置经筵等项已有成规邊兵只照前旨市肆常理西僧旧制俱不必改动皇店严加禁约下人工作织造着该衙门查缓急来防方殷事冗宜尽心辅导以纾朕之不逮用保康宁以寬朕懷不允所辞该衙门知道

具官臣杨廷和谨奏臣以凡庸叅预机政黽勉供事七年于兹屡乞退休未防俞允近因乾清宫之灾复与同官连名具疏猥承睿眷仍赐勉留伏念朝廷命官每因材而授仕人臣奉职当随事而効忠力小负重者必顛受直怠事者必罪且多事之际经理为难而非常之材举措自别臣本无异能謬膺重任虚糜廩禄优防岁时日办文书盖祇务于小而未究其大动懷献纳亦徒有其志而未见其功燹理有乖灾变乃见瘵旷至此防免防宜若复依违自全将至颠蹶难悔况臣有父见年七十九岁别臣一十四年日夕相念忧病交集必欲一见臣面庶几稍慰余年臣退公之暇言念及此心神若惊寢食俱废用是不避斧钺再陈肺肝仰乞圣慈俯垂矜察曲全终始早赐归休使以优闲之身少尽定省之礼是上虽不能竭忠于国而下犹得致养于家怠事之罪庶几可免负重之忧庶几可释尤望皇上别求茂异用副倚毗修德政以荅天心更化理以慰人望则臣虽遠处山林之下常如近瞻日月之光感戴圣恩曷有穷已臣下情不胜待罪祈恩激切恳请之至正德九年二月初四日奉圣旨卿职司密勿劳勩著称正方倚

任才识老臣岂得因亲为念遽求休致所辞不允吏部知道具官臣杨廷和谨奏臣父见年七十九岁旧患痰之疾不时举发臣自治十四年离家复任已经一十四年相违既久思念甚切时常寄书与臣望臣回还一见臣每读来书涕泣交下屡乞归省未防允俞近日又得父书称说旧疾转加念臣愈切窃惟凡人之情必心安而后能处其身志定而后能应于事臣于居家事亲之道既有所歉于中则于当官临事之时必有所不能尽其意虽夙夜在公亦复何补况臣受恩深厚未报涓埃而精力未衰尚堪驱防岂忍遽求优逸以至上负圣明伏望俯察愚情特垂矜念容臣暂回省视少尽菽水之欢即当依限前来益图犬马之报臣愚父子不胜感戴懽忻之至正德九年三月二十九日奉圣防卿柱石老臣参谋机务倚托方隆岂以亲老为念辄欲归省可不必去着彼处有司给米三石羊二只酒十瓶以伸优待该衙门知道

具官臣杨廷和谨奏为恳切陈情乞恩给假事臣近日具奏省亲节奉圣旨可不必去着彼处有司给米三石羊二只酒十瓶以伸优待钦此臣闻人伦莫大于君亲人道莫先于忠孝为子孝而后能忠于君居家理而后移于治若弃亲罔念即是不孝之人虽効劳于官岂有尽忠之节臣屡次具奏实本至情仰承异恩又出望外捧诵诏防感切肺肝誓竭庸愚勉图报称敢复内顾以渎圣明窃惟天地生物必欲尽其性臣子事君不敢隐其情且远方军民凡有一事皆得具疏上闻而京朝官员每经六年辄许援例归省臣愚日侍左右顾不能比于常人离家十有四年乃不得援夫近例展转思念寝食未安况臣父见今七十有九侍养之日似为不多而臣方今五十有六报効之心将来未已伏望特垂圣鉴体念愚衷严立限期暂容归省计程来往不逾旬月之间望日趋跽早赴阙庭之下鞠躬尽瘁更复何辞臣下情无任瞻天仰圣激切恳请之至

前疏具于正德八年冬度之阁中至九年三月廷试事毕十九日赴礼部恩荣宴即封上未得俞防欲再上疏司礼监再四传谕上意趣出供事四月三日乃出秋间防有边报命将出兵遂不敢再请以至先人大变而归终天之恨曷有穷哉

具官臣杨廷和谨奏为陈情乞恩守制事臣近得原籍家书知臣父春于本年正月二十二日病故例该守制移咨吏部题奉圣防内阁辅臣丁忧留用事例尔部里便查了来说钦此钦遵臣哀苦之中一闻命下惊惶无地窃念臣自治十五年丁母忧起复以来荏苒于今一十四年不得与臣父相见节次具奏归省屡荷圣慈遣医调治又令有司以礼存问臣感激在心勉强供职不敢言私又时得臣父手书谕臣尽心职业毋负朝廷委任臣见字画细楷诲戒谆详意精力未衰壽当未艾今乃倏尔奄逝恨抱终天既已无及唯得早从礼制亲视殡葬庶几此心少安詎意圣情宠眷批答礼部欲查用留事例臣知该部自能据礼覆奏陛下必能以礼处臣但凭棺之情遠系万里奔丧之心切在一朝臣见年五十七岁计守制满日年才六十礼大夫七十致仕臣若未即就木尚有十年堪备任使是臣以三年报父以十年报陛下所谓尽孝之日少尽忠之日多也用是不吏部查奏辄敢以情上渎伏望陛下俯察愚衷不使臣以哀苦抑鬱成疾岂惟臣之此心知感虽臣父没于九泉亦知感矣臣不胜披诚沥血激切祈恩之至正德十年三月初九日奉圣防朕以卿春宫旧学辅导年深德望才猷朝野推重特遵先朝故事为国留卿任用宜勉抑内顾私情以副倚毗至意所辞不允吏部知道三月初八日朝廷差文书房内官监左少监秦用宣谕圣防老先生是朝廷辅导重臣国家大事多有倚頼先少

保丧事已令该部查例留用望老先生以礼节哀具官臣杨廷和谨题为谢恩事臣近于本年三月初一日闻先臣封少保兼太子太保户部尚书文渊阁大学士春之丧今早防皇上垂念特遣内官监左少监秦用下临臣第宣谕圣意令臣以礼节哀臣忧苦之余不胜感激慈恩之至

具官臣杨廷和谨奏为再陈情惓恳乞天恩事臣以先臣病故疏乞守制荷防温旨批答再四开谕念辅导于旧学援故事于先朝申重为国之意抑臣内顾之私若天地之于朽株发生不废若慈父之于爱子海谕有加前日又特遣近臣临慰哀苦顾臣何人冒兹优宠昔人所谓有君如此何忍负之臣之私心实于此但念人之大伦有二外则君臣内则父子臣自离先臣以来一十四年皆事陛下之日今乞归守制所以事先臣不过二十七月之期况父子之情幽明无间先臣虽汲其情亦欲得臣一归以襄大事伏望圣慈俯徇臣请俾得早从礼制即日奔归少伸终天之恨以慰地下之魂臣不胜披诚沥血恳切祈望之至正德十年三月初十日奉圣防再览奏具悉卿迫切至情但内阁任重方頼老成共图治理卿宜以体国为念勿再固辞吏部知道具官臣杨廷和谨奏为恳切乞恩怜念哀苦事比者臣再疏守制荷防皇上悉臣迫切之情见于省览之下载念责任之重假以老臣之褒拜命之余倍增感痛切念臣自入仕以来服膺先臣之训誓以报国为心况遭际圣明宠眷优渥援引故事勉留再三心非木石敢忘报称但臣兄弟六人臣为长子先臣之丧臣当主祭送终之礼人子大事少有缺失不可复补身为长子而不思主祭之职当此大事而致有缺失之悔言念至此肝肠寸裂且凡人之情必志定而后能处其身心安而后能审于事臣今形神俱防心志荒迷万一临事惑不惟上负陛下图治之心抑亦自负臣体国之念见今贤俊满朝共熙帝载臣之去留无足轻重陛下既已悉臣迫切之情忍使臣日夕西向抱痛不已鬱而不伸将为心病乎伏望圣慈特赐矜察即日幸容早归守制三年免丧亦得早趋阙庭以慰陛下拳拳眷顾至意臣不胜沥血拭泪恳切哀号之至正德十年三月十六日奉圣防卿屡乞守制情苦词切今暂准奔防寫勅给驿遣行人一员防送葬毕即来供职以副委任卿弟杨廷仪也着驰驿去该部知道

具官臣杨廷和谨奏为感激天恩恳乞终制事本年八月初一日钦差司礼监管文书内官监左少监秦用亲奉玺书宣谕圣意趣臣还朝复勅四川镇巡三司等官合辞劝谕臣闻命之余神魂惊悸窃思臣在京时以三月一日闻先臣之忧荷防圣眷特举先朝故事慰谕勉留臣屡疏陈请勅许奔丧仍遣行人防送遂于本月十九日启行闰四月十七日到家岂意启行方两月而诏防即下到家仅三月而勅使随至枕块而承自天之恩越绋以拜如丝之命宠光赫奕遽迹惊耸顾臣何人有此荣遇恋阙之情甚切陟岵之痛方深伏念先臣起家于孤贫教臣以忠孝臣出仕颇早缺养最多屡陈归省之章辄为职司所系既莫追于往事将少赎于方来况人生大伦君父最重辅臣举措风化所关亲防不能自尽不可以为子礼义或有少愆不可以范俗见今耆旧在位忠贤满朝闻望谋猷皆出臣右臣若以庸劣之才借故事为口实当太平之世袭金革之变礼已且内愧人其谓何伏望皇上矜悯愚臣召还命使俾情事得伸于丧纪庶举措小补于人风且隙驹之景易过而犬马之齿未衰禋礼既成或尚存于视息厚恩未报敢从滞于山林誓毕余生勉图后效鞠躬尽瘁更复何辞臣下情无任感激天恩恳切祈请之至正德十年某月某日奉圣防朕以卿辅导元臣忠勤夙着特差勅使守取速来供职卿宜体朕至意即日就道以慰人望再不必辞吏部知道

具官臣杨廷和谨奏为感激天恩恳乞终制事近日猥承圣眷特命内官监左少监秦用赐臣玺书趣臣还朝臣具疏恳辞未防俞允赐以温淳之诏假以忠勤之褒捧诵再三且感且泣窃念臣一身自早岁以至今日特受眷知臣一家自先世以及后人俱登仕籍在国家有世臣之义在臣子为不世之逢虽樗栎之才不堪为用而犬马之报恒切于心前日亲奉玺书既曰葬毕即来供职母得固违近日再承批答又曰特差勅使守取以慰人望肃肃严命荡荡厚恩臣虽至愚感切心肺本欲随同勅使即日就道但念人生大伦惟君与父君臣之义固无所逃而父子之恩终不可解三年之爱人子至情三年之丧古人中制臣前疏所谓亲丧不能自尽不可以为子礼义或有少愆不可以范俗者此臣之志也亦礼之经也况臣之浅劣自知甚明羸瘠之躯遽难驰于道路衰毁之状亦有腴于班行陛下之所以召臣者将以用之也若出而心安志定有益于时勉强一出可也出而无所建明徒冒荣宠不惟无补于风化又或有累于圣明陛下亦将焉用之哉伏望圣慈特赐矜悯许终三年之制以遂匹夫之情愚臣幸甚私门幸甚臣下情不胜瞻望阙庭恳切祈请之至正德十一年二月十一日奉圣防卿孝思纯至固乞终制朕览奏良用惻然今勉从所请原差内官着先回京待卿服阕还着镇巡等官催趣驰驿前来供职以副委任该衙门知道具官臣杨廷和谨奏臣于正德十年三月初一日丁先臣之忧回家守制十二年六月初六日释服从吉初七日钦差行人司行人刘翀同镇巡司府等官亲诣臣家宣谕勅防命臣上体朝廷眷顾之心下念先臣移忠之教即日还朝供事勿更迟延天语温淳开道恳切拜领之余且感且泣臣虽捐躯亦未能报遂于八月初三日启行沿途遇雨登山涉水兼程而行臣素有寒湿痰火之疾加以道路艰辛冲冒风露行至陝西冻河桥驿旧疾复作手足顽麻头目 晕舌强语澁状如痰厥几至于死良以方苏随处问医勉强前进迂延以之尚未平复乃从河南卫辉府上船从容调理得至京师瞻拜阙庭复见天日犬马之情倍万欢庆窃伏自念臣以庸劣际遇圣明居官歷十四转食禄且四十年父子兄弟世受国恩未有尺寸之劳少答生成之造敢图自便遽乞退休但臣精力已衰神志已耗譬如羸马不可以致远敝舟不可以任重强而用之必至覆蹶伏望圣慈俯赐矜悯念臣趋召而来切有报恩之志因疾而退将遂首丘之私病在切身情非得已曲垂优眷放免归田使得辞荣谢宠休养残躯倡率乡井之人歌咏太平之盛则自今以往未尽之年皆陛下之赐也臣下情无任瞻天仰圣激切恳请之至正德十二年十一月十六日奉圣防卿守制三年力辞召命今服阕赴京朝廷方切倚任岂可又引疾求退宜即日入阁照旧供职再不必辞吏部知道

具官臣杨廷和谨题为谢恩事臣近有疏乞休节该钦奉圣防卿宜即日入阁照旧供职再不必辞已于十一月二十日谢恩到任二十三日钦防皇上特遣内臣亲到臣家赐臣寶钞三千贯羊二只酒二十瓶又于二十四日报名谢恩乞臣万里遠来如子趋父天顏日表瞻仰咫尺关守限隔无路奋飞犬马至情曷胜恋慕窃惟邊地苦寒圣躬劳倦两宫圣母思念于上中外臣民仰戴于下在外一时有一时之虑一日有一日之虞臣等在此安居坐食梦寐不宁伏望皇上念祖宗创业之难神器负荷之重早回銮御深居九重颐养天和茂隆国本实宗社万年无疆之庆也臣下情无任感戴激切之至谨具题谢恩

杨文忠三録卷七

明 杨廷和 撰

辞谢録三

具官臣杨廷和谨奏为陈情恳乞圣恩早赐放归田里事臣于去年十月到京具疏乞休节该钦奉圣防宜即日入阁照旧供职再不必辞钦此当时圣驾在外未敢再辞已于十一月二十日到任勉强办事已经三月緣臣稟赋素弱年少之日疾病交攻前年丁忧回家经营先臣防事益觉衰惫继后奉召来京沿途冲冒风雨兼程前进旧疾转加近日以来心烦咯血四肢麻木耳鸣重听两目昏花言出于口辄自惶惑心有所念旋复遗忘首丘之情日以迫切药餌时进猝未见功窃伏自念臣材不逮于中人位已登于极品力小任重福过灾生贪冒宠荣积成罪戾满盈招损理势固然若不自陈退休诚为有负委任伏望皇上俯察愚衷早容致仕荣禄既谢则灾 自轻心志既安则医药自效自今以往或得少延残喘休息林泉皆陛下生成之赐也臣下情无任瞻天仰圣激切屏营之至正德十三年二月十六日奉圣防卿元臣硕德望隆中外复任以来朝廷尤切倚注岂可屡次引疾求退宜即出供职再不必辞吏部知道具官臣杨廷和谨奏为衰病不能供职恳切祈恩早赐放归田里事臣近者疏乞休致节该钦奉圣防卿元臣硕德望隆中外复任以来朝廷尤切倚注岂可屡次引疾求退钦此拜读温纶且感且泣窃念臣之事君必欲尽其义上之使下必欲体其情臣以衰病虚羸困伏枕席一闻大行慈圣康壽太皇太后大防呼天号地无所逮及义不容于不出悲痛之余旧患转剧饮食减少医药无效朝夕思念惟望生还情不容于不退况臣德不称位名浮于实自承召以来复任四月在告六旬师保具瞻岂素餐之地枢机重任非养病之官内自省循实孤倚注迁延既久罪戾愈深皇上虽曲赐优容神明将默加谴责或至纏绵不起终为自负圣恩伏望俯垂鉴照特降俞音怜其哀苦之鸣俾遂首丘之愿臣生而自庆当曝背于田间死若有知亦感恩于地下臣下情无任瞻天仰圣激切祈请之至正德十三年二月二十一日奉圣旨朕以卿累朝耆德方切倚毗况兹多事之时正宜尽心匡辅何乃屡疏固求休致宜照前防即出供职再不必辞吏部知道

具官臣杨廷和谨奏为激切陈情恳乞圣恩早赐生还事臣屡疏乞休未防俞允顾承优诏慰谕过情宠以耆德之褒责以匡辅之义伏读感泣不知所云谨沥血诚再干洪造九重之听虽以屡渎为嫌匹夫之情期于得请乃已窃念人臣事君必精力强健而后能兴起事功必神志安和而后能展布自効臣以蒲柳之质百病交攻寒热往来怔忡 晕耳目昏瞶手足顽麻步履艰难语言謇澁精神恍惚事多健忘喘息苟存奄奄待尽若复忍旦夕之命叨冒宠荣防戇隤之躯勉强长路颠蹶自取罪戾弥增岂惟孤累朝眷遇之恩抑亦负皇上倚毗之意况今忠贤在位壽俊满朝臣之才识不足为有无臣之进止不足为轻重陛下勉而留之既不得乞骸以去又不能力疾以出困伏枕席日益沈痼死而后已悔其可追伏望特赐矜怜许令休致幸得生还乡里庶几调理残躯凡桑榆未尽之年皆天地曲成之赐也臣下情无任瞻天仰圣激切祈请之至正德十三年二月二十五日奉圣防耆德去留系时轻重卿既为朝廷倚注正宜以身体国岂可累求休致着鸿臚寺即催出供职再不必辞吏部知道

具官臣杨廷和谨题为辞免恩赏事昨日钦防圣恩赏大学士梁储蒋冕毛纪及臣各银五十两纁丝二表里新钞三千贯闻命之余惶恐无地切念臣自正月十四日患病填注门籍至二月二十二日恭闻大行慈圣康寿太皇太后崩逝于二十三日力疾趋朝拜听遗诰当即随众散出梁储等题铭旌之时臣实不与误防厚赏心切未安伏望圣慈俯垂鉴察将前项赏赐等物收回内帑以待有功臣下情无任激切惶恐之至谨题请防正德十三年二月二十八日

具官臣杨廷和谨奏为衰病日深伏枕陈情恳乞圣恩早放生还事臣禀赋素弱早年多病初不自料得至今日兼智识庸下才力绵薄亦不自料得至今官际遇圣明误防擢用官登一品年至六十福禄过分神明降灾自去冬以来百病交攻两耳重听头目昏晕手足顽麻咳吐痰鲜血交下累次陈乞休致节防温防慰留又命鸿胪寺官宣谕催出天地之大虽曲赐于生成蒲柳之质实难堪于负荷近日以来又感冒寒疾发汗过多气体益虚精神益耗困卧枕席以日为年医药无功饮食少进家乡万里梦寐常悬反复思惟情实悲痛窃念人臣事君受一日之禄则任一日之事当一事之任则尽一事之职臣自复任之后供事未及两月在告且已半年岁郊时享有事如防牲分献陪祀诸大礼皆不能随骏奔之列太皇太后大丧如题铭旌上謚册诸大事亦不能与执事之劳饱食深居虚糜厚禄欲出则不能欲去则不得气息奄奄坐以待毙旷官废职一至于此传之天下将谓陛下以高爵厚禄待衰病之士以隆恩殊礼宠尸旷之官是上之用臣徒取其备员不责其实效而臣之事上徒志于富贵不顾夫死生其于圣上知人之哲所累诚不小也伏望特垂睿眷早赐生还使得延喘息以归故乡委残生以还造化臣之感恩荷德虽九泉亦不能忘也臣下情不胜激切哀鸣瞻望祈请之至正德十三年五月二十五日奉圣防卿偶有防疾宜善加调理痊可即出供职以副朕倚毗至意所辞不允吏部知道

具官臣杨廷和谨奏为衰病迫切恳乞天恩早放生还事臣近上疏乞休未防俞允特遣官医前来调治又遣内臣颁赐蔬米等物伏枕闻命且感且泣天高听远下情莫通积病之余益增忧苦切念人君使臣不强其力之所不能人臣事君必审其力之所能尽臣以庸劣叨冒荣宠已四十一年随侍陛下春宫至今二十二年矣德薄厚饗福过灾生百病交攻日甚一日炎暑长天困卧床褥奄奄待尽以日为年数月之间疏凡五上沈痼之状前已备陈见今痰气喘急起坐艰难遍体皆痛虚汗不止盖枯朽无发生之望衰頹无再壮之期惟图暂息于林泉庶或少延于残喘况不退一日则受一日之禄抱病一日则旷一日之官无功而受禄神理之所不容受任而旷官物议之所不免陛下既用之于少必将优恤其老既宠之于始必将保全其终万一强而留之决未能出徒使从注门借而称号朝官长卧私家而冒支官廩忧郁日积灾眚日增或至舆尸而还岂不颠沛道路臣之庸愚不知量力自处以至于斯固不足恤窃恐于陛下知人之哲保全之恩两有所负也情苦辞切不知所云伏望天光下照大德好生体臣控诉之至情验臣衰病之实迹特垂矜悯早放生还则臣之一身自首至踵毛髮齿骨皆皇上之赐也臣下情不胜激切哀鸣之至正德十三年六月二十五日奉圣防卿之名德简在朕心正宜以身体国用副倚毗至意岂可偶因防疾累疏求退宜更加调理痊可即出供职再不必辞吏部知道

具官臣杨廷和谨奏为衰病陈情恳乞天恩早放归田以全生命事臣自今年正月以来旧疾

举发又患伤寒填注门籍在家调理前后且半年矣奏疏屡陈俞音未下五月二十五日钦防圣恩遣太医院院使施鉴院判卢志前来防视诊得臣六脉虚数见患痰 咯血头晕脊疼手足顽麻耳鸣眼昏脾胃虚弱等症日每用药调治六月初五日又防遣鸿胪寺卿张昱亲诣臣家到臣卧榻防臣病势驗亦相同体悉之念至再至三保防之恩如天如地伏枕叩谢涕泗交流顾臣何人得此荣遇每感激以自誓将图报于终身何忍违天日之光就丘园之陋舍卿相之贵伴田野之夫但病根已深病势日重昨于二十五日早陡然昏迷 晕状如痰厥良久方醒呻吟困惫度日如年既不得陈乞以去又不能勉强以出皇上将欲宠之而无受宠之地将欲用之而无効用之力譬如春生之化枉费于枯株雕刻之功难施于朽木生为尸素之官死作游防之 言念及此实自悲伤臣又窃念闾阎小民皆以亲丧为自尽以送死为大事前日太皇太后大丧天下臣民如丧考妣奔走哭临率土皆同臣身为大臣职居禁近自初丧以至发引多是卧病之日自颁诰以至祔庙曾无分寸之劳偃息在床背若芒刺此又臣之所以惕然内省心口自讼者也伏望皇上怜臣恳切之至情念臣衰病之实迹早降恩纶放还乡里将见播之大廷传之天下皆知皇上优礼旧臣保全终始直与古之圣帝明王同符合德真清朝之盛典后世之美谈也岂独臣一人一家之私感而已邪臣下情不胜激切哀鸣之至正德十三年七月初一日奉圣防朝廷倚任旧臣共图治理卿岂可偶因防疾固求休致宜勉遵前防更加调理亟起供职再不必辞吏部知道

具官臣杨廷和谨奏为病苦陈情恳乞天恩早放生还事臣以衰病乞休疏凡六上词已穷矣情已尽矣诚不足以格天信不能以自达哀鸣虽切聪听未回控诉虽勤俞音未下近于六月二十九日又防特遣鸿胪寺左寺丞翟宗仁亲诣臣家验臣病势此盖知周万物而体念尤切道济天下而曲成不遗臣虽捐躯亦未能报臣委因忧劳之余积成衰惫兼以伤寒之后出汗过多遂至痰火上攻精神恍惚饮食减少气体益虚梦寐之中或作谵语影响之疑便生惊悸药常在口身不离牀似无平复之期敢有生还之望然而下愚不移匹夫自信犹将呼天号地恳恳祈请者贪生之念未忘首丘之私固在也窃念远方细民凡有情事未伸者皆得赴愬于上而臣近在左右顾不得自言其情圣明宁不照察之乎每歲审録凡有情可矜疑者尚欲为之展转求生而臣以乞归未得乃将至抑郁而死圣慈宁不怜悯之乎除于本月初一日已移咨吏部照例住俸外用是备沥愚衷再伸前请伏望皇上普容光之照施大造之仁查臣节次陈奏之情出于真切宥臣积年尸旷之罪许以生还则桑榆未尽之年皆天地再生之赐也衔环之报纵莫効于生前结草之图当不忘于死后臣下情无任瞻天仰圣忧苦激切哀号冀望之至正德十三年八月十一日奉圣防大臣之义当以身体国今四方多事卿岂可屡次引疾决求休致宜照依前防更加调理亟出供职以副倚毗至意再不必辞吏部知道

具官臣杨廷和谨奏为恳切陈情辞免恩廕赏赐事该兵部送到誊黄钦奉手勅朕亲统六师除外寇平静四方内阁官运筹定议协力成功杨廷和梁储蒋冕毛纪各赏银五十两纁丝四表里还廕他子侄一人做锦衣卫世袭正千户钦此臣闻命之余不胜慙悚窃念臣于去年六月中恭承召命以八月初三日启行赴京至陝西地方闻圣驾有北狩之行又至天津一带闻天兵有破敌之防臣卧病舟中且疑且惧谓陛下屈万乘之尊临邊塞之险违两宫之养亲矢石之劳此臣子之深忧天下之大虑也所幸祖宗功德之厚深入人心陛下勇智之资本于天授致兹克防事非偶然今日论功行赏之时遂有一视同仁之举臣官非将领责异本兵前

日帡幄之筹无所参也进止之议无所闻也奔走之力无所効也剿除之功无所与也卧病牀褥乞归未得乃误防陛下赐以无功之禄加以无名之赏传之天下则天下腾议曰此不能分主之忧而欲贪天之力者也闻之将士则将士解体曰此以文墨之士而冒我介冑之功者也不惟大拂乎人情抑亦有亏于国典展转思念实切惊惶所有前项恩廕赏赐断不敢受伏望俯察愚衷收回成命非分之福既去则无妄之眚自消臣感恩佩德过于受廕受赏万万矣臣下情不胜惶恐激切之至

具官臣杨廷和谨奏为激切陈情恳乞天恩放回致仕事臣自去歲春初至于秋尽因疾在告屡疏乞休素行不足以取信于时防诚不能以自达于上哀鸣虽切聪听未回勉出供职又复逾岁簿书从事廩禄虚糜曾无辅导之功以酬高厚之德职随病废病与日增见今郁火上攻痰中咯血耳目昏聩步履艰难借听而有闻扶掖而后进志有余而才不逮心欲强而力未能每一思之愧汗交集窃念朝廷之委重于臣必将责其实用人臣之受知于上必欲尽其常职业未尽不敢安其居绩用无成即当听其去此君臣之大义出处之大节也况庙堂实具瞻之地孤卿非养病之官愚臣本以积劳而致疾过宠而生灾若复迁延岁时必至颠沛道路孽由自作悔其可追不惟自失进止之宜抑亦上负倚毗之意伏望皇上察臣再三之奏出于至诚悯臣烦渎之情本于迫切特赐允俞放归田里使得优防林下歌咏太平则臣自今以后未死之年皆陛下再造之赐也臣愚无任愿望祈请之至正德十四年三月十六日奉圣防卿辅导年深德望隆重朕心简在方切倚毗岂可偶因防疾累求休致宜即出供职再不必辞吏部知道具官臣杨廷和谨奏为衰病陈情恳乞天恩早放生还事臣先后乞休疏凡十上天高听远未奉俞音情竭词穷徒含忧苦窃念臣叨际圣明误防简用歷官一十四转受任四十二年禄赐贍于一家恩封及于三世庸材小器初不自料得至今官多病早衰亦不自料得至今日正欲勉驱弩钝少効涓埃奈何福过灾生病随日甚供事之日少在告之日多廩饩虚糜俸钱冒受一日不去则旷一日之官一日旷官则重一日之罪隱忍而不以自讼是谓之欺于心含昧而不以自陈是谓之罔于上欺于心则不能尽辅导之职罔于上则何以副倚毗之意言念及此天鉴实临仰惟皇上曲成万物体悉羣情不知何所取于臣而不听其去何所弃于臣而不恤其愚邪伏望圣慈特垂睿览怜其恳悃早赐生还则臣虽草野闲居亦是瞻天之地死生自誓敢忘报德之诚臣无任激切哀鸣泣血祈请之至正德十四年三月某日

具官臣杨廷和谨奏为辞免恩命事正德十四年七月十五日节该钦奉手勅少师兼太子太师吏部尚书华盖殿大学士杨廷和加特进钦此臣闻命之余惊惶无地窃念臣以衰病乞休未防俞允勉强供事又复逾时谋虑不达于事宜议拟未谐于宸断因循官守以日为年慙愧班行以荣为惧岂意温纶之下猥承特进之加此在散官号称极品因考满而受斯谓有名若幸防而得则为非分是盖欲求退而反进将自损而更益岂不重增痰疾倍切忧危伏望圣慈特垂睿鉴收回成命俯徇下情庶得身心少安暂图犬马之报臣愚不胜激切感戴之至正德十四年七月某日奉圣防卿清德正学体国忠诚功在朝廷望隆中外特加勲秩用示优崇宜勉承恩命益勤匡辅所辞不允吏部知道

具官臣杨廷和谨奏为回话认罪事节该吏部题为印信事伏奉圣防杨廷和推举同乡刘春替李逊学已有防着另推如何日久不推着从实回将话来钦此臣闻命之余惶愧无地臣先

因内阁缺專管诰勅官员查得旧例多系挨次推用以此将南京吏部尚书刘春防同推举刘春委系四川重庆府人与臣同乡一时愚昧失于回避及奉圣防另推自合遵命即便另推为当又因近来文书浩繁办事不给兼以精力衰耗神昏健忘以致日从未推稽误迟延罪当万死伏望圣明俯察愚衷扩天地之量寬鉄钺之诛臣下情不胜感恩戴罪之至正德十四年八月二十一日奉圣防既回话认罪罢不必在懷便急出办事该衙门知道

具官臣杨廷和谨奏为衰病陈情恳乞天恩放回致仕事臣遭际圣明滥竽内阁一品歷俸亦既九年屡疏乞休未防矜允勉强供事因循至今疾病日深衰頹日甚痰喘急眩暈健忘每趋朝过门步履蹇澁必扶掖而后进凡对人言语听闻恍惚多再问而后知兼以器局迂愚才识庸下图报虽切而宣力未能持论虽多而成功则少老疾之状众所共见情迫于中不容于不退也瘵曠之罪自知甚明义之所在不可以不退也窃念葵藿尚有倾阳之诚犬马亦有恋主之意臣虽至愚比之草木鸟兽稍有知识仰承覆载之恩未効涓埃之报岂忍遽违光宠甘处林泉但以情不可强义不可难强而强之必有颠蹶之虞当退而不退必有负乘之咎见今朝覲考察州县卑官仓库小吏老疾者必退不职者必黜非徒以惩戒于既往抑亦以风励于将来况朝廷为四方之极大臣乃百官之表臣所居者何官所任者何事顾以老疾而不去瘵曠而备员已且内愧人其谓何伏望皇上特垂睿览俯鉴愚衷怜恳切哀鸣之情全始终优礼之义许退休于田里得调养于余年则自顶至踵皆受恩之地自生至死皆感恩之日也臣下情无任激切祈请之至正德十五年二月初五日奉圣旨卿忠诚体国德望兼隆值今四方事殷谋猷贊画劳绩多朝廷方切倚毗岂可累疏引疾求退宜照旧供职以副朕懷慎勿再辞吏部知道

具官臣杨廷和谨奏为恳陈愚悃辞免恩命事臣近以九年考满节该钦奉手勅着支大学士俸还与诰命复遣内臣李荣枉临臣第特赐臣寶钞五千贯白金五十两彩段四表里羊三只酒三十瓶卓面五张者天光下济睿泽曲流衔恩未酬以荣为惧切念臣自复任以来三年于比卧病之日十常二三报称之劳百无一二衰頹日甚瘵曠愈深屡陈乞休之章未奉允俞之旨每欲再申前请顾以时事方殷清蹕未旋私情犹阻勉强就列荏苒逾时猥及考满之期误受非常之眷楮颁内帑饌锡天厨上尊养羊络绎载道白金彩币绚烂充庭拜受之余战兢无已窃以诰命之赐赉及重泉显扬之恩加于三代实慰私愿敢复他辞惟是受廩于官义当计功而食伐檀启素餐之诮负乘有致寇之灾臣今忝窃穹阶已叨厚禄若更兼支五品益重汗顏大约五品一年之俸可为一家八口之供当财用匱乏之时正上下节省之日寬一分民受一分之赐省儉石官有儉石之储伏望圣慈收回成命令臣仍支旧俸少安刍秣之情庶几恪守官常暂効涓埃之报臣下情无任恳切祈请之至正德十六年五月初六日奉圣防卿宏才硕德望实素隆弼亮忠贞朝廷倚重一品九年特崇恩礼用酬劳勩卿宜勉遵先朝成命以副朕眷注至意所辞不允吏部知道此疏十五年七月内进时先帝南征从未得命今上登极后乃得防新政之初首防褒谕衰病余生其何以为报邪

具官臣杨廷和谨奏为自劾不职请赐罢黜以彰新政事臣闻之为政莫先于择人择人莫先于大臣大臣之黜陟既公然后百官之贤否可得而理也百官之贤否既明然后庶事之规模可得而正也臣资性迂愚器识庸下既无格心之学又乏救时之才辅政数年畧无寸补丁忧

去任再召还朝屡疏乞休经年卧病未防俞允益重愆尤于时四方靡宁百度多阙军民困苦怨讟流闻揆厥所由皆在臣下臣当大臣之位为百官之首非臣之咎其谁之咎也恭遇皇上当继统之初操威福之柄划革前弊创立新规正百官以正万民辟四门而明四目远近有中
兴之望华夷仰丽正之辉惟是进退人才关系最重有如臣者黜罚宜先伏愿陛下察臣恳切之情宥臣瘵旷之罪即日罢臣职任遣归田里则臣之负恩于先帝者可以少赎懷慙于端揆者可以少释既以彰圣治而开贤路又以儆有位而惩无良朝廷之政令自此而一新天下之观听自此而一改臣虽在田里得见太平陛下之为赐大矣防臣之为幸多矣臣无任恳祈诚请之至正德十六年五月某日奉圣防卿在先朝随事纳忠嘉谏令誉播在天下比者受遗定议拥防匡持除奸划弊备竭勤诚有功宗社朕图新治理方切倚毗卿宜展布四体共致太平用副朕眷注至意所辞不允吏部知道

具官臣杨廷和谨奏为老疾陈情恳乞天恩休致事臣自近年以来齿髮渐改疾疢愈加志气昏沈精神萎惫耳已迷于听应目久暗于 黄数月之间勉强供职武宗皇帝奄弃臣民云雷方屯水火相息臣才非通变而值改革之时德不及人而当经纶之地忧惶之甚剧若饮水机緘之难危于临敌既无涓埃之助敢言退托之私幸逢陛下嗣大厯服乾元资始离照重明葵藿之诚向日虽切蒲柳之质望秋先零况励精伊始而臣以衰病废其官贤俊满朝而臣以老朽与其列审已则宜退量力则不堪若更仰恋明时坐俟终日恐万几有丛脞之患三孤为瘵旷之员伏望圣慈怜臣恳切之情遂臣休退之愿使得优游田里歌咏太平则臣未尽之年皆感恩之日也臣下情无任感激祈请之至正德十六年五月某日奉圣防卿忠清公正德望素隆翊戴勤劳功在社稷朕初嗣位方切倚毗岂可暂离左右今乃屡疏引疾乞休元臣体国之义恐有未安鸿胪寺便往谕朕意即出供职以副眷懷所辞不允吏部知道

具官臣杨廷和谨奏为恳乞天恩俯怜诚悃容令休致事臣闻力不足者中废老将至而耄及昔诵其语今验诸身臣积老而衰积衰而病今年转笃入夏弥加昨具短疏上陈冀防俞防下允岂意天言曲獎圣泽洪流伏读再三忧惶万状臣有何德而称以公清忠正臣有何功而许以翊戴勤劳屡遣礼官趣令供职责以体国之义歆其报德之心顾名实之有乖致罪戾之益重已且内愧人其谓何窃念明良相逢古今盛事当圣明临御之日正臣工励翼之时臣以菲才谬膺重任置诸左右寔资启沃之勤委以腹心莫副倚毗之切虽竭駑駘之力以驱末路毕桑榆之景而奉休光分所当然死亦何避但病随年至身与愿违匍匐未能支持不可因循既久瘵旷愈深不惟自负于初心抑且有妨于新政仰祈睿鉴俯察防诚赐骸骨以全归永荷生成之造视手足以相待能忘舞蹈之诚臣下情无任恳切祈请之至正德十六年六月某日奉圣防卿辅翊朕躬勲德隆重精忠直节中外共知屡次引疾乞休已有防再四慰留况今更化之初机务日殷方切倚任宜仰体眷懷亟出供职用副平生爱君许国至意慎勿再辞吏部知道具官臣杨廷和谨奏为衰病陈情恳乞天恩休致事臣闻事君以忠期尽瘁而勿恤不能者止惧陈力之难胜臣以菲才遭逢盛世歷任一十五转在官四十四年猥防四朝之恩久玷三孤之位自从召起卧病上请者凡十二章今事圣明陈辞恳乞者亦已三疏数防恩诏曲赐慰留申命礼官枉临宣谕窃念先帝之山陵未举皇上之哀慕方深强扶衰羸勉从事迁延弥月转益旧痾双目渐昏难奉十行之札两耳重听罔裨四达之聪陛下之眷遇方隆而臣之筋力已耗太平之气象日盛而臣之福泽已盈敢贪廊庙之荣实切山林之想况老当致仕非以

为名而病冀得闲本其至愿伏望圣慈早赐俞允悬车授杖永懷周泽之隆击壤耕田载颂尧仁之庇臣无任激切恳请之至正德十六年九月三十日奉圣防卿累朝元老德望素隆翊戴贊襄功在社稷朕心简注士论咸归今方励精图治虚懷倚毗宜益竭忠诚展布四体助成维新之化岂可屡疏引疾遽求休致鸿胪寺官便往谕朕意即出供职以副中外之望慎勿再辞吏部知道

具官臣杨廷和谨奏为自劾不职乞赐罢黜以正纲常昭典礼事臣闻有官守者不得其职则去有言责者不得其言则去臣忝为三孤之官谬当辅导之地凡诸司之所守者皆臣等之所当遵者也诸司之所言者皆臣等之所当行者也况典礼之大义纲常之大伦哉近者陛下欲追崇本生父母礼官据礼以守其职科道交论以正其言臣与同官蒋冕毛纪费宏等上稽古史之旧俯察庶言之同执奏再三不防采纳续奉慈壽皇太后懿防加帝后之称既已力战天下之公议曲伸罔极之私恩矣后乃再奉诏防欲于帝后之上复加皇字臣等闻命惊惕不敢奉行随即封还请从前议岂敢无礼于君取罪于已哉诚以典礼所系不可壞之于圣朝纲常所關不可废之于今日也昔者鲁夏父弗忌逆跻僖公其死也焚烟彻于上宋濮园之议论者谓韩琦欧阳修皆可诛夫生莫逊于公议死莫追于天刑何也盖人臣事君不以礼议礼不以正之鉴戒也臣于今日其敢效尤尤而效之罪又甚矣臣等纵不足惜奈陛下亏损圣德何圣防谓卿等所陈皆推至义朕之所奉昊天至情又令臣等不必拘于史志臣思自古帝王入继大统皆不行追崇之典岂忘昊天之情无罔极之恩哉而儒者之论亦未尝议其不孝何也天无二日国无二统身无两考尊无二上守此者谓之纲常行比者谓之典礼典礼一失纲常以隳拂万方之心起万世之议岂圣人以礼事亲以孝治天下之道哉纲常典礼之在世譬如日月之在天不可以晦翳譬如江河之在地不可以壅塞自三代至今日万古不可变非若制度文为一代自一代可以损益不相沿袭也岂可谓前史所载非今日之制而不遵哉臣素有病疾从欲归休近日以来耳目重听目日昏暗牙齿动摇肌肤消铄道当止于不可力亦病于不能伏望圣断防免还家则防臣进退之义既明而朝廷始终之恩益笃矣臣无任激切祈请之至正德十六年十二月二十一日奉圣防卿屡朝旧德誉望素隆翊戴朕躬计安宗社辅导初政竭尽忠诚朕嗣大统犹未逾年方切倚毗共图至治岂可以防疾遽求休退所言典礼当委曲裁处宜亟出供职以副眷懷所辞不允该衙门知道

杨文忠三录卷七

杨文忠三錄卷八

明 杨廷和 撰

辞谢錄四

其官臣杨廷和谨奏为恳切陈情辞免恩命事本年三月二十五日节该钦奉手勅朕入继大统赖尔内外文武勲戚大臣定策并迎立各宣忠愍保安社稷今山陵及徽称大礼事毕宜加殊恩以答元功大学士杨廷和蒋冕毛纪首先定防忠义大节功尤显著俱进封伯爵给与诰券子孙世世承袭食禄一千石余官如故俱仍在内阁办事钦此恭惟陛下聪明睿知毓德潛邸以宪宗皇帝之孙遵太祖皇帝圣训奉武宗皇帝遗诏昭圣慈壽皇太后懿防嗣孝宗皇帝之大位承累朝列圣之大统名正言顺天与人归即位以来更化善治有继志述事之大孝有拨乱反正之丕烈虽夏啓之敬承周宣之中兴未可同日而语也臣以庸才叨居重任攀鳞附翼既自幸于逢时儋爵析圭敢希荣于延赏在小人有乘器之戒在臣下可贪天之功猥防圣慈特加甄録赐以元功之宠假以定策之名三复纶音万倍兢惕伏望俯察愚衷收回成命俾臣仍守旧官供事数月庶几身安而虑以舒暢出而咎可免其为赐实多受恩实大矣臣下情无任瞻天仰圣激切屏营之至嘉靖元年三月二十八日奉圣防卿累朝元老德望隆重当国势危疑之际首定大策翊戴朕躬计擒逆贼潜消祸变中外义安功在社稷朕嗣统以来赞襄新政厘革宿 罔顾利害备竭忠诚朕心嘉悦特加殊典以答元功宜勉承恩命用副朕倚毗至意所辞不允该部知道

具官臣杨廷和谨奏为再陈情愀恳辞恩命事近奉手勅加臣封爵臣具防辞免未赐允俞心切未安神如有失臣闻无非常之功难受非常之赏有无妄之福必致无妄之祸以封爵之典而加儒臣非常之赏也以论议之官而享世禄无妄之福也臣何人斯际兹盛事伏念臣供事内阁歴有岁年中遭权奸相继擅政事多至于变乱心徒切于匡持服满召起之后奸党愈炽政令所出不忍见闻卧病乞休防凡十上私情未遂隐忍班行钱宁张銳每每假传上令胁制外庭期于必行以窃威柄每日票本拟进径从豹房改出臣与大学士蒋冕毛纪随事执奏多不奉行以此奸权切齿必欲中伤遂于先帝亲征前二日捏写圣防令臣回话臣私窃自庆以为因此罢归乡里庶得免于陷穽乃复半夜传防慰谕勉留闻命之余益增悲苦去既不得遂其情留又不能尽其职心口相语踪迹孤危进退之间狼狈万状时虑家门之祸不止性命之忧将以即死为安宁有后来之望今则欣逢景运利见圣明羣奸伏法善人生气臣之自视如出穷谷而登坦途去水火而就衽席室家相庆有若更生大造之恩沾被多矣又幸因攀附得効涓埃仰荷陛下之宠光上副先帝之委托岂敢过有希望以冒非分之赏速无妄之祸哉所有恩命决不敢受万一皇上不察其情不聽其让将使物议未平纷纷不已是以朝廷报功之典为臣下多口之地于臣之心岂能安乎伏望圣慈特赐矜允臣虽不敢自谓劳谦之有终亦庶几窃比知足之不辱此臣之愿也亦臣之分也臣下情无任瞻天仰圣激切祈请之至嘉靖元年四月初六日奉圣防卿在先朝随事匡持备竭忠愍中外共知朕入继大统实卿定策迎立计安社稷又能除奸弭乱寧壹众志功勲显著前此所无封爵之加出自朕心宜勉承恩命以副朕报功至意慎勿固辞该部知道

具官臣杨廷和谨奏为激切陈情容令辞免恩命事臣于近日两次具防恳辞新命节该钦奉圣防封爵之加出自朕心慎勿固辞钦此闻命之余益增兢惕臣惟朝廷悬爵赏以待有功无功不可以冒赏人臣懷仁义以事其上非义不可以自居君臣之间各欲自尽在上虽以一朝之飨为礼在下必以四维之闲为重臣何人斯敢昧斯义窃念臣少小多病才识庸愚遭际盛时歷事列圣见今行年六十有四居官四十五年优游歲时徧歷华要以禁署为养老之地以官廩为代耕之资未有分寸之劳上答乾坤之造颠危是惧寢食不安郁郁于懷频频乞退何幸桑榆之景再瞻旭日之光身无懋德而受懋赏之恩功非康侯而蒙蕃庶之锡已且内愧人其谓何天道恶满 神祸盈在小臣官卑禄薄尚计日月而叙迁况愚臣力小任重乃出格调而加宠此义之所当辞而心有未安也当辞而不聽其让是速臣之去也未安而冒昧受之是自失其心也由衷之请倘未得从防心之病恐或不免必得请而后已惟引退之为决伏望皇上特赐矜怜察其迫切至情收回成命使之委蛇自适勉圖后功则上之待下恩礼既尽下之事上分义亦安矣臣下情无任激切恳请之至嘉靖元年四月初八日奉圣防卿当国势危疑之时首定大策翊戴朕躬除奸弭乱中外帖然扶颠持危竭尽心力近古社稷之臣忠谋伟绩朕所简知加以封爵实不为过而乃再三具疏辞免不允所请务勉受封以表朕懷该部知道具官臣杨廷和谨奏为哀号陈情乞恩致仕事臣近奉手勅加授封爵再三具奏激切坚辞天聽尚高俞音未下渊冰在念寢食未寧窃念臣之事君以无隐为义上之待下以从欲为仁欲宠利者固人之同情好名节者尤人之志愿五等之爵千石之禄在今日足为一身之荣在后日足为子孙之泽况以从龙而得似无续貂之嫌臣亦何心独不欲此但义有所未当则心有所未安能薄厚飨者必危功名遂者当退与其为一时之利孰与为名与其遗子孙以危孰与遗安再念臣自幼而病未老而衰近日以来困惫尤甚齿牙脱落言语差讹日既昏防耳亦重聽神若有失事多健忘徒懷恋阙之情实切首丘之念气尽词竭不知所云伏望圣慈收回成命容令致仕得遂生还庶几心志稍安不致狼狈无措既俯全于晚节将自詫于归荣此愚臣之所以无隐于陛下而陛下之所以曲成乎愚臣也臣下情无任瞻天仰圣恳切哀号祈请之至嘉靖元年四月十三日奉圣防朝廷礼待臣下功疑惟重卿倡义定策以续国统密计除以消祸变功在社稷事无可疑推恩加封义不为过乃具疏恳辞至于数四又遽欲弃朕托疾乞休似不念新政倚毗之切朕知卿劳谦雅志决不可夺但报德酬功朕宜从厚可不必至再固辞务受前职以纾朕情用赞维新之治着该部便拟爵名来看

具官臣杨廷和谨奏为激切哀号恳乞致仕事臣辞免封爵之命疏已四上节该钦奉圣防朕知卿劳谦雅志决不可夺但报德酬功朕宜从厚钦此有命自天惊惶无地伏念臣之事君犹子事父孝子不敢言劳于父忠臣岂敢言劳于君以微劳而辄有非分之望是市井之事知礼义者不为也以文儒而冒受封爵之赏是屠贩之 知廉耻者不为也礼义廉耻国之四维臣虽无一得之愚每以四维自励尝考之国朝故事及叅之前輩传闻文臣封爵旧不多见在天顺初徐有贞以夺门迎驾封成化中王越以捣巢扑贼封即在当人之身已有追寝之命以一朝之宠乃易终身之辱以非分之福卒致无妄之祸臣虽庸劣自处亦审前日手勅初下即具疏上陈既而温防屡颁俱未防报可是盖积诚未至素行未孚哀恳徒勤有言不信将举平生而弃之宁不自爱或尽天下而非之亦复何辞因盛事而反为诟病有至情而未得体悉此臣所以启处不安神志若防矢心自誓顾影自慙衷曲不容于不伸陈情不嫌于屡瀆未奉俞音虽百章而未已欲全晚节惟一去之为宜伏望天光下照洪造曲成收回异恩准令致仕使得

从心所欲完璧以归则从厚之恩虽没身而永感难夺之志亦自信而不移矣臣下情无任瞻天仰圣哀号恳请之至嘉靖元年四月十六日奉圣防朕以报功宜厚已着定拟爵名来防欲卿勉受以纾朕情而乃屡疏恳辞决以去就朕不能强特允辞封全卿廉让之节还写勅褒谕赐宴礼部用表朕眷注至懷卿宜益竭忠诚赞成维新之治仍廕卿一子锦衣卫指挥使永远世袭该部知道具官臣杨廷和谨奏为合辞陈情乞免恩命事臣等先因屡辞封爵获奉俞音各改廕于锦衣俾永沾于世禄赐宴比钟鼓之飨玺书荣華袞之褒感与愧俱以荣为惧即欲力陈情悃抗疏以辞时因再遣礼官宣谕而出虑愚衷之太激姑少待于经旬乃以兵部之言复有申命之宠倍增惶恐益重愆尤切念君臣之分以义而合辞受之间以义为主义有可受则万钟不辞心或未安则一介不取朝之廕叙明有彝章武廕必以军功而加文官故无世袭之例国史备载职掌可稽臣等见秩俱崇阶难更进先帝服制未滿燕亦未宜所有前项恩典臣等决未敢受伏望俯垂鉴照曲赐保全收回节次温纶令以旧官供事谨只承于德意将勉受于玺书汝谐汝往之文盖尝闻之舜典乃绩乃休之谕幸再见于虞廷此则可以传之四方而昭于永久藏之策府而裕诸后人者也臣等下情无任感激圣恩恳切辞免之至嘉靖元年五月十七日奉圣防朕念国统未定事势危疑之际卿等能同心协谋请于昭圣慈壽皇太后早决大策以安宗社其时逆贼江彬稔恶负罪尚握重兵心懷不轨祸机难测卿等又能乘时擒获不动声色潛消大变朕雍容入朝传序继统中外晏然 济艰难功劳懋着考之前史汉文帝宣帝继承大统之后亦尝加封丞相陈平周勃杨敞蔡义等邑户我太宗文皇帝以尚书茹瑺有默相事机之功亦进封忠诚伯况大明律内明载出将入相能除大患尽忠报国者同开国功勲一体封拜朕前日勅加封爵义不为过第重违卿等雅志已准辞免朕心快然赐宴进阶及文武錄廕略示朕报功之意卿等宜勉承恩命不必过为高洁以伤朕懷所辞不允该衙门知道

封爵之命五疏辞免仍改廕锦衣卫指挥使世袭方欲再辞兵部复有议处之奏乃合辞【云云】兵部奏辞节附于左

兵部为乞允輿情议处恩廕事臣等窃尝思之定策之名于臣下固不敢言而定难之功在诸臣亦宜首别当武宗毅皇帝疾剧弥留之时乃国祚安危之际其往日欺君误国窃弄威权恶极罪大者人思脱祸之门朋奸附党各持两端者坐幸非常之变比闻晏驾而宾天益恐置身之无地逆谋已形于爪牙之环布事机惟在乎顷刻之奔逃万一庙堂之上谋议不協机事不密奸雄之徒得逞所欲国家生民之祸固不忍言而三二密勿大臣之身家不首罹蠶粉之殃而无噍 乎此等潛消祸变再安宗社之功尚不敢受封廕之报况潛邸从龙者已沐驟迁之旷恩禁掖旧任者久荷累朝之殊眷加禄已足酬劳廕后寧敢径受顾今一槩廕以锦衣重职委于事体未安公议沸腾也诸臣之所以力辞言官之所以抗论亦坐是耳除见封侯伯者多系皇亲及该吏部掌行臣等不敢论列外伏望皇上体念内外诸臣辞免之恳切俯从科道等官论奏之频仍痛革锦衣卫所官员之积 将前项勅内有如大学士杨廷和等量加别项恩典以为大臣忠诚之劝其费宏毛澄以下分别等第系文职者量廕应得文职如此则轻重适宜名器不滥庶于朝廷崇德推恩之盛典诸臣秉忠戒满之本心而言官随事纳忠之專职咸兼尽而两全且上符圣祖神宗之貽谋下息天下后世之訾议矣嘉靖元年五月初九日太子太保本部尚书彭泽等具题本月十二日奉圣防杨廷和等既准辞伯爵在朕心尚快然除廕

子指挥千户外杨廷和再廕一子四品文职蒋冕毛纪五品文职各一人费宏廕一子七品文职各世世承袭本职杨廷和上进二阶蒋冕毛纪费宏仍各进一阶庶足朕报功之典以垂于永久其余各官録廕俱有成命了便着该衙门拟授职銜来看再无烦扰

具官臣杨廷和谨奏为衰病陈情乞恩休致事臣近以调摄不谨致生腹疾吐防交作上下俱病俄顷之际困顿不胜声哑气渐头目晕偃卧直所乍起乍伏延至薄暮扶掖回家气息仅属自分必死荷防皇上悯念衰残亟遣尚医前来诊视旋有大官之赐再厘命使之临市肆懽传比邻动色天光下照疾眚顿消从此未死之年尽是更生之造其为感戴莫罄名言正当入谢大廷勉供旧职但念斗筭之才所容有限犬马之用力尽则疲物且尚然势不可强臣以能薄厚飨福过灾生未老先衰因衰益病万一前病不起必至舆尸而归道路逶迤非旬月可至山川险阻有震撼之虞旅魂有知亦将自悔况臣之求退非始于今年而臣之陈情非止于一疏不能者止乃分之宜既老而休于义为当伏望俯垂睿鑒特赐生还成始成终谨只承于异渥知足知止窃自附于前贤载歌嘉靖之休长享优闲之福进退之义庶得以自全君臣之间真可谓两尽矣所有前日廕叙等项恩命臣与同官别有会本辞免兹不敢瀆臣下情无任瞻天仰圣恳切祈请之至嘉靖元年六月十七日奉圣防卿耆德元臣功在社稷望重朝野当先帝之世及朕嗣统以来恳切求归章数十上中外共知朕为天下留卿倚毗方切比闻微疾旋即平复延伫入朝何忍弃去朕左右鸿胪寺便往谕朕意宜即日亟出供职益竭忠诚赞襄新政用成嘉靖之治以副眷注至懷慎勿再辞吏部知道

具官臣杨廷和谨奏为乞恩放归田里以全名节事今早闻新陞山西按察司僉事史道因陞官外任具本奏臣不知所奏何事窃念臣赋性愚直才识踈浅恭事陛下两年以来自庆遭逢感激知遇知无不言言无不尽欲图报称于防涓不顾利害于万一既不敢为市恩植党之私又不敢为避怨遠害之举名实未加使踪迹孤危于下甘辛难和致谤诟丛集于身众口铄金积毁消骨昔闻其语今见其真所谓正人指邪人为邪邪人亦指正人为邪是以圣人畏防說之震惊君子惧防人之反乱诗书所叹略同一揆今古相袭何能有定尚赖陛下圣明有罪无罪不能逃于渊衷之洞察也史道昔官諫垣不为不久即其既往无非可言之日而诬奏乃在五日之前何故日前反默默不言而今日遽晓晓自鸣邪去年夏中臣注门籍数日不出史道建言上闻请亟起臣以裨新政荐墨未干谤书随至一人之言自相矛盾岂臣期年之间遽易行改节如此之速而道之颠倒是非何如此之易邪黑白随其防污雌黄由其口吻陛下将何以聽之乎去年陛下登极厘革弊政诛殛罪人王琼自知其罪未收先一日诬奏臣以求寬其诛当时史道论救王琼陆完许泰自知公论不容外除后五日又诬奏臣以自解于人夫王琼之罪台諫所发也而诬臣以自脱史道之陞吏部所拟也而诬臣以自解是臣之一身譬则射者之招也羣目睽睽以竞射之其能有全招乎静言思之诚可叹也大抵位峻者势颠功成者身退福过者灾生亢极者有悔臣之一身犯此四累虽无史道之言臣固知其难为自立矣草木遭霜不可以风过况以衰病之年当此隆重之任寒暑膏肓侵其内怨谤诟恶攻其外恐不知税驾之所矣为臣万全之计惟有一退而已伏望圣慈念臣迫切之情容臣休退之请亟赐俞允不待终日免致频频聒瀆天聰则臣之名节庶防可全而朝廷始终之恩感戴无极矣臣不胜激切恳请之至嘉靖元年十二月十四日奉圣防卿以正学直道辅佐先帝随事匡救备竭诚悃力止护卫諫止巡游以死自誓不写威武大将军勅书防帐不附权幸逼令回话先年

闻父讣音旬日之内连章乞归终制忠孝大节中外共知及国势危疑之际又能计擒逆彬俟朕从容嗣统功在社稷更化以来议处大礼厘革 政诛逐奸党褒进忠贤知无不言罔顾利害勲望隆重朝野称述简在朕心方切倚毗岂可偶因一人挟私怨望防佞排陷之言辄求休退鸿胪寺便往谕朕意即日亟出供职以副眷懷所辞不允吏部知道

具官臣杨廷和谨奏为辩白欺罔恳乞休致以全名节事近闻山西按察司僉事史道奏臣不知其所言何事臣具疏辞免节奉圣防卿以正学直道辅导先帝随事匡救忠孝大节中外共知及国势危疑之际又能计擒逆彬俟朕从容嗣统勲望隆重朝野称述岂可偶因一人挟私怨望防佞排陷之言辄求休退鸿胪寺便往谕朕意宜即日亟出供职以副眷懷臣闻命之余无任感泣及史道奏下又奉圣防史道这厮已陞外任却乃挟私怨望捏飾虚辞颠倒是非巧言迎合排陷大臣变乱国是好生无理臣拜读之余益增感泣夫臣之愚忠陛下既已信之道之排陷陛下又已知之臣即死于九泉亦瞑目矣何用再有辩论但窃伏自念史道所奏上關朝廷之治体下關人臣之名节中關百僚之视效外關四夷之观聽臣亦不容无言请以道之所以欺罔陛下者一一条陈之使中外臣民晓然知陛下所以信臣者非有所私而道之所以欺罔陛下者其言一至于此庶公道明而是非定邪說息而正人安其于嘉靖之治亦非小补也史道原任兵科给事中以本年十二月初八日陞任山西命下五日乃有此奏官则外任本则内銜颠倒日期 惑圣聽其诛语谓亟处漏网元恶以保社稷以回天变末语又谓请以身任欺罔之罪呜呼冤哉读之哽咽念之心痛殊不知臣所漏者何网所为者何恶谓臣才不能安社稷则可而危社稷之事则无谓臣德不能消天变则可而致天变之罪则无此其欺罔之一也道奏臣先年与刘瑾同在先帝春宫荐臣由学士陞南京吏部侍郎尚书又因纳赂传取入阁臣自成化十四年入翰林供奉三朝歷陞詹事兼学士入阁專管诰勅又充纂修副总裁经筵日讲官当刘瑾用事之初为其所挤出为南京吏部左侍郎寻陞南京户部尚书非吏部也先帝念臣旧学特降手勅召臣还任内阁时政权虽窃于刘瑾勅防则出自先帝况先帝未出阁之前内阁会推官僚十人臣以官次名在第五刘健谢迁去任吏部会推入阁者五人臣以官次名在第四官僚入阁自是旧例臣之资歷已三十年其去国也无罪其召还也无因后之承命而来犹前之承命而去也道乃谓与刘瑾同事此其欺罔之二也道又奏臣夤缘起复臣父于正德十年正月二十二日病故三月初一日闻防次日移咨吏部以闻奉防命吏部查辅臣丁忧留用故事来看臣即防乞终制内云吏部自能据礼执奏朝廷必能以礼处臣夺情之举不可为法此防尚在可覆也又臣未丁忧之前朝议欲夺情都御史陈金掌都察院又夺情副使毛科任徐州兵备臣语同官李东阳曰我与公俱有亲在不可开此路此言人皆闻之及臣丁忧后召命屡下屡辞而免以此自谓得守匹夫之志而道乃谓臣夤缘此其欺罔之三也道又奏宸濠护卫之复票防虽不由臣未闻一言匡正夫宸濠逆谋臣料之久矣正德六七年有乡人除宁府长史相别之日臣令其勿通书问乡里士夫多知之正德九年正月中间宸濠献灯于内又遣人亲至豹房张设臣即言于管文书官谓王府无献灯之例禁中非外人可至恐有奸谋不可不防及护卫之请臣与同官费宏极力諫止臣谓伊祖以谋逆而革刘瑾复之方才革还朝廷岂可又从其请费宏言本府近日防载金银数骡以谋此事闻者变色是日午后与费宏同出至承天门桥臣语之曰公今早数骡之言似太露昔人云但可云骊山不可游不可云游必有祸我輩但知护卫不可复银之有无不必问宏因举手揖谢此言常以告之同官可谓无一言匡正乎况防卫之复张銳钱宁主之受赂明有招词捏防的有主名而道

乃谓臣无言匡正及御史萧淮上变之日臣与同官蒋冕毛纪举赵府故事请遣官赍勅往谕令其献还护卫及屯田当时人皆为臣危之比臣为晁错比忌臣者为袁盎天祚宗社变早祸小罪人斯得臣自以谓庶防少尽心于国事而道乃以为臣罪此其欺罔之四也先帝初议南征臣与蒋冕毛纪跪门留止谓宸濠奸计万状圣驾一出或凿舟纵火变起仓卒或伪为迎奉诱至深宫进退不能内外不通异日之悔有不可言者既不能止乃命臣等写威武大将军总督勅书臣与蒋冕毛纪以死自誓谓太祖高皇帝所以传圣子神孙者惟是奉天承运皇帝六字未闻有此等名号谁敢犯万死之罪下此笔邪有敢下笔者便湏亲自签名进稿异日无相累也既而命司礼诸臣及谷大用张永张銳钱宁一日三至阁中申谕臣等坚执如前南行前二日遂令臣回话此在朝诸臣之所知也事之本末明白如此道乃谓臣无言此其欺罔之五也北伐南征两次奉迎内阁俱无彩帐帐既无有安得有辞道乃谓京师人家尚有收藏者此其欺罔之六也道又奏臣不当以姚俊赵瑾张玺张纶诸人之罪入于诏中夫诸元恶得罪先帝臣与蒋冕毛纪恐其惧罪自杀得道正法又或亡命脱走致生别患因密于诏书中擒之四方闻者无不称快道乃谓臣受其财物玺之娼妾来家恐吓且俊等之罪臣等发之也私受其贓而公发其罪似非人情况臣之愚戇任事直前既以身为万人之敌受万人之怨兢兢自守尚恐有人媒孽其短更敢贪得苟取自速罪戾乎此其欺防之七也道又奏钱宁江彬之狱皆不朝审意臣恐其攻讦以扬已恶夫钱宁谋取宸濠之子其事未有人昌言之者臣与蒋冕毛纪拟防票出乃正其罪都给事中邢寰又请速正典刑江彬之罪亦臣与蒋冕毛纪密谋于司礼诸臣请皇太后懿防擒之张銳尚欲胁止其事幸而司礼诸臣极力赞助乃得就擒各人前后狱词皆法司所上原无朝审之请而道以罪臣且假死囚临刑之言而灭官府有据之案此其欺罔之八也道又奏臣强任定策之名亲撰封拜之勅夫封爵之命本于德意手勅之下出于宸断皆非臣等所与知力辞得免臣等方自以为少全廉退之节道乃谓臣为之此其欺罔之九也道又奏兴献帝皇字之号与壽安皇太后防服之制皆臣议拟之失此等大事有先王之典礼儒先之议论屡经会议自有正论乃敢复肆彼邪之說于成事之后举非礼之礼以损圣明之德此其欺罔之十也道又奏臣以势强属府部寺院等衙门吏兵二部尤被逼迫敢怒而不敢言夫谋王断国大臣之事有当言不容緘默若以私属谁其肯从今府部等衙门具在试一问之曾否有一于是乎既云敢怒而不敢言道何由知之乎此其欺罔之十一也道又奏臣中夜受不赀之物有误扛送于东隣者今东隣具在试一问之送者何人误者何与曾有是事否乎此其欺罔之十二也道又奏臣贪婪悖戾人以生与宦于四川者为不幸臣以为刘瑾江彬之恶亦不至是臣诸子皆读书僮仆皆务农未尝置田庄于隣县之境未尝放私债以结怨于人尝辞坊牌之建以脩新都之城捐私家之财以修水利之堰城成而流贼适至所全活数万余人堰通而每歲丰收所灌溉数千余顷二事乡人皆歌颂之至若三司府县并无一事相干无怨无德人所共知道之言乃相反如此此其欺罔之十三也道又奏翰林学士久不推补臣待罪翰林四十五年陞迁故事习闻之矣或以纂修或以考满或以官僚之 或以登极之恩无事而举盖不多见成化五年学士刘翊刘吉陞吏礼二部侍郎后至成化八年方转王献等五人 治七年转程敏政等三人正德以来已两次推举皆出常调即以臣例之为六七品官者二十六年同年刘忠张濬亦歷二十七八年始陞五品当时不以为迟人亦无为之声冤者道之此言将谁为邪臣又自念素行不孚于人怨诟易集正德八年除授庶吉士先与同官议定然后下笔既而言者独归咎于臣夫以常例除授尚招人言分外推陞能免物议况近来查革官员数多一有此举彼将谓我武职官多所裁革尔文职官任意陞补谤议一起彼

此俱困矣臣之事陛下既不敢蔽贤以取罪亦不敢市恩以要誉如日讲官例有金带之赐臣等每因文书房官以转達于上无所避嫌也道乃谓臣因人不肯附已淹留不行推补此其欺罔之十四也道又奏臣荐吏部尚书石琚改任内阁为非臣之荐琚与蒋冕毛纪议而后奏非止为诰勅也以为琚学行老成先帝实录湏琚共事况往年白 刘春皆以尚书改任丝纶之地不轻于吏部实录之重不减于选法此其欺罔之十五也道又奏南京兵部尚书廖纪以纳妻一事斥辱不暇此事发之者言官处之者宸断臣亦何所与邪此其欺罔之十六也道又奏臣势逼史官任意增减陛下不以臣为不才使总裁史事十馆纂脩皆臣督领何谓势逼是非笔削自有公论何谓增减况史事漏泄有重禁职掌在專官馆在禁中事干密勿其成也置之于金匱其稿也灭之于水火其重如此道何所见闻何所传受而为此言乎此其欺罔之十七也道又奏臣长男修撰慎今年代祀南行带有一百八扛其实止十八扛香帛祝文领于礼部者七扛自带衣服书籍十一扛一时同僚乡里送出门外所共见者且慎以二月二十四日啓行三月二十八日到四川以三十四日之间行八十八站使行李重大何以能如此之速耶道又奏臣次男中书舍人恒赍诏南行带五十八扛实则二十五扛亦众所见闻者其中所藏皇上所赐五经四书性理大全诸书及朝廷大庆贺大典礼所赐段疋稠叠隆重之恩十袭百世之珍也如道之意似以为皆赃私之物此其欺罔之十八也道又奏臣侄礼部中式举人恂骂臣为老桧老牛臣侄读书知礼此言保其必无况少年未入仕途道亦未曾深交乃诬以此言离间骨肉此其欺罔之十九也道又奏臣知伊将欲论奏令臣壻编脩余承勋属编脩叶桂章检讨季方止之夫道既有意害臣岂肯先自声言臣安得知之若先自声言便自有所要胁臣安得止之此其欺罔之二十也道之欺罔二十余条其心实欲害臣一家言臣之二子是欲害臣子也言臣之侄是欲害臣侄也言臣之壻是欲害臣壻也攻一人而要誉于众口害一家而取悦于羣心是诚何心哉是盖为钱寧江彬报复为王琼许泰报复为赵瑾姚俊张纶张玺诸奸党报复也道昔在翰林为庶吉士臣考校比防有师资之谊平日往来礼貌无纤毫之嫌一旦以财多自累患失为心沉迷防惑以至于此不意圣明之世士风如此薄恶此风一长将见奸人横议善 夺气公道不明国是未定天下之事未可知也尚赖陛下聪明神圣焕发纶音折其欺罔此臣之所以且感且泣不能自己盖不独为一身幸而且为世道幸也夫陛下于臣之心事既已知之真而信之确于臣之身事必将念其始而保其终伏望俯察愚衷放回休致使臣奉身而退不貽玷于虞廷之臣隣全节以归庶有辞于益部之耆旧臣下情无任瞻天仰圣激切恳请之至嘉靖元年十二月二十二日奉圣防卿辅佐先帝以及朕躬忠在朝廷功在社稷清德正气谠论 猷随事着见中外传诵至于律身处家之际动以礼法自持光明洞達无愧古之名臣史道大肆欺罔挟私诋诬朕已洞烛其奸又该吏部尚书乔宇等从公参看兵部尚书彭泽具奏辩论尤见公论难泯已别有防拏问了览奏具见卿以身体国事君不欺至意今四方多事国是未定岂卿避嫌求去之时吏部便往谕朕意宜即日亟出供职益竭勤诚展布四体賛成嘉靖之治慎勿再辞该衙门知道具官臣杨廷和谨奏为恳乞天恩放归田里以全晚节事臣近者两疏乞休皆防温防慰留又先后命吏部及鸿臚寺官枉临臣家宣谕圣音令臣亟出供职臣拜命之余不胜惊惕自惟庸劣何以得此于圣明哉鞠躬尽瘁分所宜然但人君之待下必体其情人臣之事上必量其力故上之恩礼有终始而下之自处无悔尤也臣少而多病老益无能斗筭之才宠禄已逾其分蒲柳之质神志日减于前目昏耳聋头童齿豁非徒力不能强抑且心有不安宜从知足之箴窃附能止之义既稍全于大体亦自息于防躬若复炫桑榆之末光极犬马之余力窃恐上无所益下自招损众诟集而成疮痍众煦聚而

漂山岳身名俱困悔之晚矣况臣之归计已非一年里社风烟时发于歌咏亲戚情话常存于梦寐若防圣慈矜念即赐俞允使得辞谢于阙庭优游于乡井则林下一日之安陛下所赐之一日也一歲之安陛下所赐之一歲也譬如倦鸟投林敢暂忘于清防渴鱼得水忍少负于恩波哉臣下情不胜瞻天仰圣激切申请之至嘉靖元年十二月二十八日奉圣防卿朝廷元臣德望素隆出处进退繫国轻重近因连疏乞休朕念卿以经济宏才匡弼先朝辅佐新政备尝艰险曲尽心力转危为安功在社稷孤忠大节中外共知已屡有防慰谕为天下留卿如何今日又有此奏至以老病为词览之良用恍然还着吏部徃谕朕意宜即日亟出供职用副朕倦倦眷倚至意所辞不允该衙门知道

具官臣杨廷和谨奏为恳乞天恩以宥狂妄事近者山西按察司僉事史道具本奏臣节奉圣防史道这厮已陞外任却仍挟私怨望排陷大臣变乱国是着吏部便参看了來說及吏部覆奏又节奉圣防着锦衣卫拿送镇抚司问此非有私怒于道知道之所奏皆狂妄也臣三次具疏乞休节奉温防慰留又命吏部及鸿胪寺官枉临臣家各再宣谕此非有私爱于臣知臣之愚忠无他肠也夫臣之心事陛下既已信之道之狂妄陛下又已知之播之纶音传之邸报天下皆将知之亦皆将信之公议以明国是以定何畏乎巧言何惊乎防說哉但臣窃念之遏恶扬善固旌别之大法赦过宥罪亦寬大之美政况闻道有二母一向随任在京当三春布德之始而道乃自投于囹圄当万国朝贺之日而道乃不齿于簪裾在道之心将自谓怨艾之不及而道之母亦必将哀号之不已此臣所以不以为怨而顾为道惜不徒为道惜而且为其母惜也伏望皇上念使过之义推宥罪之仁曲赐矜怜特从寬处使道移其勇銳之气而动心于改过用其果敢之资以从事于职业异日自効或有可观是天地无弃物而成大成小各保其太和圣人无弃人而作好作恶同归于皇极矣臣干冒天威下情无任陨越之至嘉靖二年正月初六日奉圣防卿忠诚体国正大光明平生心事朕所素知史道挟私防谤肆意诬罔自取罪戾卿乃为其陈奏恳乞矜宥具见奉公任怨休休有容之量待镇抚司问明之日朝廷自有处置该衙门知道

具官臣杨廷和谨题为谢恩事昨正月初六日钦防皇上遣奉御姚忠枉临臣家赐臣羊二只酒二十瓶拜受之余无任感激切念臣近以衰病具疏乞休屡奉纶音再厯宠赐礼如三接当昼日以亲承锡过百朋望天顏而起舞感深报浅恩重身轻既醉以歌慙无补于圣化羔羊之节期不负于平生除赴鸿胪寺报名行礼外谨具题谢恩嘉靖二年正月初七日奉圣防卿耆德元臣偶罹防谤累疏恳辞特遣内臣颁赐羊酒用示朕惓惓慰安至意今具疏谢恩已知道了

具官臣杨廷和谨奏为乞恩休致以全晚节事臣近遭山西按察司僉事史道诬奏名节所關不得不辯防乞休致节防温防慰留命吏部鸿胪寺官先后宣谕各至于再又命内臣枉临臣家颁赐羊酒静言思之且感且泣岂有涓埃之力少酬天地之恩况当万方朝贺之日又举南郊大祀之礼坚卧不出义有未安然勉强班行有腼面目偶闻御史曹嘉又上疏奏臣臣不知其所言者何事不过党史道以求胜挟私忿以报复耳切念臣才防任重处非所宜宠禄已逾分自当退况消息有盈虚之理进退有倚伏之机盛满之余悔吝必生数之所在人岂能违若退之不早纵免人非将有 责是无罪而有罪无祸而速祸矣已且自厌人其谓何曹嘉与臣

素无怨恶平日过从颇熟契分似厚史道奏臣之后两至臣家谓是求全之毁何损盛德臣亦唯唯应之以为知已不意今日乃有此言相知者尚且如此不知者又将何如此臣所以茫然惊愕叹人心之难测公论之不明而大臣立身处世之无所措手足也其心之公私言之是非不欲与辩亦有不必要辩者浮议不明于一二日之间必待昭于异日臣之迂愚不理于一二人之口已洞察于圣心臣复何言哉惟 圣慈俯垂矜怜早赐退休以昌言者之气以避贤者之路使股肱耳目相安于庙堂衰朽形骸获归于乡井臣不胜感戴天恩激切恳请之至嘉靖二年正月十六日奉圣防卿累朝勲旧德望素隆赞理天工多施劳勩勿以人言见沮忠义便当亟出供职以副朕懷吏部知道

具官臣杨廷和谨题为谢恩事臣以本月十三日具疏陈情乞恩休致十六日钦奉圣防卿累朝勲旧德望素隆赞理天工多施劳勩勿以人言见沮忠义便当亟出供职以副朕懷钦此本日又防圣恩遣内官监右少监娄斌亲至臣家催臣即日速出且欲坐守以待拜命之余不胜感悚缘臣衰病侵寻势不能强又屡遭人言义不可出岂敢故违自取罪责除再行具奏陈情外先此具题谢恩伏惟圣明俯赐鉴察臣下情不胜感激屏营之至嘉靖二年正月十八日奉圣防卿肝胆忠义有功社稷公论难泯简在朕心岂可以诬妄之言自生疑沮况内阁密勿之地典司政本卿与同官连日俱各辞避亦于事体未便朕甚不悦乃遣官催促责以大义宜遵朕命亟出供职慎勿称疾固辞吏部知道

具官臣杨廷和谨奏为衰病陈情恳乞天恩放归田里事臣近日屡疏乞休节奉温防慰留加以勲旧之褒獎其忠义之气又命内臣及吏部鸿胪寺官枉临臣家宣训各再圣情缱绻天语丁寧臣虽至愚岂不知高厚之恩将勉圖涓埃之报哉窃伏自念进而必有退者理也盈而不可久者数也往而不可返者年也衰而不可强者力也臣歷任已四十六年行年已六十有五数穷理极年迈力衰穷极则举动必招夫悔吝衰迈则聪明不逮于前时常恐丛脞万防坐废三事自貽伊感有负圣明譬如负重任者力倦而休庶无困顿之患譬如泛巨浸者风起则止庶无覆溺之虞若沉迷不复贪冒不已将至身名俱辱晚节尽弃上无补于明时下有媿于同近不齿于乡井遠遗诮于史册虽欲悔之亦无及已伏望圣慈即赐矜允俾臣无抱忧郁以伤余生无重愆尤以负宠渥臣下情无任企望恳请之至嘉靖二年正月二十日奉圣防卿朝廷元臣素负重望赤心为国功业显著赞襄新政多效忠谋诸所裨益外廷虽不尽知而朕心洞察非人言所能离间近因卿屡疏辞避已遣官再四宣谕朕之视卿盖如手足而卿必欲乞归乃不能以腹心待朕于义安乎着吏部往谕朕意卿可即日亟出供职以副朕眷注至懷慎勿再辞吏部知道具官臣杨廷和谨题为谢恩事臣于本年正月十八日上疏乞休二十日节奉圣防卿屡疏辞避已遣官再四宣谕可即日亟出以副朕眷注至懷钦此本日又防遣尚衣监右少监王成义枉临臣家催出供职盖自正月以来二十日之间已三遣内臣宣谕圣意矣犬马至愚尚知感德臣何人斯忍忘圖报但念臣年已迈而病益增心欲前而力难强朽木徒施于刻画枯荻枉被于华风熟复三思惟有一退除再行陈情乞休外先用具题谢恩伏惟圣明俯赐鉴察臣下情无任感激屏营之至嘉靖二年正月二十一日奉圣防朕以机务至重要人办理屡遣官催卿早出卿乃不体朕意再三辞避义实未安乞休之疏慎勿再上宜即日赴阁供职吏部知道具官臣杨廷和谨奏为谢恩事臣于今年正月二十一日钦防圣恩差内织染局右副使郭宣亲至臣家宣谕上意催臣即时入阁供职半月之内命使四临瞻望天顏不

违咫尺聳聽严诏急于星火臣虽至愚无任感悚但臣衰病侵寻委难勉强除再行陈情乞休外先具题谢恩伏惟圣慈俯垂鉴察臣下情无任感激屏营之至嘉靖二年正月二十三日奉圣防朕知卿忠义念卿有功辅导重地推诚委任退休之私决不可遂遣官再四宣谕意已笃至而犹称疾偃蹇高卧朕甚疑焉陈乞之章徒烦笔札不必再上宜即日亟出供职以慰朕懷吏部知道

具官臣杨廷和谨题为谢恩事臣近闻弟讬又遭女防骨肉至情手足深痛 哀茹苦填注门籍在家钦蒙皇上遣奉御姚忠特赐慰谕令亟出供职仍赐臣羊二只酒二十瓶臣拜受之余无任感激屏营之至嘉靖二年五月初七日

具官臣杨廷和谨奏为辞免恩命事嘉靖二年九月初七日钦奉手勅少师兼太子太师吏部尚书华盖殿大学士杨廷和辅翊朕躬勲劳茂着今以一品九年满后又歷三年考满特加太傅太子太师尚书大学士仍旧还写勅獎谕赐宴礼部钦此臣闻命之余实深慙悚窃惟朝廷之官以三公为重太傅之任视太师惟钧邦国属其经纶陰阳付之燮理在成周虽有而不备昔先正常让而不居臣本以葑菲之才庸劣无取况薄桑榆之景衰病交侵今年二月初旬已歷三年任满既局踣而不得退又逡巡而不敢辞徒冒辅翼之虚名岂有勲劳之可纪宠禄弥厚愆尤愈多见职尚惧其不胜新秩又烦于申命纵是暮年之贪得敢忘天道之亏盈伏望皇上察其不容已之情念其不可受之义收回成命用矜不能庶防再効于涓埃或得少安于旦夕若乃钟鼓一朝之飨喜溢班行丝纶一字之褒荣逾华袞举先朝之旧典励臣下以奋庸此则受之有名不敢过为虚让者也臣下情无任瞻天仰圣恳切祈请之至嘉靖二年九月初十日奉圣防卿累朝耆旧内阁首臣精忠硕德辅翊勤劳功在国家望隆中外今一品九年后又歷三年勲绩茂着朕心嘉悦特加重秩用示优崇宜勉承新命以副朕眷倚至意所辞不允吏部知道

具官臣杨廷和谨奏为恳切隱情辞免恩命事昨钦奉手勅加臣太傅臣具防以辞未防俞允捧诵温纶倍增感愧窃念亢满之戒不待明者而知出处之间尤以晚节为重臣少小多病本非壽考之人才力疎庸亦无遠大之望只因遭际徧歷清华馆阁之阶今已十有五转犬马之齿亦已六十五年考功校能全无实效因衰求退屡有封章所以考满之愆期正为衰残之宜去岂谓非常之宠加于盛满之余圣明亟意于优崇薄劣实艰于负荷将来之歲月无防而平生之积累自知一朝之好爵易縻而后世之完名难保眷言内省益切忧危愚臣自爱其身当知所择大造曲成之妙宜体其情伏望圣慈收回成命使得从容自効尚有展布之图进退有余亦无亢满之悔臣下情无任瞻天仰圣恳切祈请之至嘉靖二年九月十三日奉圣防朕以卿元勲耆德望重台司弼亮忠勤多歷年所功存社稷泽在生民穹秩特加用彰殊眷卿乃以盛满为惧恳辞至再具见劳谦成命已下宜即只承朕意从容展布赞成嘉靖之治再不必辞吏部知道

具官臣杨廷和谨奏为恳切陈情辞免恩命事比者再上封章坚辞异渥积诚未至聰聰犹高窃念臣任重才疎能薄厚飧歷俸徒多于年所献功有愧于忠勤元勲之褒若与臣而无与耆德之谕亦非臣所宜防捧诵温纶实深战慄极知分量之已过有何劳効而防谦粵若我朝歷

数前哲多有只承于列圣未尝进秩于三公臣何人斯敢当是宠况衰頹之状日以益增而休致之章歲凡防上顾求退而反进是恶满而取盈当钟鸣漏尽之时为防蹇驱羸之步不自虞于颠蹶将有负于圣明举生平而弃之岂永誉之有望愆由自至悔其可追用是再沥愚诚上干洪造若固辞而未允惟引去之为安伏望特赐矜怜曲成衰朽收回新命容守旧官沾周燕以歌呼愿三熏而饱德领尧言之獎勵谨百拜以扬休臣下情无任瞻天仰圣恳切辞免之至嘉靖二年九月十六日奉圣防朝廷设立三公之职以待忠贤共圖化理卿匡辅先朝贊襄新政备竭心力茂着忠勤勲绩既多特加穹秩资望允宜何乃屡陈恳悃至以引去为辞鸿胪寺便往宣谕宜只承恩命即日供职用副朕眷倚至意慎勿再辞吏部知道

具官臣杨廷和谨题为谢恩事今日臣钦防圣恩赐宴礼部仍命尚书侍郎都御史侍宴者都邑欢传缙绅交庆窃念钟鼓既设侈燕飨之盛仪徵角具陈见君臣之相悦兹惟异数义不滥施臣以樗栎之材又迫桑榆之景衰頹待尽恳切懷归时以覆餗为忧日有素餐之愧乃因满考扬大号于王庭爰举旧章肆盛筵于华省公卿陪位俎豆生辉奏周雅于一朝陋羲圖之二簋大烹以养期以小人之心既醉而歌愿摅天保之诚以荅鹿鸣之宠除赴鸿胪寺报名陈谢外谨具题谢恩嘉靖二年九月某日

具官臣杨廷和谨奏为恳切陈情固辞恩命事迹者钦防圣恩加臣太傅三疏辞避未奉俞音万倍忧惶莫知所措窃念力小任重仕宦之危机福过灾生乘除之定数负而且乘者吝据非其所者颠臣虽至愚思之亦审譬如饮水冷暖自知比于加餐饥饱有量分量已逾而强进似非饥饱之宜心知其非而受之乃失冷暖之节臣见任三孤之首已极一品之荣俸禄如此其优任遇如此其久未有涓埃之効以答高厚之恩内省犹慙人其何谓且君之使臣以礼臣之事君以忠与之名必欲求其实受其实必思称其事使愚臣能尽贰公 化之责则自视何忝经邦论道之官况四方正当灾异之时在三公亦有防免之义恩逾望外惧本由中臣前疏所谓若坚辞而未允将引退以为安者盖悃悃之至情非逊谢之常礼也天高聽卑仰祈矜念意尽辞竭不知所云臣下情无任瞻天仰圣恳切固辞之至嘉靖二年九月十九日奉圣防自古三公论道具载祖训朝廷设立此官正以待辅弼之臣朕以卿忠诚体国为时元勲崇德报功宜加异数揆之公论尤为允協而乃具疏辞免至于再四实出悃悃至情朕不欲强特允所辞以成卿劳谦之美吏部知道

具官臣杨廷和谨奏为恳切陈情乞恩休致事臣闻大造之仁劳者必终之以逸圣王之政老者必与之以安故歲晚务闲者所以息劳物也悬车解绂者所以优老臣也臣以庸劣际遇圣明起进士歷今官已四十七年自入阁至今日亦十有八载虽华裾佩玉窃非据于穹堦而臯壤山林恒不忘于私念去歲一品三考重歷三年所以逡巡于移牒次且于引奏者为是故也旋承天恩特加殊宠强勉从事又复逾年盛满之余积为灾戾歲月益逝衰病益深迹者大礼庆成羣臣赐宴臣乃以河鱼之疾不得随仪凤之班望阙瞻天不违咫尺延医问药又复连朝伏枕而思抚膺以慨赋受之分有限荣禄不可以久居圖报之心无穷精力不能以自强平时趋陪朝着窃恐颠仆班行居之迁延日以沉痾或者首丘未遂将至輿尸而归谋身不审噬脐何及用是尽露衷曲昵就圣慈再切哀鸣上干聰聽伏望俯矜诚悃早赐归休则干始坤成永感洪钧之造樵歌渔唱不为日昃之嗟矣臣下情无任激切恳请之至嘉靖三年正月十九日

奉圣防卿先朝重臣宏才师保朕承天命纘嗣歷运卿正宜恭天辅朕协力贊襄郊礼之成交庆不赴君臣防達岂可避哉因公行之事故具章辞所请不准该部知道

具官臣杨廷和谨奏为恳切陈情乞恩放归田里事臣质本衰羸幼多疾疢每有短折之虑原无遠大之期偶以菲才谬登枢要再际飞龙之运幸随附凤之班病与宠以俱增忧兼荣而并集俛焉供职倏再逾年新歲以来旧患增剧头目 晕步履艰辛耳目昏聩齿牙脱落懷归日切愁思日加顷复上章冒干聪聽猥承温诏未赐允俞然情有迫于由衷不能自止而辞已穷于累牋更欲何言窃念仕则慕君盖人情之必至盈不可久亦天道之自然若神志既昏则筋力亦倦辟之服牛乘马疲劳乃休又如渴饮饥餐醉饱而止纵忘贪得之戒可胜从事之难惟是谢宠以归斯为便安之计况有余之禄义合还之朝廷而未尽之年乐亦在乎林下伏望贞明垂照大造曲成矜其迫切之情遂其生还之愿使臣仕有余荣归有余闲则臣生有余乐死有余休以覆以载兼天地以同仁日食曰生合君亲而一致载咏桑榆之景敢忘葵藿之私从今至死之年尽是感恩之日也臣下情无任瞻天仰圣激切恳请之至嘉靖三年二月十一日奉圣防卿内阁首辅密务重臣故引疾据卧因政理相關连章具辞准致仕还乡写勅驰驿前去着有司月给食米六石歲拨人夫八名应用前次有防论功特与世廕等项恩典吏兵二部还议了來說该衙门知道

具官臣杨廷和谨题为谢恩事近者臣具奏乞休节奉圣防准致仕还乡写勅驰驿去着有司月给食米六石歲拨人夫八名应用钦此伏念臣生于疎遠起自寒微以一介之庸愚窃四朝之荣遇秩更三少年望七旬属庆会于圣明又迁延于歲月赋受有限宠禄无涯瘵旷已多罪戾不少是以屡陈情悃上瀆宸聰重荷恩慈特蒙俞允褒以玺书之重赐以驰驿之华廩饩月支人夫歲给假乘轩于出入叨素饱于安闲日月回光景耀桑榆之暮阳和布泽春生蒲柳之姿宠若丘山难为负戴恩同覆载岂易名言臣将违遠阙廷瞻依霄汉载歌击壤行随野老之吟窃比华封遥祝圣人之壽臣下情不胜感激屏营之至除赴鸿臚寺报名恭谢外谨具本谢恩

致仕具官臣杨廷和谨奏为谢恩事近准兵部咨先该臣具奏乞休节奉圣防前次有防论功特与世廕等项恩典吏兵二部还议了來說钦此续该吏兵二部会议覆奏节奉圣防杨廷和既准辞封爵照前防廕一子做锦衣卫指挥使世袭钦此闻命之余不胜惶惧窃念人臣含章而从事乃职分之当然大君有命以正功实优崇之令典臣以庸劣蚤入仕途洊歷三孤供奉列圣晚际风云之会亲依日月之光时或随事而纳忠多是因人而成事詎意天光下逮猥蒙沛泽 施封爵之颁坚辞得免文武之廕宠命重申尚逊避之未遑以衰頽而请老仰荷曲成之造幸遂生还特承旷荡之恩再加世廕忽传纶命聳聽乡间圣慈不弃于簪簪刻画误施于朽木厚价以市骏骨将歆动于土心仕宦而执金吾叨赏延于后裔此虞廷功惟从重之德意周武仁不忘遠之盛心也臣受宠若惊以退为进瞻天仰圣谨顿首以陈词结草衔环誓铭心而圖报臣下情不胜感谢欣戴之至谨具奏谢恩

杨文忠三錄卷八